

ব্রাহ্মকমল

এক

পশ্চিম বাংলার রাঢ় দেশ ।

এ দেশের মধ্যে অজয় নদীর তীরবর্তী অঞ্চলটুকুর একটা বৈশিষ্ট্য আছে। পশ্চিমে জয়দেব-কেন্দুলী হইতে কাটোয়ার অজয় ও গঙ্গার সঙ্গম-স্থল পর্যন্ত ‘কাহ্নু বিনে গীত নাই’। অতি প্রাচীন বৈষ্ণবের দেশ। এমন কি যেদিন ‘শান্তিপুত্র ডুবু-ডুবু’ হইয়াছিল, নবদ্বীপ ভাসিয়া গিয়াছিল, সেদিনেরও অনেককাল পূর্ব হইতেই এ অঞ্চলটিতে মাগুঘেরা ‘ধীর সমীরে যমুনাতীরে’ যে বাঁশি বাজে, তাহার ধ্বনি শুনিয়াছে। এ অঞ্চলে সুন্দরীরা নয়ন-কান্দে শ্রাম-শুকপাখি ধরিয়া হৃদয়পিঞ্জরে প্রেমের শিকল দিয়া বাঁধিয়া রাখিতে তখন হইতেই জানিত। এ অঞ্চলের অতি সাধারণ মানুষেরও জানিত, ‘হুথ হুথ দুটি ভাই, হুথের লাগিয়া যে করে পিরীতি, হুথ যায় তারই ঠাই’।

লোকের কপালে তিলক কাটিত, গলায় তুলসীকাঠের মালা ধারণ করিত; আজও সে তিলক-মালা তাহাদের আছে। পুরুষেরা শিখা রাখিত, আজও রাখে; মেয়েরা চূড়া করিয়া চুল বাঁধিত। এখন নানা ধরনের খোঁপা বাঁধার রেওয়াজ হইয়াছে, কিন্তু স্নানের পর এখনও মেয়েরা দিনান্তে একবারও অন্তঃ চূড়া করিয়া চুল বাঁধে। আজও রাত্রে বাঁশের বাঁশির সুর শুনিলে এ অঞ্চলের একসন্তানের জননী যাহারা, তাহারা জলগ্রহণ করে না। পুত্র-বিরহবিধুরা যশোদার কথা তাহাদের মনে পড়িয়া যায়। হনুদমনি পাখি—বাংলা দেশের অন্তত তাহারা ‘গৃহস্থের থোকা হোক’ বলিয়া ডাকে, এখানে আসিয়া তাহারা সে ডাক ভুলিয়া যায়—‘কৃষ্ণ কোথা গো’ বলিয়া ডাকে।

অধিকাংশই চাষার গ্রাম। দশ-বিশখানা গ্রামের পরে দুই-একখানা ব্রাহ্মণ এবং ভদ্র সম্প্রদায়ের গ্রাম পাওয়া যায়। চাষীর গ্রামে সদগোপেরাই প্রধান, নবশাখার অস্ত্রাস্ত্র জাতিও আছে। সকলেই মালা-তিলক ধারণ করে, হাতজোড় করিয়া কথা বলে, ‘প্রভু’ বলিয়া সম্বোধন করে। ভিখারীরা ‘রাধে-কৃষ্ণ’ বলিয়া দুয়ারে আসিয়া দাঁড়ায়; বৈষ্ণবেরা থোল, করতাল লইয়া আসে; বৈষ্ণব-বৈষ্ণবীরা একতারা-থলুনা লইয়া গান গায়; বাউলেরা একা আসে একজোরা বাজাইয়া। মুসলমান ফকিরেরা পর্যন্ত বেহালা লইয়া গান গায়—পুত্র-শোকাভুরা যশোদার খেদের গান। সন্ধ্যায় বৈষ্ণব-আখড়ায় পদাবলী গান হয়, গ্রামের চণ্ডীমণ্ডপে সংকীর্তন হয়, ঘরের খঁড়ো বারান্দায় বুলানো এদেশী শালিখ পাখি ‘রা-ধা কৃষ্ণ, কৃষ্ণ রা-ধা, গো-পী-ভজ’ বলিয়া ডাকে। লোকে শখ করিয়া মালতী মাধবী ফুলের চারা লাগায়। প্রতি পুরুষের পাড়েই কদমগাছ আছে। কদমগাছ নাকি লাগাইতে হয়। বর্ষায় কদমগাছগুলি ফুলে ভরিয়া উঠে, সেই দিকে চাহিয়া প্রবীণেরা অকারণে কান্দে।

সে কাল আর নাই। কালের অনেক পরিবর্তন ঘটিয়াছে। মাঠের বুক চিরিয়া রেল-লাইন পড়িয়াছে। তাহার পাশে পাশে টেলিগ্রাফের তারের খুঁটির সারি। বিদ্যুৎ-শক্তি

‘তারের লাইন। মেঠো পথ পাকা হইয়াছে। তাহার উপর দিয়া ঊর্ধ্ববাসে মোটর বাস ছুটিভেছে। নদী বাধিয়া খাল কাটা হইয়াছে। লোকে হুঁকা ছাড়িয়া বিড়ি-লিগারেট ধরিয়াছে। কাঁধে গামছা, পরনে খাটো কাপড়ের বদলে বড় বড় গ্রামের ছোকরার জামা, লম্বা কাপড় পরিয়া সভ্য হইয়াছে। ছ-আনা দশ-আনা ফ্যাশনে চুল ছাটিয়াছে। নতুন কালের পাঠশালা হইয়াছে। ভদ্রগৃহস্থের হালচাল বদলাইয়াছে, গোলাব ধান ফুরাইয়াছে, গোয়ালের গাই কমিয়াছে, তবুও একশ্রেণীর মানুষ এই ধারাটি ভুলিয়া যায় নাই; ‘হরি বলতে যাদের নয়ন করে’—তাদের দুই ভাইকে স্মরণ করিয়া তাহারা আজও কান্দে। ‘স্বথ দুখ দুটি ভাই’—এই তথ্যটি তাহাদের কাছে আজও অতি সহজ কথা। ‘ধীরে সমীরে যমুনাতীরে’—আজও সেখানে বাসি বাজে।

এই অঞ্চলে চাষীদের ছোট একখানি গ্রাম। মাটির ঘর, মেটে পথ, পথের দুই ধারে পতিত জায়গায় তাঁটিফুল ফোটে, কস্তুরীফুল ফোটে, নয়নতারা অর্থাৎ লাল সাদা ফুল চাপ বাধিয়া ফুটিয়া থাকে, অজস্র ‘বাবুরি’ অর্থাৎ বনতুলসী গাছের জঙ্গল হইতে তুলসীর গন্ধ ওঠে। ছোট ছোট ভোবায় মেয়েরা বাসন মাজে, কাপড় কাচে; পাড়ের উপরে বাঁশবনে সন্ধ্যা শব্দ উঠে; কদম, শিরীষ, বকুল, অজুন, আম, জাম, কাঁঠাল-বনের ঘনপল্লবের মধ্যে বসিয়া পাখি ডাকে। কোকিল, পাপিয়া, বেনেবউ, বউ কথা কও, ঘুঘু, ফিঙে আরও কত পাখি, কাকেরা বাড়ির উঠানে ঘুরিয়া বেড়ায়। সড়ক শালিকে পথের ধুলায় ঘরের চালে কিচিমিচি কলরবে ঝগড়া করে। ঘরে চালের কিনারায় ঝুলাইয়া দেওয়া ঝুড়িতে হাঁড়িতে পায়রারা বকবকম শুকন তোলে; স্বথের ঘরেই নাকি পায়রার বাস—তাই স্বথের আশায় মানুষেরা নিজেরাই বাসা বাধিয়া দেয়। চাষীরা মাঠে যায়। মেয়েরা ঘরের পাশে শাকের ক্ষেতে জল দেয়, লাউ-কুমড়া-লতার পরিচর্যা করে। ধান শুকায়, ধান তোলে, সিদ্ধ করে, ঢেঁকিতে ভানে। ছেলেরা সকালে কেউ পাঠশালায় যায়, কেউ যায় না, গোরুর সেবা করে। গ্রামখানির উত্তর প্রান্তের ছোট একটি বৈষ্ণবের আখড়া কাহিনীটির কেন্দ্রস্থল। স্থানিবিড় ছায়াঘন কুঞ্জবনের মত আখড়াটির নাম ছিল—হরিদাসের কুঞ্জ। হরিদাস মহান্ত ছিল আখড়াটির প্রতিষ্ঠাতা। আখড়াটির চারিদিক রাঙ-চিতার বেড়া দিয়া ঘেরা। বেড়ার ফাঁকে ফাঁকে আম, জাম, পেয়ারা, নিম, সজিনা গাছের ঘন পল্লবের প্রসন্ন ছায়া আখড়াটির সর্বত্র জড়াইয়া আছে নিবিড় মনভায় মত। পিছনের দিকে কয় ঝাড় বাঁশ, যেন ছলিয়া ছলিয়া আকাশের সঙ্গে কথা কয়। এই আবেষ্টনীর মধ্যে দুই পাশে দুইখানি মেটে ঘর আর তাহারই কোলে রাঙা মাটি দিয়া নিকানো ছোট একটি আঙিনা—সর্বদা সুপরিষ্কার মার্জনায় তকতক করে। লোকে বলে সিঁদুর পড়িলেও তোলা যায়। ঠিক মাঝ-আঙিনায় একটি চারাগাছে জড়াজড়ি করিয়া উঠিয়াছে দুইটি ফুলের লতা—একটি মালতী, অপরটি মাধবী। শক্ত বাঁশের মাচার উপরে লতা দুইটি লতাইয়া বেড়ায় আর পালাপালি করিয়া ফুল কোটায় প্রায় গোটা বছর। লতাবিতানটির নিবিড় পল্লবগুলোর মধ্যে অসংখ্য মধুকুলকুলির বাসা। ছোট ছোট পাখিগুলি ফুলে ফুলে মধু খায় আর কলরব করে উল্লাস হইতে অভ্যাস পর্বত।

আখড়ায় থাকে মা ও মেয়ে—কামিনী ও কমলিনী। পল্লীবাসীরা দেশের ভাষা অচুয়ায়ী বলে ‘মা-বিঠারী’। বৈষ্ণবের সংসার, চলে ভিক্ষায়। কামিনী খন্ডনী বাজাইয়া গান গাহিয়া ভিক্ষা করিয়া আনে। কিশোরী মেয়ে কমলিনী ঘরে থাকে, গৃহকর্ম করে, পাড়ার সঙ্গিনীদের সঙ্গে খেলা করে, গুনগুন করিয়া গান গায়। গান শেখা এখনও তাহার শেষ হয় নাই। তবে গানের দিকে মেয়েটির একটি সহজ দখল ছিল। তাহার বাপ হরিদাস মহান্ত ছিল এ অঞ্চলে একজন প্রতিষ্ঠাবান গায়ক। কমলিনীর মা কামিনীর শিক্ষাও তাহারই কাছে।

কামিনীর গলা ছিল বড় মিঠা। হরিদাস ওই মিঠা গলার জন্তই শখ করিয়া তাহাকে গান শিখাইয়াছিল। কামিনী সলজ্জভাবে আপত্তি করিলে সে বলিয়াছিল, জান, এসব হল গোবিন্দের দান, এই রূপ এই কণ্ঠ—এর অপব্যবহার করতে নাই। এতে তাঁরই পুজো করতে হয়। এই গলা তিনি তোমাকে দিয়েছেন এতে তাঁর নাম-গান হবে বলে।

তারপর আবার ঈষৎ হাসিয়া বলিয়াছিল, আরও শিখে রাখ কামিনী, আমার সম্পত্তির মধ্যে তো এইটুকু, ভালমন্দ কিছু হলে এ ভাঙিয়ে তুমি খেতে পারবে।

কথাটা যে অতি বড় নিষ্ঠুর সত্য, সেদিন তাগা কেহ ভাবে নাই। কিন্তু ভবিষ্যৎবোর চক্রান্তে পরিহাস সত্য হইল। ছোট মেয়েটিকে কোলে লইয়া কামিনী অনাথ হইল। আখড়াধারী বৈষ্ণবদের পতাস্তর গ্রহণের প্রথা আছে,—কিন্তু কামিনী তাহা কবিল না। হরি বলিয়া দিন যাপনের সংকল্প কবিল। হরিদাস অকালে অল্পবয়সে দেহ রাখে। মরণকে উহার মরণ বলে না, বলে দেহ রাখা। সত্যি আজ কামিনীর ওই গানই স্মরণ।

মা-বাপের উভয়ের এই গুণ উত্তরাধিকারসূত্রে কমলিনীর ছিল। সঙ্গীতে সে যেন একটি স্বচ্ছন্দ অধিকারে সুপ্রতিষ্ঠিত, এবং সে প্রতিষ্ঠা জন্মগত। একবার শুনিলেই গানের স্বরখানি সে আপন কণ্ঠে বসাইয়া লইত। মায়ের নিকট পাইয়াছিল সে স্বস্বর—তরুণ কণ্ঠটি ছিল তাহার সরল বাঁশের বাঁশির মত স্বর্ভৌল, মৃদুস্বরা এবং বাপের কাছ হইতে পাইয়াছিল স্বর-জ্ঞান ও ছন্দে তাতে অধিকার।

গৃহকর্মের মধ্যে সে শাকসজ্জি ও মালতী-মাধবীর জোড়া-সতাব চাবাটিতে জল দেয়। রাঙা মাটি দিয়া ঘর-দুয়ার ও আঙিনাটি পরিপাটি মার্জনা করে আর হাসিয়া সারা হয়। চকলা মেয়েটির মুখে হাসি লাগিয়াই আছে।

ভাগ্যগুণে হরির রূপায় একটি সহায়ও তাহাদের মিলিয়া গিয়াছে। কোথা হইতে বুড়া বাউল রসিকদাস একতারা হাতে গান গাহিয়া ভিক্ষা করিতে করিতে এই গ্রামে আসিয়া কামিনীদের আখড়ার পাশেই আখড়া বাধিল। কমলিনীর বয়স তখন ছয় কি সাত। কমলিনীই তাহাকে ডাকিয়া তাহার হাত ধরিয়া নিজেদের আখড়ায় লইয়া আসিয়াছিল। বুড়ার সঙ্গে তাহাদের দেখা হইয়াছিল পথে। বুড়া বাউল গ্রামে ঢুকিয়া গান করিয়াছিল—

মধুর মধুর বংশী বাজে কোথা কোন কদমতলিতে

কোন মহাজন পারে বলিতে ?

আমি পথের মাঝে পথ হারালেম অজে চলিতে।

ওগো ললিতে ।

হায় পোড়ামন—

ভুল করিলি চোখ তুলিলি পথের ধূলা থেকে

রাই যে আমার রাড়া পায়ের ছাপ গিয়েছে এঁকে ।

আলোর ছটা চোখ ধাঁধালে চন্দ্রাবলীর কুঞ্জগলিতে ।

গ্রামের মাতব্বর মণ্ডল চাঁদী মহেশ্বর নিজের দাওয়ায় হাঁকা টানিতেছিল আর চেঁড়ায় শনের দড়ি পাকাইতেছিল । বুড়া বাউলের মিঠা কণ্ঠস্বরের গান শুনিয়া সেই ডাকিয়া বলিল, বলিহারি বলিহারি ! ও বাবাজী ! এ যে থালা গান । বস বস । তামাক ইচ্ছে কর ।

বাউল দাওয়ায় চাপিয়া বসিয়া বলিল, ও ক্যাপা ভাত খাবি ? না—পাত পাড়লাম, পাতা সঙ্গেই আছে । বলিয়া সে হাঁকা বাহির করিল । হাসিয়া বলিল, দেন তা হলে । পরানটা তামাক-তামাক করচে ।

কঙ্কে লইয়া বেশ কয়েক টান টানিয়া বলিল, চমৎকার দেশ আপনাদের বাবা । অজয়ের তীয় ।

মহেশ বলিল, ই্যা, মাটি ভাল । অজয়ের পলিতে সোনা ফলে । বুয়েচ না বাবাজী, আলু যা হয়, সে তোমার ওল বললে ভুল হবে না । ইয়া বড় ।

বাউল বলিল, তা ই্যা বাবা, অজয়ের জলের শব্দে রাত বিরেতে এখনও শোনা যায়, বাঁশি, বাঁশির স্বর ?

মহেশ বলিল, বাঁশি ? ঘাড় নাড়িয়া হাসিয়া বলিল, মহতের কথা মহতে বোঝে । মেঘের ডাকে ময়ূর নরচ, গেরস্ত তাকায় ফুটো চালের পানে । বাবুরা সর্বেফুল দেখে মুছা যায়, আমাদের ক্ষেতে সর্বেফুল দেখে সাত মণ তেলের কথা ভাবি—চোখের সামনে রাধা নাচে । ও বোবার গায়েন কালায় বোঝে, ঢেঁকির নাচন ঘোড়ায় বোঝে ; বাঁশি শুনে রাই উদাদী, জটিলে কুটিলের হৃদকম্প । বুয়েচ বাবা—লোকে বলে বাজত—কেউ বলে আজও বাজে, তা আমি শুনি নি । বাবা, আমি শুনি বর্ষায় অজয়ের জল ডাকে—থাবং থাবং থাবং, জমি থাব, ঘর থাব, গেরাম থাব । আমি তখন বলি—থামং থামং থামং । শীতের সময় দরজা-জানালা বন্ধ করে লেপ মুড়ি দিয়ে শুয়ে এক ঘুমে রাত কাবার ; দিনে ধান কাটি, ধান পিটি—ধুপধুপ শব্দে ; অজয়ের কথা মনেই থাকে না ।

শুনিয়া বাউল হাসিয়া গড়াইয়া পড়িল, বলিহারি বলিহারি ! মোড়ল মশায়, আপনার রসের ভাণ্ডার অক্ষয় হোক । আপনি আনন্দময় পুরুষ গো !

মহেশ মণ্ডল খুশী হইয়া আর একবার তামাক সাজিয়া খাইয়াছিল, খাওয়াইয়াছিল । এবং এবার সে জিজ্ঞাসা করিয়াছিল, বাবাজীর নাম কি ?

বাউলও ওই সুরে স্বর মিলাইয়া বলিয়াছিল, কানা ছেলের নাম পঙ্কলোচন—রসময় অনেক দূর, পঙ্করসে ডুবে রইলাম, বাপ-মা নাম দিয়েছেন রসিকদাস ।

ঘর কোথা গো ? ঘাবে কোথা ?

ঘরের ঠিকানা বাউলের নাই বাবা, পথেই ঘুরছি; যাব ত্রজে তা পথের মাঝে পথ হারিয়েছি।

ঠিক এই সময়েই ওই কমলিনীর সঙ্গে দেখা। মহেশ মোড়লের ছেলে রঞ্জনদের সঙ্গে খেলা সারিয়া সে তখন ঘরে কিরিতেছিল। কচি মুখে রসকলি ও খাটো চুলে বাঁধা চূড়া ঝুঁটি দেখিয়া বাউল বলিয়াছিল, এ যে দেখি খাসা বটুম্বী! কি নাম গো তোমার?

কমলিনী বলিয়াছিল, আমি কমল।

বাউল বলিয়াছিল, শুধু কমল ছাড়া শোনায়, তুমি রাইকমল।

মহেশ মোড়ল একটু রূপণ মাহুঘ, বেলা দুপহর হইয়া আসিয়াছে, বাউলকে সে নিজে ডাকিয়া বসাইয়াছে; এখন থাইতে দেওয়ার হাস্কামাটা অনায়াসে ওই ছোট মেয়েটার ঘাড়ে চাপাইয়া দিলে কোন প্রতিবাদ হইবে না বুঝিয়া বলিয়া দিল, নিয়ে যা। কমলি, বাবাজীকে তোদের আখড়ায় নিয়ে যা। বেলা হয়েছে। আমাদের আমিষের হেন্সেল। তোদের ঘরে নিয়ে যা।

কমল হাত ধরিয়া বলিয়াছিল, এস বাবাজী।

*

*

*

সেই অবধি বুড়া এইখানেই থাকিয়া গিয়াছে। মা-বিতীদের আখড়ার পাশে আর-একটা আখড়া বাঁধিয়াছে। গ্রামের ছেলেছোকরাদের তামাক খাইবার আড্ডা। বুড়াদের বড় তামাকের মজলিস। ভাবুকের কীর্তনের আসর। কামিনী-কমলিনীর ভরসা স্থল।

আধবুড়া বাউল রসিকদাস কমলিনাকে গান শিখাইতে আসে। সে ডাকে—রাইকমল!

কমলিনী অমনই হাসিয়া সারা, বলে, কি গো বগ-বাবাজী?

বাউল রসিকদাসের শরীরের গঠনভঙ্গী কেমন অতিরিক্ত লম্বা রকমের। বকের মত লম্বা গলা, অমনই লম্বা হাত-পা। ছোট কমল বড় হইয়া মুখরা হইয়াছে। ওই বাউলই তাহাকে মুখরা করিয়া তুলিয়াছে। সে এখন বাউলেরই নামকরণ করিয়াছে বগ-বাবাজী।

কমলিনীর তাহাকে দেখিলেই হাসি পায়। সে তাহার নাম দিয়াছে—বগ-বাবাজী। রসিকদাস রাগ করে না, সে হাসে।

কমলিনী বলে, মরে যাই বগ-বাবাজীর শখ দেখে। দাড়িতে আবার বিহুনি পাকানো হয়েছে! পাকা চুলে মাথায় আবার রাখাল-চূড়ো! ওখানে একটি কাকের পাখা গোঁজ, ওগো ও বগ-বাবাজী!

বলিয়া আবার সে হাসে।

মা কামিনী রুগ্ন হইয়া উঠে—সে রুঢ় ভাষায় তিরস্কার করে, মর মর মুখপুড়ী, চোদ্দ বছরের ধাড়ী—

রসিক হাসিয়া বাধা দিয়া বলে, না না, বোকে না। ও আনন্দময়ী—রাইকমল

সায় পাইয়া কমলিনী জোর দিয়া বলে, বল তো বগ-বাবাজী!

বলিয়াই মুখে কাপড় দিয়া হাসিতে হাসিতে এলাইয়া পড়ে।

‘কাঁট দিতে দিতে কাঁটাগাছটা উচাইয়া মা বলে, ফের! দেখবি?’

বাহিরে বেড়ার ওপাশে পথের উপর হইতে মহেশ মোড়লের ছেলে রঞ্জন ডাকে, কমলি! অমনই কমলি পলায়নের ভান করিয়া ছুটিতে শুরু করে। বলে, মার, তোর নিজের মুখে মার। থাকল তোর গান শেখা, চললাম আমি কুল খেতে।

রাগে গরগর করিতে করিতে মা বলে, বেরো—একেবারে বেরো।

মেয়ে মায়ের তিরস্কার আমলেই আনে না, চলিয়া যায়। মা পিছন পিছন বাহির-দরজা পর্যন্ত আসিয়া উচ্চকণ্ঠে বলে, কমলি, ফিরে আয় বলছি—ফিরে আয়। এত বড় মেয়ে, লোকে বলবে কি—সে জ্ঞান করিস? বলি, ওগো ও কুলখাগী কমলি!

রসিকদাস হাসে। তাহার হাসি দেখিয়া কামিনীর অঙ্গ জলিয়া যায়। সে ঝঙ্কার দিয়া বলে, কি যে হাস মহাস্ত? তোমার হাসি আসছে তো!

রসিকদাস কোন উত্তর করে না। সে আপন মনে লম্বা দাড়িতে বিছুনি পাকায়। কামিনীও গৃহমার্জনা করিতে করিতে কন্যাকেই তিরস্কার করে। গান শিখাইবার লোকের অভাবে রসিকদাস আপনার আখড়ার পথ ধরে। পথে নিজেই গুনগুন করিয়া গান ধরিয়া দেয়—

ফুটল রাইকমলিনী বসল কৃষ্ণভ্রমর এসে।

লোকে বলে নানা কথা তাতে তার কি যায় আসে?

কুল তো কমল চায় না বৃন্দে মাঝজলেই হাসে ভাসে।

বাউল পথ চলে আর মাথা নাড়ে। এই কিশোর-কিশোরীর লীলার মধ্যে সে দেখে ব্রজের খেলা।

রঞ্জন—মহেশ্বর মোড়লের ছেলে। কমলিনীর চেয়ে সে বৎসর তিন-চারেকের বড়। কমলিনীর সে খেলাঘরের বর—সে তাহার কিল মারিবার গোলাই। ধর্মতলার প্রকাণ্ড বট-গাছটার তলদেশে এই গ্রামের ছেলেদের পুরুষাছুক্রমিক খেলাঘর। গাছটিকে বেঁধন করিয়া ছোট ছোট খেলাঘরে শিশুকল্পনার গ্রাম এই বসতিস্থটির দিন হইতে নিত্যনিয়মিত গড়িয়া উঠিয়াছে। বটগাছের উঁচু উঁচু শিকড়গুলি হইত তাহাদের তক্তাপোশ। পথের ধূলা গায়ে বেচ্ছামত মাখিয়া বালক রঞ্জন আসিয়া সেই তক্তাপোশের উপর বসিয়া বিজ্ঞ চাখীর মত বলিত, বউ, ও বউ, একবার তামাক সাজ তো। আর খানিক বাতাস। আঃ, যে রোদ—আর চাখের যে ষাটুনি!

কমলি তখন সাত-আট বছরের। সে প্রগল্ভা বধূর মত ঝঙ্কার দিয়া উঠিত, আ মরে যাই! গরজ দেখে অঙ্গ আমার জুড়িয়ে গেল! আমার বলে কত কাজ বাকি, সেসব ফেলে আমি এখন তামাক সাজি, বাতাস করি! লবাব নাকি তুমি? তামাক নিজে সেজে নিজে খাও।

রঞ্জন হুঙ্কার দিয়া উঠিত, এই ঠাখ—দোদে-পোড়া চাখা আর আগুনে তপ্ত ফাল এ দুইই সমান। বুকে কথা বলিস কিন্তু নইলে দেবো তোর ধূমসো গতর ভেঙে।

অমনই কমলি খেলা ছাড়িয়া রঞ্জনের কাছে রোষভরে আগাইয়া আসিত। তাহার

নাকের কাছে পিঠ উচাইয়া দিয়া বলিত, কই, দে—দে দেখি একবার । ওঃ—গতর ভেঙে দেবৈন, ও রে আমার কে রে !

খেলাঘরের প্রতিবেশীর দল কোতুকে খিলখিল করিয়া হাসিত । দারুণ অপमानে রুবিয়া, রঞ্জন কমলির মোটা বিঁড়েখোঁপা ধরিয়া গদাগদ কিল বসাইয়া দিত । টান মারিয়া কমলি চুলের গোছা মুক্ত করিয়া লইত । কয়েকগাছা চুল রঞ্জনের হাতেই থাকিয়া যাইত । তারপর ক্ষিপ্তার মত সে রঞ্জনের চোখে মুখে ধূলা ছিটাইয়া দিয়া রোষ-রোদনে ইঁপাইতে ইঁপাইতে বলিত, কেন, কেন, মারবি কেন তুই ? আমাকে মারবার তুই কে ?

ননদিনী কাছ প্রবীণার মত আসিয়া বলিত, এটি কিন্তু দাদা, তোমার ভারি অত্মায় !

ও পাড়ার ভোলা কমলির প্রতি দরদ দেখাইয়া বলিত, খেলতে এসে মারবি কেন রে রঞ্জন ?

রঞ্জনের আর সহ্য হইত না । সে বলিত, নাঃ, মারবে না ! পরিবারের মুখ-ঝামটা খেতে হবে সোয়ামী হয়ে ?

কমলি ফুলিতে-ফুলিতে গর্জিয়া উঠিত, ওরে আমার সোয়ামী রে ! বলে যে সেই, ভাত দেওয়ার ভাতার না, কিল মারবার গোসাঁই । যা যা, আমি তোর বউ হব না । তোর সঙ্গে আড়ি—আড়ি—আড়ি ।

এমনই করিয়া খেলা ভাঙিত । পরদিন প্রভাতে আবার সেখানে ছেলেদের কলরব জাগিয়া উঠিত । সেদিন প্রথমই কমলির হাত ধরিত ভোলা । সে বলিত, আজ ভাই তোমাতে আমাতে, বেশ—

কমলি আড়চোখে তাকাইয়া দেখিত, ওপাশে রঞ্জন দাঁড়াইয়া আছে । মাঝের পাড়ার বৈষ্ণবদের মেয়ে পরী আগাইয়া অ্যুসিত । রঞ্জনের হাত ধরিয়া বলিত, তোতে আমাতে, বেশ ভাই রঞ্জন ।

পরীও কমলির সমবয়সী ; কিন্তু কমলির সহিত তাহার যেন একটা শত্রুতা আছে । পরীদের বাড়ি রঞ্জনদের বাড়ির পাশেই । রঞ্জনকে লইয়া কমলির সঙ্গে তাহার খুনসুটি লাগিয়াই আছে । রঞ্জন বলিত, বেশ ।

কমলি ভোলাকে বলিত, আমি ভাই বিধবা । একা খেলব ।

দুই-তিন দিন পর একদিন পরীকে খেদাইয়া দিয়া রঞ্জন মাথা নাড়িয়া বলিত, বিয়েই আমি করব না ।

ব্যঙ্গভরে ভোলা হাসিয়া বলিত, গোসাঁইঠাকুর গো !

ভোলার হাত ছাড়াইয়া কমলি অগ্রসর হইত । ভোলা বলিত, আবার মার খাবি কমলি ?

কমলি বলিত, তা ভাই মারে তো আর কি করব বল ? বর যখন ওকে একবার বলেছি, তখন ঘর ওর করতেই হবে । তা বলে তো দুবার বিয়ে হয় না মেয়েদের ? অ্যা, নাকি বল ভাই ?—বলিয়া সে রঞ্জনের খেলাঘরে আসিয়া উঠিত । আলর জাঁকাইয়া বলিয়া সে

করম্যশ করিত পাকা গিল্লীটির মতই, আ আমার কপাল ! হুন নাই, বলি ভেল নাই, সেসব কি আমি রোজগার করে আনব ?

রঞ্জন কথা কহিত না, উদাসভাবে বসিয়া থাকিত। কমলি হাসিয়া বলিত ভোলাকে, সতি ভোলা, মোড়ল আমাদের গোসাঁই হয়েছেন। তারপর কিসকিস করিয়া রঞ্জনের কাছে বলিত, কোন্ গোসাঁই গো ? আমাকে কিল মারবার গোসাঁই নাকি ?—বলিয়াই খিলখিল করিয়া হাসি।

রঞ্জন অমনই কিক করিয়া হাসিয়া ফেলিত। খেলার মধ্যে সকলের অগোচরে রঞ্জন কিসকিস করিয়া বলিত, আর মারব না বউ, কালীর দিব্যি। কমলি আবার হাসিত।

এসব পুরানো কথা। কিন্তু সে কথা মনে করিয়া এখনও কমলি হাসে। রঞ্জন একটু যেন লজ্জা পায়, পাইবারই কথা। রঞ্জন আজ তরুণ কিশোর। তাহার চোখের কোণে আজ শীতাস্তের নবকিশলয়ের মত ঈষৎ রক্তিমভা দেখা দিয়াছে। সরল কোমল দেহে পেশীগুলি পরিপুষ্টরূপে প্রকট হইয়া দেখা দিতে শুরু করিয়াছে। আর সেই চপলা মুখের কমলি আজ চৌদ্দ বছরের কমলিনী। আজও দেহে তার কুল ফোটে নাই কিন্তু তাহার চঞ্চল চরণের ঈষৎ সঙ্কুচিত গতিতে, রঙের চিকণতায়, নয়নের চট্টল ভঙ্গিমায়, গালের কিকা লালিমাভায় মুকুলের বার্তা ঘোষণা করিয়াছে। তবুও তাহার চাপলোর অন্ত নাই। বয়সের ধর্ম তাহার স্বভাব-ধর্মের কাছে পরাজয় মানিয়াছে। এখন ঈষৎ চাপা চপল সে।

তাই কুলের ভয় দেখানো সত্ত্বেও সে রঞ্জনের সঙ্গে কুল খাইতে যায়, মায়ের ঝাঁটার ভয় উপেক্ষা করিয়াও রসিকদাসকে বলে ‘বগ-বাবাজী’। সে চলিয়া যায়—চাপল্যে দেহে উঠে একটা হিল্লোল—নদীর, নৃত্যপরী শ্রোতের মত। কথা বলিতে কথার আগে উপচিয়া পড়ে হাসি স্বরনাধারার ছলছল-ধ্বনির মত।

সেদিন রঞ্জন গাছে চড়িয়া কুল ঝরাইতেছিল,—তলায় ছুটিয়া ছুটিয়া কমলিনী সেগুলি কুড়াইয়া আঁচলে তুলিতেছিল। একটা কুলে কামড় মারিয়া কমলিনী বলিয়া উঠিল, আহা কি মিষ্টি রে !

গাছের উপর হইতে ঝপ করিয়া রঞ্জন ঝাঁপ দিয়া মাটিতে পড়িয়া বলিল, দে, দে ভাই, আমাকে আধখানা দে।

আধ-খাওয়া কুলটা কমলি তাড়াতাড়ি রঞ্জনের মুখে পুরিয়া দিল। কুলটায় পোকা ধরিয়াছিল। বিস্বাদে রঞ্জন টাকরায় টোকা মারিয়া বলিল, বাবাঃ।

কমলি খিলখিল করিয়া হাসিয়া উঠিল। বলিল, কেমন রে ?

রঞ্জন তখনও টোকা মারিতেছিল, তবু সে তা স্বীকার করিল না, বলিল, খুব মিষ্টি—তোর এঁটো যে।

হাততালি দিয়া কমলি হাসিতে হাসিতে বলিল, বোল হরিবোল ! আমার এঁটো টকো কুল মিষ্টি হয়ে গেল ! আমার মুখে চিনি আছে নাকি ?

রঞ্জন বলিল, হুঁ, তুইই আমার চিনি।

কমলি কৌতুকে হাসিয়া এলাইয়া পড়িল। রঞ্জনের এই ধারার তোষামোদ তাহার ভারী ভাল লাগে। তারপর বলিল, তোর এঁটো আমার কেমন লাগে জানিস ?

কেমন ?

ঝাল—ঠিক লঙ্কার মত। তুই আমার লঙ্কা।

বিষমভাবে রঞ্জন বলিল, যার যেমন ভালবাসা।

কমলি তাহার বিষমতা আমলেই আনিল না। কৌতুকভরে সে বাণের পর বাণ নিক্ষেপ করিয়া চলিয়াছিল। বলিল, তা তো হল, কিন্তু তুই আমার এঁটো খেলি যে ? তোর যে জাত গেল।

চকিতভাবে এদিক ওদিক দেখিয়া লইয়া রঞ্জন বলিল, কেউ তো দেখে নাই ! তারপর অকস্মাৎ বলিয়া উঠিল, গেল তো গেলই। ভেক নিয়ে আমি বোষ্টম হব। তোকে বিয়ে করব।

কমলি বলিয়া উঠিল, যাঃ, তোকে কে বিয়ে করবে ? আকাট চাখা !

রঞ্জন খপ করিয়া তাহার হাতটা চাপিয়া ধরিল, বলিল, আমাকে বিয়ে করিস তো আমি জাত দিই কমলি।

কমলি বলিল, দূর, ছাড়।

রঞ্জন বলিল, বল—নইলে ছাড়ব না। কমলির হাতখানা সে আরও জোরে চাপিয়া ধরিল।

কাতরস্বরে কমলি বলিয়া উঠিল, উঃ—উঃ, যা—যা আছে। অপ্রস্তুত হইয়া রঞ্জন হাত ছাড়িয়া দিল। কমলির কলহাস্তে নির্জনতার স্বপ্নভঙ্গ হইল। সে ছুটিয়া পলায়ন করিতে করিতে বলিয়া গেল, চাষার বুদ্ধির ধার কেমন ? না, ভোঁতা লাঙ্গলের ধার যেমন।

রঞ্জন অতুসরণ করিল না। সে পলায়নপরা কমলির গমনপথের দিকে মুগ্ধ দৃষ্টিতে চাহিয়া দাঁড়াইয়া রহিল।

হঠাৎ সে চমকিয়া উঠিল—তাহাদের সাদা বলদটা কেমন করিয়া এখানে আসিল ?

পিছন হইতে ডাক আসিল—হ-হ-হ। তাহার বাপ মহেশ্বর মোড়লের গলা। রঞ্জন মুহূর্তে দৌড় দিল।

তুই

রঞ্জনের মা কমলিকে বড় ভালবাসিত। তাহার নাম দিয়াছিল—হাস্তময়ী। রঞ্জনকে দিতে গিয়া আখখানা মগুা ভাঙিয়া সে কমলির হাতে দিত। কিন্তু সেদিন রঞ্জন যখন কমলির এঁটো কুল খাইয়া বাড়ি ফিরিল, তখন সে বলিল, রান্ধুসী রান্ধুসী, মায়াবিনী গো, ওরা ছত্রিশ জেতে বোষ্টম—ওদের কাজই এই। মুড়োবাঁটা মারি আমি হারামজাদীর মুখে।

কুল-খাওয়ার ঘটনাটা দৈবক্রমে খোদ মহেশ্বর মোড়লের—রঞ্জনের বাপের নজরে পড়িয়াছিল। মহেশ্বরের বলদটা অকারণে ছুটিয়া আসে নাই। গরু চরাইতে গিয়াছিল সে এই কুলগাছটার

পাটগই একটা জল্লেব আড়ালে। হঠাৎ ব্যাপারটা দেখিয়া অকারণে সে বলহুটার পিঠে সজোরে পাচন লাঠির এক ঘা বসাইয়া দিয়াছিল। সমস্ত দেখিয়া শুনিয়া ভয়ে সে শিহরিয়া উঠিল। তার জ্বর নিকটে সমস্ত প্রকাশ না করিয়া পারিল না। রক্তনের মা গালে হাত দিয়া বিবম বিব্বয়ে লম্বা টানা স্বরে বলিয়া উঠিল, ওগো মা, কোথায় যাব গো, জাত মান ছুই গেল যে! রাক্ষসী হারামজাদী কি নচ্ছার গো, মুড়োঝাঁটা মার মুখে। আর সে হারামজাদা গেল কোথা? ধরে গোবর খাওয়াও তুমি।

মহেশ্বর বাধা দিয়া বলিল, চুপ চুপ, চোঁচিয়ে গাঁগোল করিস না। জ্ঞাতিতে শুনে টেনে ছাড়ানো দায় হবে, পতিত করবে। ধমক খাইয়া রক্তনের মা তখনকার মত চুপ করিল। কিন্তু রক্তন বাড়িতে পদার্পণ করিবামাত্র নথ নাড়িয়া, ঘন ঘন ভুরু তুলিয়া সে বলিল, বলি, ওরে ও মুখ-পোড়া, তোর রকম কী বল দেখি?

রক্তনও সমানে তাল দিয়া বলিল, খেতে দাও বলছি। গাল খেয়ে পেট ভরবে না আমার। গাল খেতে আসি নাই আমি।

রাক্ষার দিয়া মা বলিয়া উঠিল, দোব—ছাই দোব মুখে তোমার। কমলির এঁটো কুল খেয়ে পেট ভরে নাই তোমার, শরম-নাশা জাত-খেগো!

সাপের মাথায় যেন ঈশের মূল পড়িল। উদ্ধত রক্তনের রক্তচক্ষু নত হইয়া মাটির উপর নিবন্ধ হইয়া গেল। মহেশ্বর মোড়ল আড়ালেই কোথায় ছিল। সে এবার সম্মুখে আসিয়া চাপা গলায় গর্জন করিয়া বলিল, হয়ে মরলি না কেন তুই? মুখ হাসালি আমার তুই! জাত নাশ করলি!

রক্তন নীরব হইয়া রহিল। তাহার নীরবতায় বাপের রাগ অকারণে বাড়িয়া গেল, সে বলিল, চুপ করে আছিস যে? কথার জবাব দে।

কিছুক্ষণ পর আবার সে গর্জিয়া উঠিল, তবু কথার জবাব দেয় না। আচ্ছা, আমিও তেমন লোক নই, তা জানো তুমি। ত্যাগ্যপুত্র করব আমি তোমাকে—বাড়ি থেকে দূর করে দোব। কিন্তু জাত আমি দোব না।

তারপর আদেশের স্বরে বলিল, খবরদার, আর যাবে না ওদের বাড়ি। মা-বিটীদের ত্রিসীমেনা মাড়াবে না আর। এই বলে দিলাম তোকে—হ্যাঁ।

আশ্ফালন করিয়া মহেশ্বর চলিয়া গেল। রক্তন নীরবে নত দৃষ্টিতে সেইখানেই বসিয়া রহিল।

স্বরিয়া কিরিয়া মা আসিয়া এবার শাস্তনা দিয়া বলিল, মাঘ মাসেই বিয়ে দেব তোর। এমন বউ আনব, দেখবি কমলি কোথায় লাগে!

রক্তন নীরবেই বলিয়া রহিল। মুড়ি বাহির করিতে করিতে মা ঘর হইতে বলিল, বলে যে সেই—

বোঁচে থাকুক চূড়া বাঁশি
রাই হেন কত মিলবে দাসী।

স্বন্দর মেয়ের আবার ভাবনা !

রঞ্জন বলিয়া উঠিল, না ।

মায়ের হাতের কাজ বন্ধ হইয়া গেল । সবিস্ময়ে বলিল, কি 'না' ?

বিয়ে আমি করব না ।

প্রবলতর বিস্ময়ে আশঙ্কায় মা প্রশ্ন করিয়া বলিল, কি করবি তবে ?

রঞ্জন উঠিয়া পড়িল । আঙিনাটা অতিক্রম করিতে করিতে সে বলিয়া গেল, বোষ্টম হব আমি ।

বিস্ময়ে হতবাক রঞ্জনের মা কিছুক্ষণ পর সখিৎ পাইয়া ডাকিল স্বামীকে, ওগো মোড়ল, ও মোড়ল !

রঞ্জন আসিয়া উঠিল বসকুঞ্জে । রসিকদাসের আখড়ার ওই নাম । বসকুঞ্জ এ গ্রামের সকলেরই সুপরিচিত স্থান । ছেলেদের সেখানে মিলিত তামাক, বড়োদের মিলিত গাঁজা । কাহারও মিলিত বিচিত্র আকারের বাঁশের ছঁকা, কাহারও বা মাপের মত আঁকাবঁকা নল ; কাহারও লতাবেটনীর জোড়া ডালের ছড়ি—ঠিক যেন দুইটি সাপে পরস্পরকে জড়াইয়া আছে । এই রকম বহু উদ্ভট স্বন্দর সামগ্রী আবিষ্কার করিয়া রসিকদাস সকলের মনোরঞ্জন করিত ।

সেদিন রসিকদাস স্নানের পর দাড়ির বিজ্ঞাস করিতেছিল, কাঁচাপাকা দাড়ির মধ্যে আঙুল চালাইয়া ফাঁস ভাঙিতেছিল । রঞ্জন আসিয়া ডাকিল, মহাস্ত !

রসিক বলিল, রাইকমল-রঞ্জন যে হে ! এস এস ।

রঞ্জনকে সে ওই নামে ডাকে । রঞ্জন অনেক কথা মনে মনে ফাঁদিয়া আসিয়াছিল । কিন্তু সব কেমন গোলমাল হইয়া গেল । যেটুকু মনে ছিল, সেটুকুও লজ্জায় বলিতে পারিল না ।

রসিকদাসই প্রশ্ন করিল, কি, তামাক খেতে হবে নাকি ? ভাত খেয়েছ ?

রঞ্জন একটা স্ফুযোগ পাইল, সে বলিল, না । তোমার এখানেই থাব ।

মহাস্ত রসিকতা করিয়া বলিল, জাত যাবে যে হে !

ফস করিয়া রঞ্জন বলিয়া ফেলিল, বোষ্টম হব আমি মহাস্ত ।

মহাস্ত তাহার মুখের দিকে চাহিয়া ঈষৎ হাসিল । তারপর উপভোগের ভঙ্গিতে ঘাড় নাড়িতে নাড়িতে গুনগুন করিয়া গান ধরিয়া দিল—

জাতি কুল মান সব ঘুচাইয়া চরণে হইহু দাসী

রঞ্জন লজ্জায় রাজা হইয়া ঈষৎ বিরক্তভয়ে কহিল, ধেং !•ধান ভানতে শিবের গীত ! তোমার হল কি মহাস্ত ?

মুহু হাসিতে হাসিতে মহাস্ত ঘাড় নাড়িয়া বলিল, রসিকের রস এসেছে ।

আগ্নও বিরক্ত হইয়া রঞ্জন বলিল, তা তুমি কি বলছ বল ? আমাকে ভেক দেবে তুমি ?

নির্বিকারভাবে রসিকদাস বলিল, রাইকমল বলে তো ঘোব ।

কষ্ট হইয়া রঞ্জন বলিল, কেন ? কমলি কি তোমার হাকিম নাকি ?

হাসিতে হাসিতে ঘাড় নাড়িয়া রসিক বলিল, হুঁ ।

তবু যদি বগ-বাবাজী না বলত সে ! রঞ্জন ক্রোধভরে উঠিয়া পড়িল ।

রসিকদাস তখনও তেমনই হাসিতেছিল, সে কথা कहিল না । রঞ্জন বলিল, বেশ, চললাম আমি তারই কাছে ।

রসিকদাস গুনগুন করিতে করিতে দাড়িতে বিহুনি পাকাইতে আরম্ভ করিল ।

কমলি তখন আখড়ায় জোড়া-লতার ছায়াতলে বসিয়া সেই কুলগুলি বাছিতেছিল, মাঝে মাঝে রঞ্জনকে প্রতারণা করার কোঁতুক স্বরণ করিয়া আপনার মনেই সে হাসিয়া উঠিতেছিল । ও-পাড়ার ভোলা আসিয়া কমলির নিকটে বসিয়া বলিল, কমলি !

স্বরথানি তরঙ্গায়িত করিয়া অনাবশ্যক দীর্ঘ উচ্চারণে কমলি উত্তর দিল, কি !

ভোলা বলিল; এই এলাম একবার ।

নিষ্ঠুর ব্যঞ্জে ভোলার স্বরভঙ্গী অম্লকরণ করিয়া কমলি বলিল, বেশ, যাও একবার । সে ব্যঞ্জে ভোলা এতটুকু হইয়া গেল । হাঁটু দুইটি জড়াইয়া ধরিয়া সে নীরবে বসিয়া রহিল । কমলিও কুল বাছা রাখিয়া ভোলার ভঙ্গী অম্লকরণ করিয়া বসিয়া খিলখিল করিয়া হাসিয়া উঠিল । তারপর বলিল, বাদরের মত বসলি যে উপু হয়ে ? ভোলার লজ্জার আর পরিসীমা ছিল না । সে পলায়নের অজুহাত খুঁজিতেছিল । কমলি বলিল, আমার কুলগুলো বেছে দে না ভাই । আমি একটু বসি ।

ভোলা হাঁপ ছাড়িয়া বাচিল । সে তাড়াতাড়ি কুল বাছিতে বসিল ।

বিচিত্র খেয়ালী চপলা মেয়েটি অকস্মাৎ ছলিয়া ছলিয়া আরম্ভ করিল—

এক যে ছিল রাজা তিনি খান খাজা

তঁার যে রাণী তিনি খান ফেনী

তঁার যে পুত হাৰাগোবা ভূত

মুখে খায় সর গালে খায়—

সঙ্গে সঙ্গে সে ঝাঁ হাতে চড় উঠাইয়াছিল । কিন্তু ভোলা চট করিয়া তাহার হাতখানা ধরিয়া ফেলিল । কমলির কলকণ্ঠে ধ্বনিত হইয়া উঠিল জলতরঙ্গের মত হাসি ।

ভোলা বলিল, কমলি ! স্বর তাহার কাণিতেছিল ।

হাতখানি আকর্ষণ করিয়া কমলি বলিল, ছাড় ভোলা, ছাড় বলছি ।

ভোলা বলিল, না ।

কমলি মুক্ত ডান হাতে এক মুঠা কুল লইয়া ভোলার মুখের উপর ছুঁড়িয়া মারিয়া বলিল । পাকা কুলগুলি ছিতরাইয়া চটচটে শীসে ভোলার মুখখানা ভরিয়া গেল । কমলির হাত ছাড়িয়া ভোলা মুখ মুছিতে ব্যস্ত হইয়া পড়িল । কমলি সেই হাসি হাসিয়া মাটিতে লুটাইয়া পড়িতেছিল ।

ঠিক এই সময়টিতেই বাহির হইতে ডাক আসিল, চিনি !

ভোলা হুঁবল মাফুয, সে রঞ্জনকে বড় ভয় করিত । ডাক শুনিয়া সে চমকাইয়া উঠিল । তাড়া-তাড়ি উঠিয়া সে বাহিরের দিকে ছুটিল । প্রবল কোঁতুকে উচ্ছ্বাস কমলি তাহাকে ডাকিল, যাস না ভোলা, যাস না । ভয় কিসের রে ?—বলিতে বলিতে সে বাহিরের দরজায় আসিয়া দেখিল, এ মুখে পলাইতেছে ভোলা, বিপরীত মুখে দ্রুতগমনে চলিয়াছে রঞ্জন ।

কমলি ডাকিল, লক্ষা, লক্ষা হে !

রঞ্জন উত্তর দিল না, একবার ফিরিয়া চাহিল না পর্যন্ত ।

কমলি বুঝিল, রঞ্জন রাগ করিয়াছে, ভোলার সঙ্গে কথা বলিলেই রঞ্জনের মুখ ভার হয়, আজ তো ভোলার সঙ্গে বসিয়া সে হাসিতেছিল । কিন্তু এতটাও তাহার সহ্য হইল না । ভোলাকে ধরিয়া দু-বা দিলেই তো হইত ! তা না, উল্টা রাগ করিয়া যাওয়া হইতেছে ! সে উচ্চকণ্ঠে বলিল, আচ্ছা—আচ্ছা এই হল । মনে থাকে যেন ।

বলিয়াই সে ফিরিল ; দুই পা ফিরিয়াই আবার সে দরজার মুখে আগাইয়া আসিয়া বলিল, আমি কারও কেনা ঝাঁদী নই ।

বলিয়াই সে এদিকে মুখ ফিরাইয়া ভোলাকে ডাকিল, ভোলা, ভোলা ! কিন্তু পথের বাঁকের অন্তরালে ভোলা তখন অদৃশ্য হইয়া গিয়াছে । আখড়ার মধ্যে ফিরিয়া কমলি আবার কুল বাছা শুরু করিল । একটা কুল হাতে লইয়া সে আপন মনেই বলিয়া গেল, ও-রে ! চলে গেলি—গেলিই । আমার তাতে বয়েই গেল । একেই বলে, আলুনো রাগ । তা রাগ করলি—করলি, নিজের ঘরে ভাত বেশি করে খাবি ।

সে হাসিতে চেষ্টা করিল, কিন্তু হাসির বদলে চোখে আসিল জল । অভিমানভরে সে পটপট করিয়া কুলের বোটা ছাড়াইয়া চলিল ।

কতক্ষণ পর কে জানে, কমলির হাঁশ ছিল না ।

কামিনী ভিক্ষা হইতে ফিরিয়া চারিদিকে একবার দৃষ্টি ব্লাইয়া লইয়া তিরুস্বরে ভৎসনা করিয়া কমলিকে বলিল, ও—মাগো ! এখনও উনোনের মুখে কাঠ পড়ে নাই, জলের কলসী ঢনঢন করছে ! একি ? বলি, ই্যা পো কমলি, তোর রীতকরণের রকম কি বল দেখি ?

কমলি অকারণে রিদ্রোহ করিয়া উঠিল, ঝঙ্কার দিয়া সে বলিল, পারব না, আমি পারব না ; খেতে না হয় নাই দেবে ।—বলিতে বলিতে সে কাঁদিয়া ফেলিল, বলিল, শুধুই বকুনি, শুধুই বকুনি । যার তার রাগ আমার ওপর । কেন, আমি কার কি করেছি !

কামিনী আশ্চর্য হইয়া গেল । সে তো এমন কিছু বলে নাই । তবু আদরিণী মেয়েটির কারা তাহার সহ্য হইল না । মেয়ের পিঠে সম্মুখে হাত ব্লাইয়া দিয়া সে বলিল, কিছু তো বলি নাই আমি তোকে মা । বলেছি, বুড়ো মাফুয ভেতে-পুড়ে এলাম, এখন জল আনা, কাঠ যোগাড় করা—

চোখের জল চোখে তখনও ছলছল করিতেছিল, কমলির মুখে অমনই হাসি দেখা দিল । বোধ হয় ঝানকটা লজ্জাও পাইল । তাড়াতাড়ি চোখের জল মুছিয়া শূন্য কলসীটা কাঁখে

তুলিয়া বলিল, জল নিয়ে আসি আমি—এলাম বলে।

মা হাসিল। ফুলের ঘা সর না তাহার কমলের!

কমলি চলিয়া যাইতেই আসিয়া প্রবেশ করিল মহেশ্বর মোড়ল—রঞ্জনর বাপ, সে যেন এই অবসরটুকুর প্রতীক্ষাতেই কোথাও দাঁড়াইয়া ছিল। একেবারেই সে কামিনীর হাত দুইটি জড়াইয়া ধরিয়া একান্ত কাকুতিভরে বলিল, কামিনী, তোরও সন্তান আছে। আমার ওই একমাত্র সন্তান। আমার সন্তান আমাকে ফিরে দে কামিনী। তোর ভাল হবে।

হাত ছাড়াইয়া লইয়া সবিস্ময়ে কামিনী প্রশ্ন করিল, কি, হল কি মোড়ল?

সমস্ত ঘটনা বর্ণনা করিয়া সজল চক্ষে মহেশ্বর বলিল, বাড়ি থেকে সে পালিয়ে এসেছে। তার মাকে বলে এসেছে, বোষ্টম হবে।

কামিনী সমস্ত শুনিয়া কিছুক্ষণ চূপ করিয়া রহিল। তারপর বলিল, এতদূর তো ভাবি নাই আমি মোড়ল। কিন্তু এখন ছাড়াছাড়ি করলে কি মেয়েরই আমার স্থখ হবে? আমাকে কি মা হয়ে সন্তানের বুকে শেল হানতে বল তুমি?

মহেশ্বর বলিল, টাকা দোব আমি, তোমার মেয়েকে কিছু জমি লিখে দোব আমি কামিনী।

বাধা দিয়া কামিনী বলিল, ছি, আমার মেয়ের কি ইজ্জত নাই মোড়ল?

মোড়ল বলিয়া উঠিল, রাম রাম রাম! সে বললে জিত খসে পড়বে আমার। কিন্তু ভেবে দেখ কামিনী, সন্তান তো আমারও। ওই একটি সন্তান।

একটু চিন্তা করিয়া কামিনী বলিল, যাও মোড়ল, আমি কমলিকে নিয়ে গাঁ থেকে চলে যাব। তুমি তোমার ছেলেকে বাগিয়ে নিও।

বিষমভাবে মহেশ্বর বলিল, গাঁ থেকে চলে যেতে তো বলি নাই, কামিনী!

কামিনী বলিল, না। মেয়ের চোখের উপর রঞ্জনকে আমি রাখব না মোড়ল। আমি ভিত্তারী, কিন্তু মেয়ে তো আমার কম আদরের নয়। আর বোষ্টম জাত, পথই তো আমাদের ঘর গো।

সহসা বাহিরে বেড়ার ধারে কি একটা শব্দ হইল। কি যেন সশব্দে পড়িয়া গেল। কামিনী ছুটিয়া বাহিরে আসিতে আসিতে বলিতেছিল, কে? কমলি? *

সত্যই কমলি বেড়ার পাশে সিন্ধুবস্ত্রে দাঁড়াইয়া কাঁপিতেছিল। তাহার কাঁথের জলভরা মাটির কলসীটা পড়িয়া ভাঙিয়া গিয়াছে।

মহেশ্বর দ্রুতপদে অপরাধীর মতই যেন পলাইয়া গেল। স্নেহকোমল স্বরে কামিনী বলিল, কলসীটা ভেঙে গেল! যাক। আয়, ভিজ্ঞে কাপড় ছেড়ে ফেল।

কমলি হাসিয়া বলিল, না, জল আনি।

মা মেয়ের মুখের দিকে চাহিয়া রহিল, মেয়েটি তাহার সেই মেয়ে কমলিই বটে, কিন্তু হাসিটি তো তাহার নয়! কমলির মুখে এ হাসি তো সাজে না! কামিনীর বুকের ভিতরটা কেমন করিয়া উঠিল।

কমলি ঘাটের দিকে ফিরিয়াছিল, কামিনী বলিল, না।

এলাম বলে।

দাঁড়া। আমিও যাব। একটা ঘড়া লইয়া কামিনী বাহির হইয়া আসিল। পুকুরে অগাধ জল। কমলির অভিমান তার চেয়েও বেশি।

পথে যাইতে যাইতে কমলি বলিল, মা!

কি রে?

সেই ভাল মা, চল, আমরা এখান থেকে চলে যাই।

কামিনী চমকিয়া উঠিল। কমলি কথাটা শুনিয়াছে। কিন্তু কথার উত্তর দিতে পারিল না। তখন তাহার চোখের কোণে রুদ্ধ অশ্রুর বান ডাকিয়াছে।

কমলি বলিল, রাসে নবদ্বীপে মেলা হয়। চল মা, তার আগেই আমরা চলে যাই। সন্তান হারানোর অনেক দুঃখ মা। নন্দরানীর দুঃখের কথা ভেবে দেখ।

কামিনী অবাক হইয়া গেল। কমলির দিকে চাহিয়া তাহার মনে হইল, কমলি যেন অকস্মাৎ কত বড় হইয়া উঠিয়াছে! মনে হইল, সে যেন তাহার সখীর সঙ্গে কথা বলিতেছে। সেও সব ভুলিয়া এই মুহূর্তটিতে অন্তরঙ্গ সখীর মতই প্রাণ করিয়া বলিল, তোর কি খুব কষ্ট হবে কমলি?

হাসিয়া কমলি বলিল, দূর!

মা বলিল, লজ্জা করিস না মা।

ধীরভাবে কমলি বলিল, না।

জল লইয়া ফিরিবার পথে কামিনী বলিল, নবদ্বীপে চাঁদের মত চাঁদ খুঁজে তোর বিয়ে দোব আমি। সে যেন এতক্ষণ মনের মত শোণী তুলিবার উপায় পাইয়াছে।

ঘরে কলসী নামাইয়াই চটুল চঞ্চল গতিতে কমলি বাহিরের পথ ধরিল। মা বলিল, কোথায় যাবি আবার?

নবদ্বীপ যেতে হবে, বলে আসি বগ-বাবাজীকে।—বলিয়া সহজভাবেই সে খিনখিল করিয়া হাসিয়া উঠিল।

কামিনী কিন্তু ওই হাসিতে সম্মত না। মেয়ে চলিয়া যাইতেই সে কাঁদিল বার বার চোখের জল মুছিল।

অজ্ঞায় তাহারই। তাহারই সাবধান হওয়া উচিত ছিল। মেয়েকে এমন ভাবে রক্তনের সঙ্গে মাথামাখি করিতে দেওয়া উচিত হয় নাই। এতটা সে ভাবে নাই; কিন্তু ভাবা উচিত ছিল। দুইটি কিশোর আর কিশোরী। বিচিত্র এর রীতি। কেমন করিয়া যে কোথায় বাঁধন পড়ে! পুরান ছাড়িলেও এ বাঁধন ছেঁড়ে না!

কমলি বাহির হইতে ডাকিল, মা, এই নাও, বললে বিশ্বাস করে না। ভূমি বল, তবে হবে। কমলি বগ-বাবাজীকে লইয়া হাজির করিয়াছে।

কামিনী বলিল, বোসো মহাশয়, বোসো। কথা আছে, শোন। কমলি, যা তো মা,

ভোর ননদিনীর বাড়ি থেকে খানিকটা ছুন নিয়ে আয় তো।

কমলিনী মাথা নাড়িয়া বলিল, ওই তো ঘরে মের দরুনো ছুন রয়েছে।

তুই যা না, ওতে হবে না।

ওতে না হলে মণ দরুনো ছুনেও তোমার মরণ হবে না। আমি পারব না।

যাও না মা, একটুখানি বেড়িয়েই এস না হয়। মায়ের কথা শুনলে বুঝি পাপ হয়?

এবার কমল হাসিয়া বলিল, আমার সামনেই বলতে পারতে মা। কমল তোমার শুকোত না। বেশ, আমি যাচ্ছি।

সে চলিল ননদিনীর বাড়ি। ননদিনী কাছ পাড়ার মোড়লদের মেয়ে, কমলির খেলাঘরের পাতানো সই ননদিনী। কাছ বাপ-মায়ের একমাত্র সন্তান, আদরে বর্ষা দাছুরীয় মত সে মুখরা। হয়তো তুল হইল, শুধু মুখরা বলিলে কাছর প্রশংসা করা হয়। মেয়েটি মুখরার উপরে অপ্রিয়-সত্য-ভাবিণী। লোকে বলে, নবজাতা কাছর মুখে তাহার মা নাকি মধুর প্রলেপ দিতে তুলিয়াছিল। পাড়ার লোকে কাছকে 'সাত কুঁড়লী'র মধ্যে আসন দিয়াছে। ঘরে বসিয়া অনেকে তাহার মাথা খায়। ননদিনী পাতানো কমলিনীর সার্থক হইয়াছে। কাছর ইহারই মধ্যে বিবাহ হইয়া গিয়াছে। গরিবের ছেলে দেখিয়া বিবাহ দিয়া তাহার বাপ জামাইকে ঘরেই রাখিয়াছে।

পথ হইতেই কাছর গলা শোনা যাইতেছিল, ও মাগো! একেই বলে—বার ধন তার ধন নয়, নেপোয় মারে দই। আমি পান খাই, আমার বাপের পরসায় খাই। তাতে তোমার চোখ চাটায় কেন বল তো?

কমলিনী বুঝিল, এ কোন্দল হইতেছে কাছর স্বামীর সঙ্গে। মা-বাপের অস্থপস্থিতির স্বযোগ পাইলেই পনেরো বছরের কাছ প্রবীণা গিন্নীর মত কোঁমর বাঁধিয়া স্বামীর সঙ্গে কোন্দল ছুড়িয়া দেয়। সে ছয়রাে ঢুকিয়াই গান ধরিয়া সাড়া দিল—

ননদিনীর কথাগুলি নিমে গিমে মালা

কালসাপিনীর জিহ্বা যেন বিধে আকাবাঁকা।

ও আমার দারুণ ননদিনী—

কাছ কোন্দল ছাড়িয়া খিলখিল শব্দে হাসিয়া উঠিল। কমল বলিল, কুঞ্জে প্রবেশ করতে পারি কুঞ্জেবরি?

কাছ বলিল, মর মর মর, ডঙ দেখে আর বাঁচি না। আয় আয়।

ভারপর তীব্রভাবে স্বামীকে বলিল, ভারি বেহায়া তুমি। যাও না বাইরে। বউ এসেছে।

কমল প্রবেশ করিয়া বলিল, আহা, থাকুকই না বেচারী, যুগল দেখে চোখ সার্থক করি।

কাছ হাসিয়া কহিল, হ্যাঁ, এক হাতে কোদাল আর হাতে কাস্তে নিয়ে ভীমকে মানাবে ভাল। বোস বোস ভাই। দিনরাত ব্যাজব্যাজ করছে, মলাম আমি। দাঁড়া, আমি পান নিয়ে আসি। দোকল নিবি, দোকল?

পান-দোকল মুখে পুরিয়া কমল বলিল, বিদায় নিতে এলাম ননদিনী।

সে কি ? রাসে কোথাও যাবি বুঝি ?

নববীপ ।

কবে ফিরবি ?

কমলিনীর চোখ সজল হইয়া উঠিল । সে স্নানকণ্ঠে বলিল, আর ফিরব না ভাই কাহ্ন ।

কাহ্ন বলিয়া উঠিল, সে কি ? কি বলছিস তুই বউ, আমি যে বুঝতে পারছি না ।

অবরুদ্ধ ক্রন্দনে কমলিনীর ঠোট দুইটি ধরধর করিয়া শুধু কাঁপিয়া উঠিল । কোন কথা তাহার ফুটিল না ।

তাহার হাত দুইটি চাপিয়া ধরিয়া কাহ্ন বলিল, কি হয়েছে ভাই বউ ? আমাকে বলবি না ?

ধীরে ধীরে সমস্ত কথা বলিয়া কমলিনী বলিল, এত সব কথা তো কোনদিন ভাবি নাই ভাই কাহ্ন । কিন্তু আজ—

কথা সে শেষ করিতে পারিল না আবার তাহার ঠোট দুইটি ধরধর করিয়া কাঁপিয়া উঠিল ।

কাহ্ন যেন অভিভূত হইয়া পড়িয়াছিল । সে নীরবে বসিয়া রহিল । একটু পরে কমলিনী মুহূ হাসিয়া বলিল, সে বলেছে, সে বিয়ে করবে না, জাত দেবে । তা ভাই, মা-বাপের ছেলে মা-বাপের থাক । আমরা এখান থেকে চলে যাই ।

কাহ্ন বলিয়া উঠিল, তা মোড়লও কেন বোষ্টম হোক না । বোষ্টম কি ছোট জাতি নাকি ? না, তারা মানুষ নয় ? আমি বলব রঞ্জনদার বাবাকে, আমি ছাড়ব না । ভারি তো, ওঃ ।

কমলিনী বলিল, না । বার বার সে ঘাড় নাড়িল—না ।

কাহ্ন একটু চিন্তা করিয়া বলিল, এক কুজ কর বউ । হোক না রঞ্জনদাদা বোষ্টম । তখন ছেলের টানে—

বাধা দিয়া কমলিনী বলিল, ছি !

কাহ্ন নীরবে নতমুখে বসিয়া রহিল । চোখ তাহার ছলছল করিতেছিল । কমল অকস্মাৎ হাসিয়া উঠিল, কাহ্নকে ঠেলা দিয়া বলিয়া উঠিল, ও মা, এ যে নতুন কাণ্ড ! বউয়ের শোকে নন্দ কাঁদে, মাছের মায়ের কাঁদা ! শোন শোন ভাই, একখানা গান শোন ।

মুহূর্ত্তে সে গান ধরিল—

ও আমার দারুণ ননদিনী ও তুই পরম সন্ধানী

যেখান যাব সেখান ঘাবি লাগাইবি লেঠা

ছাড়াতে না ছাড়ে যেন শেরাকুলের কাঁটা ।

গানের অর্থপথে কাহ্ন তাহার হাত ধরিয়া বলিল, আর দেখা হবে না ভাই বউ ?

হাসিয়া কমল বলিল, কেন হবে না ? এই তো নববীপ । নন্দাইকে নিয়ে চলে যাবি—
কেমন ?

কাহ্ন বলিল, তিন বার করে যাব আমি বছরে—রাসে, দোলে, কুলনে । আজ কিন্তু জোর

কাছে শোব ভাই রাখে ।

কমলিনী হাসিয়া বলিল, নন্দাই ?

কাহ্ন বলিল, মর ।

কমল তাহার চিবুকে হাত দিয়া আদর করিয়া বলিল, মরব । কিন্তু “সখি, না পুড়ানো বাধা
অঙ্গ, না ভাসানো জলে—”

কাহ্ন তাহার গলা জড়াইয়া ধরিয়া, হাত দিয়া মুখ বন্ধ করিয়া দিল, না না । ও গান তুই
গান না । না ।

আখড়াতে যখন সে ফিরিল, রসিকদাস তখনও বসিয়া ছিল । কমলকে দেখিয়া সে গান
বঁধিয়াছিল—

গোরার সেরা গোরানন্দ চল দেখে আসি সখি ।

কমল য়ুহু হাসিয়া বলিল, গান ভাল লাগছে না বগ-বাবাজী ।

রসিকও য়ুহু হাসিল । বলিল, তাই তা হলে হবে রাইয়ের মা । চলে চল যত শিগগির হয় ।
আমরা বোষ্টম, আমাদের প্রভুর চরণতলই ভাল ।

রাস্তায় বাহির হইয়া সে চলিতে চলিতে আবার গান ধরিল—

মধুরাতে থাকলে স্থখে আসতে তারে বলিস নে গো ।

তাতে মরণ হয় যদি মোর স্থথের মরণ জানিস সে গো ॥

ভিন

নবদীপে কামিনী বেশ জাঁকিয়া বসিল । স্বামীর আমল হইতে গোপন সঞ্চয় ছিল, তাহা
হইতেই সে বাড়িম্বর কিনিয়া আখড়া বঁধিয়া বসিল । আখড়ার জাঁকজমকেরও অভাব ছিল না ।
বৈষ্ণব মহাস্তদের নিমন্ত্রণ হয়, পরম যত্নে সাধু-সেবা হয় ; সকাল-সন্ধ্যায় আখড়ায় নাম-গানের
আসর জমিয়া উঠে ।

বলাইদাস, সুবলচাঁদ ইহারা বয়সে তরুণ । সুবল তাহার উপর সুপুঙ্খ । সর্বাঙ্গ ব্যাপিয়া
একটি পয়ম কমলীয় স্রীতে শান্ত কোমল, মানায় বড় চমৎকার । কথাগুলিও ব্রহ্মশাস্ত, নন্দ ।
রসিকদাসের তাহাকে দেখিয়া আশ মেটে না । বাউল বৈরাগী তাহার সহিত সম্পর্কও পাতাইয়া
বসিয়াছে । সুবল তাহার সখা—সুবল-সখা বলিয়া ডাকে ।

কমলি সেই তেমনই আছে । সেই যেদিন তাহারা গ্রাম ছাড়িয়া নবদীপে আসে, সেদিন
হঠাৎ সে হতটুকু বড় হইয়া গিয়াছিল, ততটুকু বাড়িয়াই সে আর বাড়ে নাই ।

অবসর সময়ে রসিকদাস কমলকে বলে, এ যে চাঁদের হাট বলিয়ে দিলে গো রাইকমল ! আ-
হা—কী সুন্দর রূপ গো ! গোরানদের দেশের রূপই আলাদা ।

কমলিনী বলিল, তা হলে গঙ্গাভীরের রূপে তুমি মজেছ বল । এইবার ভাল দেখে একটি
বোটুঝী করে বেশ বগ-বাবাজী ।

বলিয়াই সে মুখে কাপড় দিয়া হাসিতে লাগিল। কমলের পরিহাসে রস-পাগল রসিকের একটু লজ্জা হইল। সে সলজ্জভাবে হাসিয়া বলিল, রাখে রাখে! রাধারানীর জাত কৃষ্ণ-পূজার ফুল—কী যে বল তুমি রাইকমল!

হাসিতে হাসিতে উচ্ছলভাবে কমলিনী বলিল, প্রসাদী মালা গলায় পরা চলে গো। পায়ে না মাড়ালেই হল।

রসিক বলিল, আমি বাউল দরবেশ রাইকমল। বৃন্দে হল আমাদের গুরু। মালা আমাদের মাথায় থাকে গো। এখন তোমার কথা বল।

কি জিজ্ঞাসা করছ, বল?

নবদ্বীপ কেমন? রসিক একটু হাসিল। সে প্রত্যাশা করিয়াছিল, কমলের মুখে রক্তাভা দেখিবে।

কিন্তু কমলিনী মাথা নাড়িয়া সর্বদেহে অস্বীকারের ভঙ্গী ফুটাইয়া বলিল, এমন ভাল কি আর মহান্ত? মহান্ত সবিস্ময়ে তাহার মুখের দিকে চাহিয়া রহিল। কমলিনী আবার বলিল, তবে মা-গঙ্গা ভাল।

প্রবল বিস্ময়ে রসিকদাস বলিল, এমন সোনার গোঁরায় তোমার মন উঠল না রাইকমল?

হাসিয়া কমলিনী বলিল, না, বগ-বাবাজী। তবে হ্যাঁ, ওই রূপের মাহুঘটি যদি পেতাম তা হলে পারে বিকতাম, তবে মন উঠত।

রসিক এবার ছাড়িল না, রহস্য করিয়া সে বলিল, বল কি? রাইকমল-রঞ্জনকে ভুলে, অঁয়া?

হাসিয়াই কমল উত্তর দিল, তা সোনার মোহর পেলে রূপোর আধুলি ভোলে না কে, বল?

তবে রাইকমল, আধুলি-টাকার তফাতের লোকও তো রয়েছে। টাকাটা নিরে আধুলিটা ভোল না কেন?

মাঝে কি তোমাকে বগ-বাবাজী বলি! ছনোপুঁটির ওপরেও তোমার লোভ! ছুটো আধুলিতে একটা টাকা। বত্রিশটা আধুলিতে একটা মোহরের দাম হয়, কিন্তু বত্রিশটা গালালেও রূপোতে সোনার রঙ ধরে না। ওটুকু তফাতে আমার মন ওঠে না। এত লোভ আমার নাই।

কামিনী বোধ হয় নিকটেই কোথাও গোপনে বুসিয়া কস্তুর মনের কথা শুনিতেছিল। সে আর থাকিতে পারিল না, সম্মুখে আসিয়া বলিয়া উঠিল, তা বলে টাকা-আধুলির উল্টো কদরও কেউ করে না মা। তোমার সবই আদিখ্যেতা, হ্যাঁ।

কমলিনী বাসর-ঘরের কনের মত ধরা পড়িয়া হাসিয়া সন্মুখ হইল। সে-হাসিতে মাথের রাগ আরও বাড়িয়া গেল। কামিনী রাগ করিয়াই বলিয়া উঠিল, মরণ! এতে হাসির কি পেলি তুনি? হাসছিল যে শুধু?

কমলিনীর হাসি বাড়িয়াই চলিল। মুখে কাপড় দিয়া হাসিতে হাসিতে সে বলিল, মরণ তোমার। আড়ি পেতে আবার মেয়ের মনের কথা শোনা হচ্ছিল। তারপর উচ্ছল হাস্যধারা

লবঙ্গ করিয়া মুদ্র শাস্ত হাসি হাসিয়া সে বলিল, তা শুনেছিল যখন, তখন শোন। ঢেঁপো-
হালা টাকার মালা না পরে যদি কেউ প্রমাণী আধুলির মালাই গলায় দেয়, তাতে নির্দেশ কি
আছে? ওখানে দরের কথা চলে না বাহান্তরে বুড়ি—ও হল রুটির কথা।

অবাক হইয়া কামিনী মুখরা মেয়ের মুখপানে চাহিয়া রহিল। কিছুক্ষণ পর তাহার যেন
চমক ভাঙিল, বলিল, তবে তোর মনের কথাটাই শুনি?

কমলিনী বলিল, বললাম তো, আবার কি বলব?

মা বলিল, কতকাল আর আমার গলায় কাঁটা হয়ে বিঁধে থাকবি তুই? বিয়ে তুই কেন
করবি না?

তা আবার কখন বললাম আমি?

কেন তবে স্ববলকে মালাচন্দন করবি না?

দুঃ! কেমনধারা মেয়ের মতন কথা, মেয়েলী ঢঙ। দূর দূর! মুখে কাপড় দিয়া সে
খিলখিল করিয়া হাসিয়া উঠিল।

সেদিকে ভ্রক্ষেপ না করিয়া মা বলিল, বেশ, তবে বলাইদাস—

গোঁট উলটাইয়া কমল বলিয়া উঠিল, মর—মর! রুচিতে তোর ধন্ডি ঘাই। ওই আমড়ার
আঁটির মত রাঙা-রাঙা চোখ! ওকে বিয়ে করার চেয়ে গলায় দড়ি দেওয়া ভাল।

রাগ করিয়া কামিনী উঠিয়া গেল। সমস্ত দিন সে আর মেয়ের সঙ্গে কথা কহিল না।
কমলিনী সেটুকু বুঝিল। সন্ধ্যার সময়ে সে আসিয়া মায়ের গা ঘেঁষিয়া বসিতেই মা হাত-দুই
ছিটকাইয়া সরিয়া গেল। বলিল, কচি খুঁকীর মত গা ঘেঁষে বস কেন আবার?

কমল কিছুক্ষণ নীরবে বসিয়া থাকিল। তারপর অল্পপেক্ষণীয় গম্ভীর স্বরে মাকে বলিল,
দেহ দিয়ে গোবিন্দের পূজা করা হয় না মা?

মা চকিতভাবে কন্ঠার মুখের দিকে চাহিল। কমল অসঙ্কোচপূর্ণ দৃষ্টিতে মায়ের দিকে চাহিয়া
বলিল, মালা কি মাহুঘের গলাতেই দিতে হবে?

ওদিকের দাওয়ার উপর ছিল রসিকদাস বসিয়া, সে বলিয়া উঠিল, তাই হয় গো রাইকমল,
তাই হয়। মাহুঘের মধ্যে দিয়েই তাঁর পূজা করতে হয়। জান, 'সবার উপরে মাহুঘ সত্য
তাহার উপরে নাই।'

কমল কঠিন স্বরে বলিল, মিছে কথা। ও হচ্ছে মাহুঘের নির্ভের ফন্দির কথা। ভগবানের
পূজা চার সে নিজে।

কামিনী বলিল, ও কথা থাক না কমল। কিন্তু মা, মা তো তোর অমর নয়—আর ভিখারীর
সম্বলও আর কিছু নাই যে তোকে দিয়ে যাব। যা ছিল, তাও ফুরল। কি করে তোর দিন
চলবে?

হাসিয়া কমল বলিয়া উঠিল, 'হরি বলে। নেহাত বোকার মত কথাটা বললি মা। তোর
যেমন করে দিন চলেছে তেমনিই করে আমারও চলবে। হরি বলে পাঁচটা দোর ফুৎলেই একটা
পেট চলে যাবে আমার।

মা বলিল, তুই তো জানিস না কমল পথের কথা । সাপকে এড়িয়ে পথ চলা যায় মা, কিন্তু পাপকে এড়িয়ে পথ চলা যায় না ।

কমল উত্তর দিল, লখিন্দরকে বাসর-ঘরে—লোহার বাসর-ঘরে সাপে খেয়েছিল মা । পথে নয় । ও পথই বল আর ঘরই বল, পাপ এড়িয়ে কোথাও চলা যায় না । আমরা আর ও সব কথা বলিস না মা । সে উঠিয়া চলিয়া গেল ।

কামিনী রসিকদাসকে বলিল, কি করি আমি মহান্ত ?

রসিক আপন-মনে গান ভাঁজিতেছিল, কোন উত্তর দিল না ।

মাহুঘের নাকি আশার শেষ নাই । সংসারে চুনিয়া চুনিয়া সে শুধু সংগ্রহ করে আশাপ্রদ ঘটনাগুলি । বাকিগুলি ইচ্ছা করিয়া সে ভুলিতে চায়, ভুলিয়াও যায় । এমনই ঘটনার পর ঘটনা সাজাইয়া সে গড়িয়া তোলে কল্পনার আশা-দেউল । কামিনীর আশা নিঃশেষে শেষ হয় নাই ।

স্বলকে লইয়া খানিকটা জটিলতা ঘনাইয়া আসিতেছিল । তাহা দেখিয়াই কমলের মায়ের একটা আশ্বাসপূর্ণ প্রত্যাশা জাগিয়াছিল । যতই নিন্দা স্ববলের সে করুক, তাহাকে দেখিলে কমল প্রফুল্ল হইয়া উঠে । আগ বাড়াইয়া হাসিমুখে তাহাকে সম্ভাষণ করে, স্ববলসাক্ষাতী, শোন ।

রসিক মুগ্ধভাবে বলিয়া উঠে, স্ববল সখা, গোরারূপে তোমার মানায় না ভাই । রঙটি তোমার কালো হলেই যেন ভাল হত ।

স্ববল লজ্জা পায় । সে মাথাটা নত করিয়া রাঙা হইয়া উঠে । উত্তর দেয় কমল, সপ্রতিভ মেয়েটির মুখে কিছুই বাধে না । অবলীলাক্রমে ধারালো ঝাঁক ছুরির মত উত্তর দেয়, সমাজে খেতে বসে নিজের যে জিনিসটার ওপর লোভ হয়, লোকে সেই জিনিসটা পাইশের পাতে দিতে সুপারিশ করে । কালো রূপটা তোমার হলেই ভাল হত বগ-বাবাজী । রাইকমলকে পাশে মানাত ভাল ।

সঙ্গে সঙ্গে সেই উদ্দাম হাসির তরঙ্গে সে নিজেই যেন মুখরিত হইয়া উঠে । তরুণ অবয়বের প্রতি অঙ্গটি তাহার সুপ্রত্যক্ষ কল্পনে কাঁপে, মনে হয় প্রতিটি অঙ্গ যেন নাচিতেছে ।

রসিকদাস লজ্জিত হইয়া বলে, রাখে রাখে ! আমরা হলাম বাউল রাইকমল । ব্রজের শুক আমরা । লীলার গান গাওয়াই আমাদের ক্লাজ গো ।

কমল হাসিতে হাসিতে বলে, আমি না হয় সারাই হতাম শুকের ।

রসিকদাস পলাইয়া যায় । বলে, রণে ভঙ্গ দিলাম আমি । পিঠে বাণ মারা ধর্মকাজ হবে না রাইকমল ।

মাও কাজের অজুহাতে সরিয়া যায় । হাসি গল্প গান করিয়া স্ববল চলিয়া যায় । পুখে পিছন হইতে কে তাহাকে ডাকে, শোন শোন, ওহে স্ববল-সখা !

স্ববল পিছন ফিরিয়া দেখে, রসিকদাস । রসিক নিকটে আসিয়া বলে, কি বললে রাইকমল ?

স্বল সবিনয়ে প্রশ্ন করে, কি আবার বলবে ? কিসের কি ?

রসিক বলিয়া উঠে, কমল ঠিক বলে, মেয়ে গড়তে গড়তে বিধাতা তোমাকে ভুলে পুরুষ গড়ে ফেলেছে। মালা—মালা—বলি, কমল-মালা গলায় উঠবে তোমার ? কিছু বুঝতে পারছ ?

স্বল লজ্জায় রাঙা হইয়া উঠে, মাথা নীচু করিয়া চুপ করিয়া থাকে।

রসিক যেন ঝুট হয়। বলে, কি তুমি হে ?

লজ্জিত স্বলকে দেখিয়া আবার মায়াও হয়। কিছুক্ষণ পর সাধনা দিয়া বলে, খেয়ে তো ফেলবে না রাইকমল তোমাকে। সে তো আর বাঁধ-ভালুক নয়। তার মতটা জান না একদিন।

মুহূর্ত্তে স্বল বলে, কাল জানব।

রসিক খুশি হইয়া বলে, মালা-চন্দনের দিন তোমার মালা আমি গাঁথব কিন্তু।

হাসিয়া স্বল বলে, বেশ !

পরদিন ঠিক সেই স্থানটিতে রসিক অপেক্ষা করিয়া থাকে। স্বল আসিতেই হাসিতে হাসিতে বলে, মালা গাঁথি স্বল-সখা ?

স্বল নীরব। রসিকদাস বলে, কথা কও না যে হে ? কি হল ?

স্বল বলে, কমলের মা ছিল ওদিকের ঘরে—

রসিক বলে, কি বিপদ ! তোমার জ্ঞে সে কি বনে যাবে ? তোমার কোনও ভয় নাই, কামিনী নিজে আমার তোমাকে বলতে বলে দিয়েছে। সে নিজে দিনে দশ বার করে মেয়ের সঙ্গে বগড়া করছে যে, কেন তুই স্বললক্ষ্য বিয়ে করবি না ? কাল কিন্তু এর শেষ করতে হবে। বুঝলে ?

স্বল ঘাড় নাড়িয়া জানায়, সে বুঝিয়াছে।

পরদিন কামিনীও কোথায় গিয়াছিল। কমলিনী একা বসিয়া কি যেন ভাবিতেছিল। স্বল আসিয়া চারিদিক চাহিয়া দেখিল, কেহ কোথাও নাই। সে সাহস সঞ্চয় করিয়া রসিকতা করিয়া বলিয়া ফেলিল, রাইকমলিনী বিমলিনী কেন গো ?

কমল ধীরে ধীরে মুখ তুলিয়া মুহূর্ত্তে হাসির সহিত বলিল, গোষ্ঠের বেলা যায় যে সখা ! তাই ভাবছি, স্বল স্বল-সখা আমার বাছনি বুকে এল না কেন ? শ্রামের কাছে আমি যাব কেমন করে ?

তরুণ স্বলের মনে মোহ ছিল। তাহার উপর রসিকদাসের গতকালের উৎসাহ সে-মোহের মূলে ভরসার জলসিঞ্জন করিয়াছে। কমলের কথাগুলির অর্থের মধ্যেও সে তাই অস্বকুল ইঙ্গিত অনুভব করিল। যে মোহ এতদিন তাহার মনের কুঁড়ির ভিতরের গন্ধের মত সুপ্ত ছিল, আজ সে-মোহ বিকশিত পুষ্পের গন্ধের মত তাহার সর্বত্র তরিয়া যেন প্রকাশিত হইয়া পড়িল। অপ্রত্যা চোখে কমলের দিকে অকুণ্ঠিত দৃষ্টিতে চাহিয়া সে আবিষ্টের মত কমলিনীর হাতখানি ধরিতে হাত বাড়াইল। সে-হাত তাহার ধরধর করিয়া কাঁপিতেছিল।

মৃণালের মত লীলায়িত ভঙ্গীতে দেহখানি বাঁকাইয়া সরিয়া আসিয়া কমলিনী বলিল, ছি !
এই কি স্বল-সখার কাণ্ড ! তোমার মনে পাপ !

অকল্পিত আকস্মিক আঘাত স্বলের কাছে । রসিকদাসের কথা সে ঙ্গব বলিয়া বিশ্বাস
করিয়াছিল । মুহূর্তে দারুণ লজ্জায় শাস্ত লাজুক বৈষ্ণবটির সর্বাঙ্গ যেন অবশ হইয়া গেল । মুখ
হইয়া গেল বিবর্ণ পাংশু ।

বিচিত্র চরিত্র এই চঞ্চলা কিশোরীটির । এইবার সে নিজেই স্বলের হাত ধরিয়া বলিল,
এস সখা, বোসো । দাঁড়াও, একটা কিছু নিয়ে আসি পাতবার জন্ত ।

কমলিনী ঘরের মধ্যে প্রবেশ করিতেই স্বল পলাইয়া আসিয়া বাঁচিল । লজ্জার শিকারের
আর তাহার সীমা ছিল না । কিন্তু তাহাতেও নিষ্কৃতি নাই । পিছন হইতে কমলিনী ডাকিল,
যে চলে যায়, সে আমার মাথা খায়—মাথা খায় ।

স্বলকে ফিরিতে হইল । চটুলা চঞ্চলা মেয়েটি তখনই হাসিয়া অহুযোগ করিল, চলে
যাচ্ছ যে ?

স্বল মাথা নীচু করিয়া দাঁড়াইয়া রহিল । তাহার হাত দুইটি ধরিয়া কমলিনী বলিল, তুমি
আমার সত্যি স্বল-সখা—বেশ !

এবার কণ্ঠস্বরে ছিল স্কন্ধে একটি আন্তরিকতা, আত্মীয়তা ।

স্বল এতক্ষণে মুখ তুলিয়া অকুণ্ঠিত দৃষ্টিতে চাহিয়া বলিল, বেশ । কিন্তু তোমার চোখ
ছলছল করছে কেন রাইকমল ?

সাদা হাসিটি হাসিয়া কমলিনী বলিল, এই হাসছি আমি ভাই ।

সেদিন ফিরিবার পথে স্বল রসিকদাসকে বলিল, ও কথা আমাকে বলবেন না ।

রসিক বিস্মিতভাবে তাহার মুখের দিকে চাহিয়া রহিল ।

স্বল বলিল, মাহুষে ওর মন ওঠে না মহান্ত ।

কামিনী সমস্ত গুনিয়া আজ আবার বলিয়া বলিল, আমি কি করব মহান্ত ?

রসিক অনেক ভাবিয়া-চিন্তিয়াও উত্তর খুঁজিয়া পাইল না, বরং মনে তাহার গান গুঞ্জন করিয়া
উঠিল—

কাঞ্চন-বরনী, কে বটে সে ধনী, ধীরে ধীরে চলি যায় ।

হাসির ঠমকে, চপুলা চমকে নীল শাড়ি শোভে গায় ॥

...

চণ্ডীদাস কহে, ভেব না ভেব না, ওহে শ্রাম গুণমণি ।

তুমি সে তাহার সবসব ধন তুমিয়ারি সে আছে ধনী ॥

কামিনী কিন্তু অনেক ভাবিয়া সাঙ্কনা আবিষ্কার করে । তাহার কমল এখনও কোঁটে
নাই ।

চাপ

দিনে দিনে মাল কাটিয়া গেল। মাসে মাসে বৎসর পূর্ণ হইল। কামিনী একাগ্র চোখে মেয়ের দিকে দৃষ্টি রাখিয়াছিল, এইবার তাহার মনে হইল, কমলকোরক দিনে দিনে ক্রমশ পূর্ণ-প্রস্তুতিত হইয়া উঠিল। কমল আজ পূর্ণ যুবতী। পূর্ণতার গান্ধীর্থে সেই চাপা চাপলাটুকু যেন ঈষৎ তারাক্রান্ত। আপনার দিকে চাহিয়া কমলিনী আপনি আপনাকে একটু মন্থর করিবার চেষ্টা করে। কিন্তু স্বভাবের চটুলতাও তোলা যায় না। যুগলের বৃন্তে কমলদলের মত মথ্যে মথ্যে সে হেলিয়া ছলিয়া উঠে। সে চটুল-লজ্জার রূপ অপূর্ব! রসিকদাস সে রূপ দেখিয়া বিভোর হইয়া পড়ে। মাঝে মাঝে সে-গুনগুন করিয়া গান ধরিয়া দেয়—

চল চল কাঁচা অঙ্কের লাবণি

অবনী বহিয়া যায় রে—অবনী বহিয়া যায়।

কমল ক্রকুটি করিয়া বলে, বলি—বয়স হল কত ?

রসিক একগাল হাসিয়া উত্তর দিল, তোমরা বয়স মানে না রাইকমল! আমরণ ফুলের রূপের বন্দনা গেয়েই বেড়ায়।

কমল স্বাক্ষর দিয়া উঠে, বেশ, তুমি থাম মহাস্ত।

আজ পরম কোঁতুকে হাসিয়া উঠে রসিকদাস। তাহার সে হাসি আর থামিতে চায় না। রোবত্তরে কমল আবার বলে, থাম বলছি মহাস্ত।

রসিকের হাসি মিলায় না। সে বলে, আমি না হয় থামছি। কিন্তু তুমি ‘মহাস্ত’ নামটি ছাড় দেখি।

কমলিনীর লাজবস্ত্র রোবদৃশ অধরে হাসির রেখা দেখা দিল। চাপা হাসিতে মুখ ভরিয়া সর্কোঁতুকে সে বলিল, কেন, তুমি মহাস্ত নও নাকি ?

খুব জোরে মাথা নাড়িয়া মহাস্ত বলিল, না।

তবে তুমি কি ?

রসিক বলিল, আমি রাইকমলের বগ-বাবাজী।

এবার কমল মুখে কাপড় চাপা দেয়। মুখের চাপা কাপড় ঠেলিয়া তরুণীকণ্ঠের অবোধ হাসি জলকলধ্বনির মত বাহির হইয়া আসে।

লঙ্গে লঙ্গে অবোধ বাউল গানটির পাদপুরণ করে—

ঈষৎ হাসিয়া তরুণ-হিলোলে

মদন মূরছা যায় রে—মদন মূরছা যায়।

কামিনীর দুইটি ইচ্ছা ছিল—কমলের বিবাহ এবং নববীপের পুণ্যভূমি গৌরচন্দ্রের চরণছায়ায়, গঙ্গার কোলে চিরদিনের মত চোখ বুজিয়া শেবশয্যা পাতি।

ইদানীং সে মেয়ের বিবাহের আশা ছাড়িয়া দিয়া কামনা করিত শুধু নববীপচন্দ্রের

চরণাশ্রয়। তাহার সে ইচ্ছা অপূর্ণ রহিল না, হঠাৎ সে মারা গেল। নব্ব্বীপেই দেহ রাখিল। হয় নাই বেশি কিছু। সামান্য জ্বর, তাও বেশি দিন নয়—চার দিন।

কামিনী সেটা বুঝিতে পারিয়াছিল। শেষের দিন সে বলিল, মরণে আমার দুঃখ নাই মহান্ত। গোরাচাঁদের চরণে মা-গন্ধার কোলে এ আমার স্থলের মরণ। তবে—

রসিক বাধা দিয়া বলিল, মিছে ভাবছ কেন রাইয়ের মা, কি এমন হয়েছে তোমার ?

ঈষৎ হাসিয়া কামিনী বলিল, হয়েছে সবই মহান্ত, তোমরা বুঝতে পারছ না, আমি কিন্তু মরণের সাড়া পাচ্ছি। আমার কি মনে হচ্ছে জান ? আমি যেন তোমাদের হতে দূরে—অনেক দূরে চলে যাচ্ছি। কথা বলছ তোমরা, আমি যেন শুনছি অনেক দূর হতে। শোন, মরণে আক্ষেপ নাই, শুধু ময়ের ভাবনা আমার মহান্ত। কমলির আমার কি হবে মহান্ত ?

চোখের জলে রসিকের বুক ভাসিয়া গেল। সে বলিল, ভেবো না তুমি রাইয়ের মা। তাই যদি হয়, তবে তোমার কমলের তার আমি নিলাম।

কামিনীর মুখে হাসি দেখা দিল। সে বলিল, সে আমি জানি মহান্ত। কই, কই কমলি আমার কই ?

পাশেই কমলিনী বসিয়া নীরবে কাঁদিতেছিল। মায়ের বুক মাথা রাখিয়া সে অবশেষে বলে উঠিল, মা !

অবশ হস্ত মেয়ের মাথায় রাখিয়া কামিনী হাসিতে হাসিতেই বলিল, কাঁদিস কেন যে বুড়ো মেয়ে ? মা কি চিরদিন কারও থাকে ?

কমলিনী তবুও কাঁদিল। বহুকষ্টে অবশ হস্তখানির একটি স্পর্শ মেয়ের এলানো চুলের উপর টানিয়া দিয়া মা বলিল, শোন, কাঁদিস না। যাবার সময় নিশ্চিন্ত কর। •

কমলি বলিল, বল। •

শোন, যে লতা গাছে জড়ায় না, সে চিরদিন ধুলোর গড়াগড়ি খায়। জানোয়ারে মুড়ে খায় তার—

কমল বাধা দিয়া বলিল, কষ্ট হচ্ছে মা তোমার ?

না। তা ছাড়া, মাহুয়ের মুখে বড় বিষ, ওরে কলঙ্কের বিবে রাখার সোনার অঙ্গ পুড়ে গিয়েছিল। না, ত্রে তুই সইতে পারবি না। আমার কথা দে তুই।

সে হাঁপাইতেছিল।

কমল বলিল, কেন মা ? দেবতার হাতে দিয়ে যেতে কি ভোর মন সরছে না ?

দয়দয়ধারে কামিনীর চোখ দিয়া জল গড়াইয়া পড়িল। বার বার ঝাড় নাড়িয়া সে বলিল, না। কমলি, আমার নিশ্চিন্ত কর। বল, কথা দে।

মায়ের মুখের দিকে চাহিয়া এবার কমল বলিল, বিয়ে করব মা।

কামিনী একটা স্বস্তির নিঃশ্বাস ফেলিয়া বলিল, আঃ !

তারপর সে দুইটি কথা কহিয়াছিল। একসময় বলিল, বাপ-মায়ের ছেলে কেড়ে নিল না কেন।

হাসিয়া কমল বলিল, না মা।

মহাস্ত তখন নাম আরম্ভ করিয়াছে, জয় রাধে রাধে—

কামিনী বলিল, গোবিন্দ গোবিন্দ !

ওই শেষ কথা।

পাঁচ

ফুল ঝরিয়া যায়, আবার ফোটে। কালের তালে তালে ঘুম-পাড়ানিয়া গানের মত বিশ্বরঙ্গীর গান গাহিয়া মাহুঘের দুঃখের স্মৃতি ভুলাইয়া দিতেছেন মা-বহুমতী। কমলিনীও দিনে দিনে মায়েয় শোক কতকটা ভুলিল। দিনের সঙ্গে সঙ্গে সে চোখের জল মুছিল, তারপর আবার হাসিল, আবার কীর্তন গাহিল। বাউল রসিক যেন হাঁপ ছাড়িয়া বাঁচিল। সেও সঙ্গে সঙ্গে হাসিল। ব্যাখাত্তর শিশু বেদনার উপশমে কায়া ভুলিয়া হাসিলে মায়েয় বুকে যে হাসি দেখা দেয়, রসিকের মুখেও তেমনই হাসি দেখা দিল।

রসিক ভিক্ষা করিয়া আনে, কমল রাধে-বাড়ে। দিন এমনই করিয়া চলিতেছিল, মাস তিনেক পর একদিন রসিক বলিল, রাইকমল, একটা কথা বলছিলাম।

তার কণ্ঠস্বরে, ভঙ্গীতে যেন একটা কুণ্ঠা ছিল। এটুকু কমলের বড় ভাল লাগিল। চটুল রসিকন্তায় বাউলকে আরও সে কুণ্ঠিত করিয়া তুলিল।

বলিল, বল ?

রসিক বলিল, বলছিলাম কি—

কমল বলিয়া উঠিল, কি বলছিলে ?

রসিক আরও কুণ্ঠিতভাবে বলিল, তা হলে—

কমলিনীর হাসি ফুট হইয়া উঠিল, বলিল, তা হলে ? কি তা হলে বল না গো ? বগ-বাবাজীর গলায় কি কাঁটা আটকাল নাকি ?

বিক্রান্ত রসিক অকারণে গলাটা খাঁকি দিয়া ঝাড়িয়া লইল। বলিল, না—তা—

স্বভাবগত কলহাস্তে সমস্ত মুখরিত করিয়া কমল বলিল, তবে গলা ঝাড়লে যে ?

রসিক এবার বলিয়া ফেলিল, তোমার মালাচন্দনের কথা। আমি—ধর, আমার—

কথাটা শুনিবামাত্র চঞ্চল কমলিনী এক মুহূর্তে স্থির হইয়া গিয়াছিল। একদৃষ্টে সে রসিকের মুখের দিকে চাহিয়াছিল। কথাটার শেষের দিকে রসিকদাসের কুণ্ঠা দেখিয়া তবুও তাহার মুখে হাসি ফুটিয়া উঠিল—মান হাসি, বলিল, তোমার ?

রসিক বলিল, আমি বাউল। তা ছাড়া আমার কাছে থাকলে লোকেও মন্দ—

সে আর বলিতে পারিল না। কমল আবার ঈষৎ মান হাসিয়া বলিল, গলার কাঁটাটা বেড়ে ফেলতে পারলে না ? আচ্ছা, এ বেলাটা সবুজ কর মহাস্ত, ও বেলায়—

কথাটা সে শেষ করিল না, তাহার পূর্বেই ঘরের মধ্যে গিয়া প্রবেশ করিল। সারাটা দিন

বাহির হইল না।

রসিকদাসও সারাটা দিন বাহিরে মাথায় হাত দিয়া মাটির দিকে চাহিয়া বসিয়া রহিল।
সন্ধ্যার কিছু আগে কমল ঘর হইতে বাহির হইল।

রসিক বসিয়া ছিল পূর্বমুখে। সে মুখ তুলিয়া চাহিল। সন্ধ্যার অন্তরাতন স্বর্ষের স্বর্ণাভা
কমলের মুখে আসিয়া পড়িয়াছে; কিন্তু আজ তবু পদাবলীর কোন কলি মনে পড়িল না।
অপরাধীর মতই রসিক বলিল, রাইকমল!

বিচিত্র হাসি হাসিয়া কমল বলিল, মালার জন্তে যে ফুল চাই মহাস্ত।

সবিস্ময়ে রসিক তাহার মুখের দিকে চাহিয়া রহিল।

কমল বলিল, আজই আমার মালাচন্দন হবে মহাস্ত। ফুল চাই। আরোজম চাই।

পরম আনন্দে উঠিয়া রসিক বলিল, সুবল-সখাকে ডেকে আনি আমি।

বাধা দিয়া কমল বলিল, পরে। এখন থাক। আগে ফুল নিয়ে এস তুমি।

রসিক বালকের মত আনন্দবিহ্বল হইয়া চলিয়া গেল। কতক্ষণ পরে সিন্তবস্ত্রে কতকগুলি
পদ্মফুল লইয়া সে ফিরিল। বলিল, রাইকমল, কমলফুলই এনেছি আমি।

আরও বোধ হয় কিছু বলিবার ছিল। কিন্তু কমলিনীর রূপ দেখিয়া সে-কথা আর রসিকদাস
উচ্চারণ করিতে পারিল না। কমলের চুলের রাশি ছিল এলানো। পরনে টকটকে রাঙাপাড়
তসরের শাড়ি একখানি। নাকে ক্ষীণ রেখায় আঁকা গুরু-প্রতিপদের চন্দ্রকলার মত রসকলিটি
যেন উঁকি মারিয়া হাসিতেছিল। কপালে সন্ধ্যার গোধূলি-তারার মত শুভ্র টিপ একটি।
গলায় তুলসীকাঠের মালা, হাতে দুইগাছি রাঙা কলি। অন্ধে আর কোন আভরণ নাই; কিন্তু
তাই যেন ভাল।

কমলিনী হাসিল।

রসিক বলিল, একটু খুঁত হয়েছে রাইকমল। নীলাঘরী পরলেই ভাল হত।

কমল বলিল, সে বাসরে পরব। নীল কালো বিয়ের সময় পরতে নেই যে। এখন তুমি
কাপড়টা ছাড় দেখি। ওই দেখ, কাপড় রেখেছি।

রসিক দেখিল, কমলিনীর শখ করিয়া সেদিনের কেনা সেই নূতন শাস্তিপুরে ধুতিখানি
রহিয়াছে। পরমানন্দে কাপড়খানা সে পরিধান করিয়া বলিল, শিরোপা যে মজুরীর চেয়েও দামী
পো! তারপর, এইবার ছকুম কর, সুবল-সখাকে ডাকি।

চন্দন ঘষা শেষ করিয়া কমল বলিল, পরে। আগে মালা দুগাছা গের্গে ফেলি, এস। তুমি
একগাছা গাঁথ, আমি একগাছা গাঁথি।

রসিকের আজ আর আনন্দ যেন ধরিতেছিল না। সে তাড়াতাড়ি মালা গাঁথিতে বসিয়া
গেল। বলিল, খুব ভাল হবে রাইকমল। সুবল-সখা আসবামাত্র মালা পরিয়ে দেবে। সে
অবাক হয়ে যাবে।

কমলের হাতের মালা শেষ হইয়া আসিল। সে ভাগিদ দিল মহাস্তকে, বলি, আর দেরি
কত? আমার শেষ হল যে!

রসিক রসিকতা করিয়া উত্তর দিল, রাই ধৈর্য—

তারপর হুতার গিঠি বাঁধিতে বাঁধিতে বলিল, আমার মালাও তৈরি গো।

কমলিনী আপন হাতের মালাগাছি রসিকের গলায় পরাইয়া দিয়া বলিল, গোবিন্দ সাকী।

রসিকের মুখ হইয়া গিয়াছিল বিবর্ণ পাংশু। কমল তাহাকে প্রশ্নাম করিয়া সম্মুখে নতজাহ্নু হইয়া বলিয়া বলিল, এইবার তোমার মালা আমায় দাও।

এতক্ষণে রসিকের কথা সবিল। সে আত্মবশে চীৎকার করিয়া উঠিল, কি করলে রাইকমল?

কমল স্তম্ভের হাসি হাসিয়া বলিল, মালার প্রসাদ দেবে না আমায়?

বলিয়া চন্দন লইয়া, রসিকের জরাজীর্ণ পাণ্ডুর ললাট চর্চিত করিয়া দিল।

রসিকের চোখের দৃষ্টি ক্রমশ পরিবর্তিত হইতেছিল। এক রহস্যময় দৃষ্টিতে কমলের মুখপানে চাহিয়া সে হাসিল। তারপর আপন হাতের থলিয়া-পড়া মালাগাছি তুলিয়া লইয়া কমলের গলায় পরাইয়া দিল। তাহার স্তম্ভের মস্তণ তরুণ ললাটে স্তম্ভের ছাঁদে আঁকিয়া দিল সুবন্ধিম রেখায় চন্দনবিন্দুর অলকা-তিলকার সারি। আঁকিতে আঁকিতে সে গাহিতেছিল—

কৃষ্ণপূজার কমল আমি রেখে দিব মাথায় করে।

কমল লীলাকোতুকে বলিয়া উঠিল, কত দেবি তোমার? বাসর সাজাতে হবে যে!

রসিক বলিল, না গো সখি, না। বাসর সাজাব আমি। আমাদের লীলা হবে উলটো—এ লীলায় তুমি কাঁদবে, আমি কাঁদব।

কমল বলিল, চুল, এখন গৌরান্দ-মন্দিরে চল। মহাস্তের কাছে যাই। যেগুলো করতে হবে, সেগুলো করা চাই তো।

*

*

*

রসিকদাসই বাসর সাজাইল। কমল দেখিল, বাসর সাজানো হইয়াছে—একদিকে টাটকা ফুলে, অল্প দিকে শুকনো ফুলে। কমল মুখ তুলিয়া মহাস্তের দিকে চাহিল। রসিক ঈষৎ হাসিয়া বলিল, তুমি আর আমি।

কমল বলিল, তার চেয়ে আঙারে সাজালে না কেন? তাহার কণ্ঠস্বর যেন কাঁপিতেছিল।

রসিক অপ্রস্তুত হাসি হাসিয়া বলিল, না না, শুকনো ফুল ফেলে দিই।

কমল বাধা দিল। সে শুক ফুলশস্যার উপর বসিয়া বলিল, এ শয্যে আমায়। তোমার শুকনো শয্যে হবে না, তোমার হবে টাটকা শয্যে।

কথা শেষ করিয়াই সে খিলখিল করিয়া হাসিয়া উঠিল।

অকস্মাৎ একটা অননুভূত তীব্রতার জীর্ণদেহ শ্রোতের বক্ষপঙ্কজের অভ্যন্তরটা গুরুর করিয়া কাঁপিয়া উঠিল। ক্ষীণ কম্পনের রেশে সর্বদেহ কাঁপিতেছিল।

শ্রোত বাউল কয় পা পিছাইয়া গেল, কম্পিত কণ্ঠে সে বলিয়া উঠিল, থাক রাইকমল, থাক।

কমল লমান হাসি হাসিয়া কহিল, তা কি হয় গো ? এ যে নিয়ম । আর আমার বিয়ের সাধ-আহ্লাদ তো একটা আছে ।

ধীরে ধীরে আপনাকে দৃঢ় করিয়া লইয়া মহাস্ত বিকশিত কোমল কুসুম-শস্যার উপর গিয়া বসিল । তারপর কমলের হাতখানি আপনার হাতের মধ্যে টানিয়া লইয়া কহিল, রাইকমল, আধুলির বদলে শেবে আধলার মালা গলায় গাঁথলে ?

বাউল বিচিত্র হাসি হাসিল ।

কমল হাসিল । বলিল, সোনায়ে তামায় বড় ধাঁধা লাগে গো । সোনা বলেই তো গলায় গাঁথলাম । তামা যদি হয়, তবুও জানব, ওই আমার সোনা । সোনা-তামায় তফাত তো মনের ভুল । এ তো শুধু আমার রইল । কদর করব আমি । পরের সঙ্গে দর করতে হাটে তো যাচ্ছি না ।

ঘরের কোণে কমল ঘুত প্রদীপ জালিয়াছিল । প্রদীপটা জলিতেছিলও বেশ উজ্জলভাবে । রসিক কমলের মুখখানি পরিপূর্ণ আলোর ধারার সম্মুখে তুলিয়া ধরিল । কমল হাসিল ।

রসিকের দেখিয়া যেন আর তৃপ্তি হয় না—আশা মেটে না । কমল বলিল, ছাড় ।

সে কেমন ভয় পাইয়া গেল । জীর্ণ বাউলের বার্ষিক্যমলিন চোখের কি তীব্র জলজলে একাগ্র দৃষ্টি !

সে সরিয়া যাইবার চেষ্টা করিল । কিন্তু রসিক সহসা উন্নতের মত প্রবল আকর্ষণে কমলের পুষ্পিত দেহখানিকে বকের মধ্যে টানিয়া লইল । কমল ছাড়াইবার চেষ্টা করিল, কিন্তু পারিল না । ওই শীর্ণ বাহুতে যেন মত্ত হস্তীর শক্তি ! কক্ষাল যেন ফাঁসির দড়ির মত দৃঢ় হইয়া উঠিয়াছে ।

কমলের মুখ বিবর্ণ হইয়া গেল, সে আঁতষরে প্রার্থনা করিল, মহাস্ত ! মহাস্ত !

উন্নত বাউল যেন অন্ধ বধির হইয়া গিয়াছে ।

ছয়

পরদিন প্রভাতে উঠিয়া কমল দেখিল, মহাস্ত দাওয়ার উপর বসিয়া আছে ।

কখন যে সে শয্যাভাগ্য করিয়াছে, কমল তাহা জানিতে পারে নাই ; কিন্তু মহাস্তের মূর্তি দেখিয়া সে শিহরিয়া উঠিল । রক্ত-মাংসের মানুষটা যেন পাষণ হইয়া গিয়াছে । নিশ্চল মুক—নিষ্পলক শূন্য দৃষ্টি তাহার । চোখের কোলে কোলে দুইটি গভীর কালো রেখা দেখা দিয়াছে । শুষ্ক নদীর ভাঙন-ধরা তটরেখার মত বিগত-বত্তার বার্তা যেন তাহাতে পরিস্ফুট ।

সবই কমল বুঝিল । আপনাকেই একান্তভাবে অপরাধী করিয়া কমল লজ্জার দুখে এতটুকু হইয়া গেল । কতবার সাধনার কথা কহিতে গিয়াও সে পারিল না । সমস্ত প্রভাতটা সে আড়ালে কিরিল ।

রসিকদাসই আগে কথা কহিল। সে ডাকিল, কমল!

ডাকটা কমলের কানে যেন ঠেকিল—যেন খাটো-খাটো, কর্ণধরও যেন হিম-কঠিন। কমল তাহার সম্মুখে আসিয়া দাঁড়াইল নতমুখে।

রসিক তাহার মুখপানে চাহিয়া কাতরভাবে বলিল, কমল, আমি মাহুষ।

কমল উত্তর দিল, কেউই পাখর নয়। তবে তুমি আজ পাখর হয়েছ দেখছি।

মহাস্তর কর্ণধরে বাদল যেন বরিয়া পড়িল। সে বলিল, অহল্যার মত পাষণ্ডই বুঝি হলাম কমল।

কতকালের গৃহিণীর মত কমল আপনার আঁচল দিয়া মহাস্তর সজল চোখ মুছাইয়া দিল। তারপর বলিল, মালা তো ফুলেরই মালা মহাস্ত, তাতেও তোমার যদি গলায় কাঁসি লাগে তবে তুমি ছিঁড়ে ফেলো।

মহাস্ত ধীর ভঙ্গিতে ঘাড় নাড়িয়া বলিল, না। সে পারব না। আবার সে ঘাড় নাড়িল—না।

হাসিয়া কমল বলিল, আমার জন্তে ভাবছ? আমার জন্তে তুমি ভেবো না। গোবিন্দ তোমার একার নয়। তার হাতে ছেড়ে দিতেও কি তুমি পারবে না?

রসিক বলিল, না কমল, সে আর আমি পারব না—দেবতার পায়ে নয়, মাহুষের হাতেও নয়। আমার ভিতর বাহির তুমিময় হয়ে গিয়েছে। তুমি ছাড়া আমি বাঁচব না। জান কমল, কাল রাত্রে পালাবার চেষ্টা করেছিলাম, পারি নাই। পা উঠেছে, কিন্তু চোখ ফেরাতে পারি নাই।

কমল স্নানমুখে কহিল, কিন্তু আমি যে দুঃখে লজ্জায় মরে যাচ্ছি মহাস্ত। তোমার এতদিনের ভজন-পূজন সব আমার জন্তে পণ্ড হল।

উন্নতের মত কমলের হাত দুইটি আপনার বুকে চাপিয়া ধরিয়া মহাস্ত বলিল, যাক—যাক—যাক। সংসারে আমি কিছু চাই না। শুধু তুমি যেন আমায় ছেড়ে না কমল।

প্রবল আকর্ষণে সে কমলকে বুকের মধ্যে টানিয়া লইল।

কমল বলিল, ছাড়। ওঠ, উঠে স্নান কর। গোরাটাদের পূজো করে এস।

মহাস্ত অকস্মাৎ হু-হু করিয়া কাদিয়া উঠিল।

আজয়-কুমার বৈরাগীর বুকের ক্ষুধা এতদিন ঘুমন্ত জনের ক্ষুধার মত অবিচলিত ছিল। আজ আহার্য সম্মুখে ধরিয়া তাহাকে জাগাইয়া তোলার সে-ক্ষুধা অজগরের গ্রাস বিস্তার করিয়া মাথা তুলিল। সে-অজগর বাউলের আজয় সাধনায় অর্জিত বৈরাগ্যকে অসহায় বনকুরজের মত জড়াইয়া ধরিয়াছে। তাহাকে পিষিয়া মারিয়া সে তাহাকে নিঃশেষে গ্রাস করিবে।

রসিকদাস শিহরিয়া উঠিল। সে যেন কেমন হইয়া গেল। তাহার রসের উৎস শুষ্ক হইয়া গিয়াছে। শুক-সারীর স্বপ্নের গান আর জমে না। গোষ্ঠ বিহারের স্বপ্নাম-স্বপ্নের লগ্না-সংবাদ আর সে গায় না। হাসে না, কঁদেও না, সে এক অদ্ভুত অবস্থা।

মধ্যে মধ্যে একা, অথবা নিলীধ-ব্রাত্রে আকাশের দিকে চাহিয়া হাতজোড় করিয়া ডাকে, হে গোবিন্দ ! হে গোবিন্দ !

ধীরে ধীরে দুইটি নরনারীর জীবন কেমন একটা স্পন্দনহীন গুমটে অসহনীয় হইয়া উঠিল। কমলেরও যেন শ্বাসরুদ্ধ হইয়া আসিতেছিল। একদিন সে বলিয়া ফেলিল, এ তো আর ভাল লাগে না মহাস্ত।

মহাস্ত চমকিয়া উঠিল। বিবর্ণ মুখে স্পন্দনহীন দৃষ্টিতে সে কমলের মুখের দিকে চাহিয়া রহিল।

কমল বলিল, ঘর যে বিন হয়ে উঠিল ! চল, কোথাও যাই।

গৃহত্যাগের নামে রসিক যেন একটু জীবন্ত হইয়া উঠিল। সেও বলিয়া উঠিল, তাই চল, তাই চল কমল ! কোথায় যাবে বল দেখি ?

বৃন্দাবন।

রসিকদাস শিহরিয়া উঠিল। বলিল, না না না। অস্ত্র কোথাও চল, ব্রজের চাঁদকে এ মুখ আমি দেখাতে পারব না।

কিছুক্ষণ নীরবতার পর আবার সে কহিল, জান কমল, সেদিন থেকে আজ পর্যন্ত গোরাক্ষদের মন্দিরে যাই নাই।

কমলের মরিতে ইচ্ছা করিল। আপনার পানে চাহিতেও যেন তাহার ঘৃণা বোধ হইতেছিল। সে মহাস্তকেই প্রণাম করিল, আমার মাঝে কি এতই পাপ আছে মহাস্ত ?

রসিক সে-কথার কোন উত্তর দিতে পারিল না। একান্ত অপরাধীর মত নতমস্তকে মাটির দিকে চাহিয়া রহিল। কমল চোখ মুছিতে মুছিতে আবার বলিল, বেশ, কোথাও গিয়ে কাজ নাই। চল, পথে পথেই ঘুরব আমরা।

আঃ, রসিক যেন বাঁচিয়া গেল। পথে—পথে—পথে—পথে ! সঙ্গে সঙ্গে সে উঠিয়া দাঁড়াইল। বলিল, তাই চল রাইকমল, তাই চল। আজই চল। তাহার মনে হইল, পথের ধূলার মধ্যেই কোথায় আছে যেন মুক্তি। ঘর নয় কুঞ্জ নয় বিশ্রাম নয় অভিসার নয়, শুধু চলা। —চল, আজই চল।

কমল হাসিয়া বলিল, 'ওঠ' বলতেই কাঁধে ঝুলি ! ঘর-দোরের একটা ব্যবস্থা করতে হবে তো ?

বাধা দিয়া রসিক বালল, থাক থাক, পড়ে থাক ঘর-দোর ! ঘর যখন আর বাঁধব না, তখন ঘর বিক্রি করে, ঘর সঙ্গে নিয়ে কি হবে ? সখি, বৈরাগী বাউল—হতে হয় হারিয়ে ছু কুল।

কমল আর আপত্তি করিল না। সে বলিল, যা খুশি তোমার তাই কর মহাস্ত।

পরাজিত বন্দী বৈরাগী মুক্তির আশায় কাঁধে ঝোলা লইয়া মাথায় বাঁধিল নামাবলী। দাড়িতে আজ আবার বিহুনি পাকাইতে পাকাইতে অভিসারের গান ধরিল।

দীর্ঘদিন পর ঘর ছাড়িয়া পথের উপর দাঁড়াইয়া অকস্মাৎ রসিক-হইয়া উঠিল যেন পিঙ্গরমুকু

পাখি—প্রগাঢ় নীলিমার মধ্যে সঙ্করমাণ, মূখর। রসিক পায়ে পরিয়াছে নুপুর; হাতের একতারাটিতে উঠিয়াছিল অবিরাম ঝঙ্কার, সে নিজে গাহিয়া চলিয়াছিল গানের পর গান। দ্বিপ্রহরের সময় একথানা বর্ষিষ্ণু গ্রামের বাজারের মুখে পথের পাশে পুকুরের বাঁধা ঘাট দেখিয়া পথবিহারী নরনারী দুইটি ঘর পাতিল।

রসিক গাছতলা পরিষ্কার করিয়া উনান পাতিল, কাঠকুটা ভাঙিয়া সংগ্রহ করিল। তারপর ডাকিল, এস গো ঘরের লক্ষ্মী।

কমল স্নানান্তে আসিয়া একটু হাসিল। রান্নার ব্যবস্থায় বসিয়া দেখিয়া শুনিয়া বলিল, ঝুলির ভাঁড়ারে যে ছুন নাই গো ঘরের কৰ্ত্তা!

মহাস্ত ছুন আনিতে গেল। ছুনের ঠোঙা হাতে ফিরিয়া দেখিল, কমলকে দ্বিরিয়া দর্শকদের ভিড় লাগিয়া গিয়াছে।

পরম কৌতুকে রসিকদাস দর্শকদের পিছনে দাঁড়াইল। দৃষ্টি পড়িল তাহার কমলের পানে। হাঁ, দেখিবার মত রূপ বটে। ভিজা এলোচুলের প্রান্তদেশ একটি গিট দিয়া ভাঁজ করিয়া মাথার উপর তোলা। আগুনের আঁচে হৃন্দর মুখখানি সিদ্ধুরের মত রাঙা হইয়া উঠিয়াছে। নাকে রসকলি, কপালে তিলক জলজল করিতেছে। দর্শকদের সে দোষ দিতে পারিল না। দর্শকদের দল কিন্তু দেখিয়াই নিরন্ত ছিল না। প্রেমের পর প্রেম বর্ষণ হইতেছিল।

প্রেমের কিন্তু জবাব ছিল না। কমল নীরবে মর্ষাদাভরে গরবিনীর মত বসিয়া ছিল। কোন দিকেই তার ভ্রক্ষেপ নাই।

একজন বার বার প্রশ্ন করিতেছিল, কি নাম গো বোষ্টুমী? কোথা বাড়ি?

পিছন হইতে রসিক উত্তর দিল, নাম রাইকমল। বাস রসকুঞ্জে।

কথার শ্রীে পিছন ফিরিয়া সকলে একবার রসিকের দিকে চাহিল। কে একজন প্রশ্ন করিল, ও আবার কে হে?

রসিক কমলের পাশে আসিয়া সেই লতার লাঠিটা মাটিতে ঠুকিয়া বলিল, আজ, আমার নাম খেঁটে-হাতে আন্নান ঘোষ গো প্রভু। বোষ্টুমীর বোষ্টম গো আমি।

দর্শকের দল খসিতে শুরু করিল।

কৌতুকে মহাস্ত হাসিয়াই নারা হইল। নিজীব বৈরাগী আজ মুক্ত বায়ুর স্পর্শে যেন বাঁচিয়া উঠিয়াছে।

আপনার মনে গুনগুন করিতে করিতে সে ডাকিয়া উঠিল, রাইকমল!

কমল স্নান হাসি হাসিয়া বলিল, তবু ভাল। কতদিন পরে আজ 'রাইকমল' বলে ডাকলে!

ঘর-ছাড়ার কোন আনন্দে বৈরাগী আজ মাতোয়ারা, কে জানে! রসিকের শুক রসসাগর যেন উথলিয়া উঠিয়াছে। স্মিতহাস্তে কৌতুকোচ্ছল চোখে সে বলিয়া উঠিল, তাই ভাল, তাই ভাল রাইকমল, আজ মানই তুমি কর। গেরস্থের দোরে দোরে আজ আমি মানের পালা গাইব।

কমল হাসিল। হাসিয়া বলিল, গান তুমি গাইতে পার মহাস্ত, কিন্তু মান তো ভাঙাতে পারবে না। নারীর সঙ্গ বাউল-বৈরাগীর পাপ, লজ্জা—সে তো তুমি ভুলতে পারবে না।

খুব জোয়ের সহিত বাউল বলিয়া উঠিল, খুব পারবো গো রাইমানিনী, খুব পারব। পাপ-লজ্জা ঘরের বস্তু, ঘরেই ফেলে এসেছি। তাই তো আজ আবার তুমি আমার রাইকমল—কৃষ্ণ পূজার কমল-মালা।

পথে পথে চলে বৈষ্ণব-বৈষ্ণবী। গৃহস্থের দ্বারে হাত পাতিয়া দাঁড়ায়। পথের পর পথ, গ্রামের পর গ্রাম পিছনে পড়িয়া থাকে। গঙ্গা অনেক পিছনে পড়িয়াছে। অজয়ের তীরে তীরে পথ।

চলিতে চলিতে মাস-দুই পরে একদিন কমল পথের উপর চমকিয়া দাঁড়াইয়া গেল। কহিল, এ কোথায় এলাম মহাস্ত ?

রসিক চারিদিক চাহিয়া দেখিয়া শুধু বলিল, রাইকমল !

মাঝার টানে, না, পথের ফেরে কে জানে, পথের মাঝে দুইটি এ কোথায় আসিয়া দাঁড়াইয়াছে ?

ওই দূরে অজয়ের তীর। ঘন শরবন চলিয়া গিয়াছে কূলে কূলে। এই তো বনগঙ্গারী-লালের রাসমঞ্চ।

বনগঙ্গারীলাল এখানকার প্রাচীন জমিদারের গোবিন্দ-বিগ্রহ। এই অঞ্চলে অজয়ের কূলে কূলে বনগঙ্গারীলালের লীলাক্ষেত্র তৈয়ারি করিয়া গিয়াছেন বনগঙ্গারীদেবের সেবাহিত—রাসমঞ্চ, দোলমঞ্চ, ঝুলনকুঞ্জ। এখান হইতে ওই অনতিদূরে তাহাদের গ্রাম। ওই তো !

উভয়েই একটা দীর্ঘনিঃশ্বাস ফেলিল।

কমল বলিল, ফেরো মহাস্ত।

রসিক ষাড় নাড়িয়া উত্তর দিল, না রাইকমল। মা যখন টেনেছেন, গোবিন্দ যখন এনেছেন, তখন মাঝের কোলে জিরাজি বাস না করে ফিরব না।

তাহারা আসিয়া দাঁড়াইল রসকুঞ্জের দ্বারে। দ্বার বলিলে ভুল হইবে, রসকুঞ্জের ধসিয়া-পড়া ভিটার প্রান্তে।

মনের কোণে মমতা কোথায় লুকাইয়া ছিল, নয়ন-পথে অকস্মাৎ আত্মপ্রকাশ করিল। চোখে জল আসিল।

কমলদের আখড়ার অবস্থাও তাই। তবে অটুট আছে শুধু জোড়ালতার কুঞ্জটি, আর চারিপাশে ঘন বেটনীটি। কুঞ্জভলের রাঙা মাটিতে নিকানো সেকালের সেই স্থপরিচ্ছন্ন অঙ্গনটির উপর জাগিয়াছে সবুজ ঘাসের আশ্রয়। পথবাসী মাঝে দুইটি সেই ছায়াতলে বসিয়া পড়িল। অনির্বচনীয় নিবিড় একটি মমতার মোহ তাহাদের মন ও চৈতন্যকে যেন আচ্ছন্ন করিয়া ফেলিল। নির্বাক হইয়া বসিয়া উভয়ে চিরপরিচিত পারিপার্শ্বিকের সহিত আজ আবার যেন নূতন করিয়া পরিচয় করিয়া লইতেছে।

কতক্ষণ পর কমল বলিয়া উঠিল, বড় মায়া হচ্ছে মহাস্ত। ফেলে যাবার কথা মনে করতেও

‘কষ্ট হচ্ছে, মন যে থাকতে চাইছে।

রসিক তখন গান ধরিসা দিয়াছে—

বহুদিন পরে বঁধুয়া আইল

দেখা না হইত পরান গেল।

কমল তাহার সঙ্গে যোগ দিল। চোখ তাহার সজল হইয়া উঠিল। গানের শেষে মহাস্ত
বলিল, আর যাব না রাইকমল। বাতাসে মাটিতে আমাকেও যেন জড়িয়ে ধরেছে।

কমল নীরবে আমগাছটির দিকে চাহিয়া ছিল।

রসিক আবার বলিল, আমাকে কিন্তু রসকুঞ্জে থাকতে দিতে হবে।

তিরু হাসিয়া কমল বলিল, তাই হবে গো, তাই হবে, তোমার কুঞ্জেই তুমি থাকবে। ভয়
নাই, ধ্যান তোমার ভাঙবে না।

মহাস্ত বলিল, না গো না, আসব আমি। শাওনের বাদল রাতে ঝুলনায় তোমার দোল
দিতে আসব। রাসের রাতে ফুলের গল্পনা নিয়ে তোমার দরবারে আসব আমি। ফাস্তনের
পূর্ণিমায় আসব ফাগ-কুমকুম নিয়ে।

তীব্র ব্যঙ্গভরে হাসিয়া কমল বলিয়া উঠিল, একটি লীলা যে বাকি থাকল ঠাকুর—গিরি-
গোবর্ধনধারণ।

রসিক অপ্রতিভ হইল না। কহিল, ভুল করলে যে রাইকমল। আমি তো সে হয়ে
আসব না তোমার দরবারে রাইমানিনী। আমি হব তোমার বৃন্দে, তোমার ললিতা, তোমার
মালাকর, তোমার কুঞ্জদ্বারের দ্বারী। কটা দিনের কথা ভুলে যাও—হারিয়ে ফেল, মুছে দাও
জলের আল্পনায় মত।

কমল তাহার মুখের দিকে চাহিয়া কহিল, মালা কি মতিই ফাঁসি হয়ে গলায় লেগেছে মহাস্ত
যে ছিড়তেই হবে?

দূর, দূর, বাজে বকে সময় মাটি। বলি ওগো বোঁধুঁমী, পেটের কথা ভাব। চল, দোরে
দোরে ছুটো মেগে আসি।

মহাস্ত একতারায় বাক্য দিয়া উঠিল।

মান হাসি হাসিয়া কমল বলিল, চল। কিন্তু শাক দিয়ে কি মাছ ঢাকা যায় মহাস্ত?

পথ চলিতে চলিতে কমল সহসা বলিয়া উঠিল, মহাস্ত, আর একদিন এই কথাটাই তোমায়
জিজ্ঞেস করেছিলাম, আজ আবার জিজ্ঞেস করি—আমায় মাঝে কি এতই পাণ আছে?

মহাস্ত পথ চলিতেছিল, সঙ্গে সঙ্গে হাতে বাজিতেছিল একতারা, পায়ে তালে তালে বাজি-
তেছিল নুপুর।

একতারা নীরবে হইয়া গেল, পায়ে নুপুর বাজিয়া উঠিল বেতলা। মহাস্ত কোনও উত্তর
খুঁজিয়া পাইল না।

হঠাৎ কমল দাঁড়াইল।

রসিকদাস বলিল, দাঁড়ালে যে?

কমল আপনার অঙ্গের পানে চাহিল। চিকণ উজ্জল স্বক ঘোঁড়ের ছটায় কমল করিতেছে নিখাদ সোনার মত। বুকের নিঃশ্বাসে তো কই কালি নাই—কোন গন্ধ নাই? তবে? মন তাহার বলিয়া উঠিল, কোথায় পাপ? কিসের পাপ? সে আর মহাস্তকে প্রশ্ন করিল না।

মহাস্ত বলিল, কাজুর বাড়ি আগে যাই চল।

কমল বলিল, না। তা হলে সে আর ছাড়বে না। সমস্ত গাঁ কিরে শেষে তার বাড়ি যাব।

প্রথম গৃহস্থের দুয়ারে আসিয়া কমলই কহিল, বাজাও মহাস্ত, একতারায় স্বর দাও।

দুয়ারে দুয়ারে বৈষ্ণব-বৈষ্ণবী গান গাহিয়া ভিক্ষা মাগিয়া ফেরে। গ্রামের জন তাহাদের কুশলবার্তা জিজ্ঞাসা করে। মহাস্ত গানেই উত্তর দেয়—

বল বল তোমার কুশল শুনি,

তোমার কুশলে কুশল মানি।

মেয়েরা কিন্তু ছাড়ে না। তাহারা তাহাদের কুশল শুনিয়া তবে ছাড়ে। কমলকে দেখিয়া স্নিতমুখে তাহারা বলিয়া উঠে, এ যে লক্ষ্মী-ঠাকুরনটি হয়েছিল কমলি—আঁ!।

নিজেরা দেখিয়া তৃপ্ত হয় না, তাহাদের গৃহের মধ্যে কেহ থাকিলে তাহাকেও তাহারা ডাকে, দেখে যাও গো মাসী। আমাদের সেই কমলি এসেছে, দেখে যাও।

মাসী আসিয়া কমলকে দেখিয়া বলে, নবদ্বীপের জলের গুণ আছে।

কমলের মুখ লজ্জিত স্নিতহাস্তে ভরিয়া উঠে। উত্তর দেয় রসিকদাস। সে বলিয়া উঠে, সে যে গোরীচাঁদেরদেশ, রূপের সায়র গো। কোঁতুকচপল পল্লীর মেয়েরা পরিহাস করিতে ছাড়ে না। তাহারাবলিয়া উঠে, তা বটে। তোমারও চেহারার জলুস হয়েছে দেখছি।

কথার শেষে তাহারা মুখে কাপড় দিয়ে হাসে।

রসিকদাস কিন্তু অপ্রস্তুত হয় না। স্নিতমুখে সে জবাব দেয়, কাল যে কলি গো, নইলে শুকনো গাছেও ফুল ফুটত।

মুখের চাপা কাপড় ভেদ করিয়া এবার তরুণী-কণ্ঠের অবোধ হাসি উচ্ছলিত হইয়া উঠে।

রসিকের কাছে পরাজয় মানিয়া এবার আবার তাহারা কমলকে লইয়া পড়ে। জিজ্ঞাসা করে, কমলি, এখনও সৌন্দা আছিস নাকি? তোর বোষ্টম, কই লো?

রসিকদাসকে এবার লজ্জায় নীরব হইতে হয়। কমলই জবাব দেয় স্নিতমুখে, এই যে আমার মহাস্ত।

মেয়েদের বিশ্বয়ের অন্ত থাকে না। কিন্তু বিশ্বয়ের ঘোর ক্রাটিতেই তাহারা কলস্বরে হাসিয়া উঠে। কেহ কেহ বলিয়া উঠে, কাল কলি হলে কি হবে মহাস্ত, নামের গুণ যায় নাই। শুকনো গাছেও ফুল ফুটেছে।

মহাস্ত অকারণে ব্যস্ত হইয়া উঠে। বলে, ভিক্ষে দাও গো। পাঁচ-দোর ঘুরতে হবে আমাদের।

রঞ্জনদের বাড়ির কাছাকাছি আসিয়া মহান্ত বলিল, রাইকমল, আজ আর থাক। দুটো পেট এতেই চলে যাবে।

কমল বলিল, বাঃ, তাই কি হয়? আমার লঙ্কার বাড়ি না গেলে বলবে কি?

এতটুকু বিধার লেশ সে কণ্ঠস্বরে ছিল না। মহান্ত সবিস্ময়ে তাহার মুখের দিকে চাহিল। আনন্দোজ্জ্বল মুখ, সম্মুখপথে নিবন্ধ দৃষ্টি কমলের। দুয়ারের পর দুয়ারে ভিক্ষা সারিয়া রঞ্জনদের দুয়ারে আসিয়া কমল বলিয়া উঠিল, মহান্ত, একি?

রঞ্জনদের বাড়িঘর সমস্ত একটা ধ্বংসাত্মকের মত পড়িয়া আছে।

মহান্ত ডাকিল, রাইকমল।

কমল মুখ ফিরাইল, হাসিয়া বলিল, বল?

মহান্ত বলিল, কিরি চল।

কমল হাসিয়া বলিল, চল।

পথে দাঁড়াইয়া ছিল একটি মেয়ে। সঙ্গে চার-পাঁচটি ছেলেমেয়ে। সে অকস্মাৎ বন্ধার দিয়া উঠিল, মাথা খাব তোমার, নাকে ঝামা ঘষে দোব। এত দেমাক তোর কিসের লা? আমাকে হেনস্তা—কেন, কেন শুনি?

কমল বলিল, কাহু!

কাহু আবার বন্ধার দিয়া উঠিল, কাহু কিসের লা? বল ননদিনী!

তারপর সহসা স্নেহকোমল স্বরে অত্যাশ্রয় করিয়া বলিল, এই দুপুর-রোদে কমলভোগ দেখা দেখি। বলি, আমি কি আজ খেতে দিতে পারতাম না? আয় আয়, জল খাবি আয়। এস গো মহান্ত। না, তুমি বুঝি আবার দাদা হয়েছ। বলিয়া সে খিলখিল করিয়া হাসিয়া উঠিল।

সাত

কাহু সমারোহের সহিত জলখাবারের আয়োজন করিয়াছিল। দাওয়ায় বসাইয়া সে নিজে পাখার বাতাস দিতে বসিল।

তারপর মুখ টিপিয়া হাসিয়া বলিয়া উঠিল, শেষকালে এঁদোপুকুরে ডুবে মলি ভাই বউ! ওই বগ-বাবাজী—বুড়ো বগের গলায় মালা দিলি?

কমল মুখ তুলিল, ঠোট দুইটি তাহার খরখর করিয়া কাঁপিতেছিল।

সবিস্ময়ে কাহু বলিল, বউ।

লঙ্কা—আমার লঙ্কার বাড়ি! কান্নার আবেগে কমলের কথা শেষ হইল না। চোখের কোল দুটি তখন পরিপূর্ণ অশ্রুভারে উথলিয়া উঠিয়াছে।

লঙ্কা স্বপ্নার সহিত কাহু বলিয়া উঠিল, তার নাম আমার কাছে করিস না। ছি-ছি-ছি!

কমল কিছু বুঝিতে পারিল না। কাহু আবার বলিল, পরীকে মনে আছে তোব? পরী

বিধবা হল তোরা এখান থেকে যাবার কিছুদিন পরেই। সেই পরীকে নিয়ে রঞ্জন দেশান্তরী হল। রঞ্জনের বাবা, রঞ্জনের মা লজ্জায় ঘেমায় কাশী চলে গেল। সেইখানেই তারা মরেছে।

কমল মাটির দিকে চাহিয়া বসিয়া ছিল। চোখের সম্মুখে তাহার মাটি যেন পাক খাইয়া ঘুরিতেছিল। তাহার বুকের মধ্যে তুফান বহিতেছিল। হায়, এত বড় বঞ্চনায় সে বাঁচিবে কি করিয়া?

কাহ্ন বলিল, তার জন্তে দুঃখ করিস না বউ। সে যে তোর মোহ এড়িয়েছে, সেই তোর ভাগ্যি। তার বাপ-মায়ের মৃত্যুর পর সে এখানে একবার এসেছিল বিষয় বিক্রি করতে। কি বললে আমাদের জানিস?

কমল মাটির দিকে চাহিয়া ছিল—মাটির দিকেই চাহিয়া রহিল। কাহ্ন বলিল, দেখলাম রঞ্জন বোষ্টম হয়েছে। আমি একদিন ডেকে বললাম, আচ্ছা রঞ্জনদা, বোষ্টমই যদি হলে তবে কমলকে দেশান্তরী করলে কেন? তাকে তুমি ভুললে কি করে? আমরা উত্তর দিলে, কাহ্ন, পরী খুব ভাল মেয়ে, তুমি জান না। আর সে ছেলেবেলার খেলাধুলার কথা ছেড়ে দাও। বয়সের সঙ্গে তফাত হলেই সব ভুলে যেতে হয়।—ও কি, ও কি ভাই, কিছুই যে খেলে না! না না, একটা মণ্ডা অস্বস্ত খা।

হাসিবার চেষ্টা করিয়া কমল বলিল, ঝুচছে না ভাই ননদিনী, ননদিনীর দেওয়া মিষ্টি মুখে ঝুচছে না। তেতো নয়, বিষ নয়, ননদিনীর হাতের মিষ্টি কি মুখে ভাল লাগে! যে খবর দিয়েছিল, তাতেই পেট ভরেছে। তারপর গম্ভীরভাবে সাঙ্কনা দিয়া বলিল, আজ থাক ভাই! পালাচ্ছি না তো। কত খাওয়াবি খাওয়াস পরে।

কাহ্ন তাহার বুকের তুফানের সন্ধান পাইয়াছিল। সে আর জেদ করিল না। কমল উঠিয়া দাঁড়াইয়া ভিক্ষার ঝুলিটি মেজিয়া ধরিল। রহস্যের ভানে সে আত্মগোপন করিবার চেষ্টা করিতেছিল।

ভিক্ষার ঝুলিটি প্রসারিত করিয়া সে বলিল, ভিক্ষে পাই ননদিনী-ঠাকরুন।

কাহ্নর কিন্তু চোখে জল আসিল। সে বেদনাভরেই কহিল, শেষ-ভিক্ষে তো দিয়েছি বউ, ননদিনীর কাজ তো করেছি।

কমল হাসিয়া উঠিল। কিন্তু সে হাসি এত ব্যর্থ, এত মেকি যে তাহার নিজের চোখেই জল আসিল।

কাহ্ন বলিল, আমার কাছে লুকোচ্ছিল বউ? তা লুকোতে পারিস। আমাদের তা হলে তুই পর ভাবিস!

কমল তাহার হাত দুইটি ধরিয়া শুধু বলিল, কাহ্ন! •

মুখরা কাহ্নর মুখে রান লকরণ হাসিটি বিচিত্র শোভায় ফুটিয়া উঠিল। সে বলিল, তা হলে তুই আর আমার কাছে তোর দুঃখ লুকোতে চেষ্টা করতিস না। মা হ'ল নাই তুই বউ, নইলে বুঝতে পারতিস খাঁটি ভালবাসায় স্বাস্থ্যের কাছে স্বাস্থ্যের কিছু গোপন থাকে না। কথা-না-ফোটা ছেলে কাঁদে। মা বুঝতে পারে, কোনটা তার কিদের কাঁদে, কোনটা রোগের

কান্না, কোনটা রাগের কান্না। চোখের জল তোর গাল বেয়ে ঝরল না, কিন্তু আমি বেশ দেখতে পাচ্ছি, সে-জলে বুকের ভেতর তোর সায়র হয়ে গেল।

কমল নতমস্তকে এ ভিরকার মাথা পাতিয়া হইল। এতক্ষণে চোখের জল মুক্তদ্বারায় পায়ের 'তলার মাটি স্থলিত করিয়া তুলিল।

রসিকদাস বাহিরে বসিয়া পাঁচজনের সঙ্গে আলাপ করিতেছিল। সে আবার বাহির হইতে মাড়া দিয়া উঠিল, ননদ-ভাজে এত গলাগলি কিসের গো?

কমল তাকাতাড়ি চোখের জল মুছিয়া ফেলিয়া বলিল, যাই আমি ননদিনী।

কাহ্ন বলিল, আজ এইখানে রান্নাবান্না কর।

না, আজ নয়। বহুদিন পর ভিটের কোলে ফিরে এসাম ভাই। আজ ভিটের মাটিতেই পাতা পেড়ে খাব।

কাহ্ন আর আপত্তি করিল না।

লতামণ্ডপের তলদেশটিতে কমল সেদিনের মত গৃহস্থলী পাতিল। মহাস্ত মুদীর দোকানে কয়টা জিনিস আনিতে গিয়াছিল। ফিরিয়া দেখিল, ইটের উদান তৈয়ারী করিয়া ঝরা পাতার ইন্ধনে কমল হুঁ পাড়িতেছে। মুখখানি রক্তরাঙা, চোখের জলে নিটোল গাল দুইটি চকচক করিতেছে।

মহাস্ত যেন কেমন হইয়া গেল। কমলের বুকের উজ্জ্বলের সংবাদ তাহারও অজ্ঞাত ছিল না। একটা প্রবচন আছে, 'ছেলে কোলে মরে জলে ফেলব; তবু না পোস্তপুত্র দিব'। বৈরাগীর অন্তরের স্বামিস্বটুকু এমনই একটি ঈর্ষার আগুনে জলিয়া মরিতেছিল। তাহার জিহ্বাগ্রে কয়টা কঠিন কথা আসিয়া পড়িল। সে বলিয়া ফেলিল, বলি ও চোখের জল ধোঁয়ার, না মায়ার গো রাইকমল?

মুহূর্তে আহত কণিনীর মত উগ্র ভঙ্গীতে কমল মুখ তুলিয়া মহাস্তের দিকে স্থিরদৃষ্টিতে চাহিল। কিন্তু বিচিত্র রাইকমল, দেখিতে দেখিতে দৃষ্টিতে ভীততা তাহার কোথায় মিলাইয়া গেল। ছলছল চোখে লকরণ হাসি হাসিয়া কমল ধীরে ধীরে কহিল, মায়াই বটে মহাস্ত।

মহাস্ত বিবর্ণ হাসি হাসিল, কোন উত্তর দিল না। কতক্ষণ পরে একটা দীর্ঘনিশ্বাস ফেলিয়া বলিল, আমাকে বিদায় দাও তুমি।

কমল স্থিরদৃষ্টি তুলিয়া তাহার দিকে চাহিল, তারপর আবার মুখ নামাইয়া কাজে মন দিল।

মহাস্ত কমলের হাত ধরিয়া অতি কোমল কণ্ঠে কহিল, রাইকমল!

কমল হাতখানা টানিয়া লইল। বিদ্যুৎ-বলকের মত প্রখর হাসি কমলের অধরে জাগিয়া উঠিয়া তখনই মিলাইয়া গেল। সে বলিল, আমার মধ্যে পাশ আছে মহাস্ত।

অতি সুন্দর হাসি হাসিয়া মহাস্ত বলিল, না না কমল। পাশ তোমার নয়, পাশ আমার। আমাকে বিদায় দাও তুমি।

কমল বলিল, না। আবার সে নীরবে উনানের ধুমায়মান আগুনে হুঁ পাড়িতে লাগিল।
সেই দিকে চোখ ফিরাইয়া মহাস্ত একসময় আপন মনেই গাহিতে লাগিল—

হৃথের লাগিয়া

এ ঘর বাধিহু

অনলে পুড়িয়া গেল।

গান থামাইয়া মহাস্ত ডাকিল, রাইকমল!

কমল সে আহ্বান গ্রাহ্য করিল না। মহাস্ত হাসিমুখেই বলিল, বৈষ্ণবী, একটা প্রাণের কথা শোন—

সখি, সুখ দুখ দুটি ভাই।

হৃথের লাগিয়া

যে করে পীরিত্তি

দুখ যায় তার ঠাই।

আট

এই ঘর ভাঙিয়া বাউল ও বৈষ্ণবী একদিন পথে বাহির হইয়াছিল, সঙ্কল্প ছিল, আর কখনও ফিরিবে না। আবার পথের ফেরে সেইখানে ফিরিয়া দুইটা দিন থাকিবার জন্ত গাছতলায় সংসার পাতিয়াছিল। সে সংসার আর তাহারা ভাঙিতে পারিল না। কমল যেন বাসা বাঁধিতে বলিল। রসিকদাসও বলিল না, চল, বেরিয়ে পড়ি। কয়েক মাস না যাইতে ভাতা ঘর পরম যত্নে তাহারা আবার গড়িয়া তুলিল। মায়ের কোলের মমতার জন্ত, না পথের বৃকেও স্থখ পাইল না বলিয়া, সে-কথা তাহারাও হয়তো বেশ বুঝিল না।

পাশাপাশি দুইখানি আখড়া আবার গড়িয়া উঠিল। নীড় রচনার সমারোহের মধ্যে দিন-কয়েক বেশ আনন্দের কাটিয়া গেল। মহাস্ত কাটিল মাটি, কমল বহিল জল, মহাস্ত দিল দেওয়াল, কমল আগাইয়া দিল কানার তাল। মহাস্ত ছাইল চাল, কমল লেপিল রাঙা মাটি। মহাস্ত বসাইল দুয়ার জানালা, কমল দুয়ার-জানালায় পাশে পাশে রচনা করিল খড়ি ও গিরিমাটির আলপনা। নীড় সম্পূর্ণ হইল, সে নীড়ের দুয়ারে আবার অতিথি দেখা দিল। সেই পুরানো বন্ধু—ভোলা, বিনোদ, পঞ্চানন। সন্ধ্যায় কীৰ্তনের আসর বসে। তাহারা আনন্দ করিয়া চলিয়া যায়। কমল রাধিয়া বাড়িয়া ডাকে, মহাস্ত!

মহাস্ত তখন চলিয়া গিয়াছে। রসকুঞ্জে আসিয়া কমল বলিল, না খেয়ে যে চলে এলে?

কণ্ঠস্বরের মধ্যে প্রচ্ছন্ন ক্রোধ ও অভিমান।

রসিক হাসিয়া বলিল, শরীর ভাল নাই কমল। •

কমলের কণ্ঠস্বরের ভঙ্গী পরিবর্তিত হইয়া গেল। সে আশঙ্কাতরে জিজ্ঞাসা করিল, কি হল গো? অরুচির হবে না তো? কই, দেখি, গা দেখি?

কিন্তু নিত্যনিবন্ধিত ব্যাধি হইলে, সে ব্যাধির স্বরূপের সহিত মাহুকের পরিচয় হইয়া যায়।

কল্পদিন পর কমল সেদিন বলিল, দেহেই হোক আর মনেই হোক মহাস্ত, ব্যাধি পুষে রাখা ভাল নয়। ব্যাধি তুমি দূর কর।

রসিকদাস শুধু তাহার মুখের দিকে চাহিয়া রহিল। কমল বলিল, সেদিন তুমি বলছিলেন, বিদায় দাও। সেদিন পারি নাই। আমার যা হবে হোক মহাস্ত, তোমাকে আমি বিদায় দিচ্ছি।

রসিক চমকিয়া উঠিল, বলিল, এ কথা কেন বলছ কমল?

ক্লিষ্ট হাসি হাসিয়া কমল বলিল, ব্যাধি তো তোমার আমি মহাস্ত। ব্যাধিকে বিদায় করাই ভাল।

রসিক মাথা হেঁট করিয়া মাটির দিকে চাহিয়া বসিয়া রহিল। বহুকণ পর সে ডাকিল, কমল, রাইকমল!

জনহীন প্রান্তর নিখর পড়িয়া, কমল বহুকণ চলিয়া গিয়াছে। কথাটি বলিয়া সে আর অপেক্ষা করে নাই।

পরদিন হইতে রসিকদাস যেন উৎসব জুড়িয়া দিল। মুখে তাহার হাসির মহোৎসব—আখ-ডায় মানের মহোৎসব! ভোলা আসিলে মহাস্ত আহ্বান করে, এস ভোলানাথ, গাঁজা তৈরি। ভোলা পরমানন্দে বলে, লাগাও মহাস্ত, দম লাগাও।

কলরবের স্পর্শ পাইয়া কমল মুখর হইয়া উঠে। ভোলার তৎপরতা দেখিয়া তাহার হাসি উচ্ছল হইয়া ভাঙিয়া পড়ে। পঞ্চানন আসিলে সে বলিয়া উঠে, তুমি নাম-গান কর পঞ্চানন।—বলিয়া সে নিজেই গান ধরিয়া দেয় বাউলের সুরে—

গাঁজা খেয়ে বিভোর ভোলা—

পঞ্চাননে গায় হরিনাম—পঞ্চানন—ভোলা—

ভোলা ধরে খোল, মহাস্ত করতাল লইয়া দোহারকি করে। দেখিতে দেখিতে কীর্তন জমিয়া উঠে। এমনই করিয়া আবার দিনকয়েক বেশ কাটিয়া গেল। সেদিন কমল ভোলাকে বলিল, ভোলা, দুখানা কাঠ কেটে দে না ভাই।

ভোলা কুড়ল লইয়া মাতিয়া উঠিল। কাঠ কাটিয়া ভোলা বলিল, মজুরি দাও কমল।

এখন কুলের সময় নয় রে ভোলা, নইলে কুলের ঢেলা ছুঁড়ে মজুরি দিতাম। কথাটা শেষ করিয়া কমল খিলখিল করিয়া হাসিয়া উঠিল। তারপর বলিল, মনে পড়ে তো?

ভোলাও হাসিল। বলিল, খুব।

রাত্রিতে নামকীর্তনের আসর ভাঙিয়া গেল। সকলে চলিয়া গেলে ভোলা তামাক শাঙিতে বসিল। মহাস্ত খাওয়া শেষ করিয়া উঠিল। ভোলা তখনও তামাক টানিতেছিল।

মহাস্ত বলিল, ভোলানাথ, এস।—বলিয়া সে চলিয়া গেল।

ভোলা পরম ঔদাসভরে বসিল, বসি আর একটু!

কিছুকণ পর মহাস্ত আবার কিরিয়া আসিল, আমার কলকেটা। কলকে লইয়া মহাস্ত কমলকে বলিল, রাত অনেক হল রাইকমল।

উত্তর হইল, জানি মহান্ত ।

মহান্ত স্তম্ভিত হইয়া গেল । এমন উত্তর সে প্রত্যাশা করে নাই ।

কমল এবার তাহার দিকে ফিরিয়া বলিল, ফুল মাথায় তোলবার আগে তাতে পোকা আছে কিনা বেছে নিতে হয় মহান্ত । নইলে শিরে দংশন যদি হয়, তাতে আর ফুলেরই বা কি দোষ, পোকোরই বা কি দোষ !

ফুল তো—কথাটা বলিতে গিয়া মহান্ত ধামিয়া গেল । আবার সঙ্গে সঙ্গেই একমুখ হাসিয়া সে বলিল, গোবিন্দের নির্মাল্য রাইকমল, তাতে কীটই থাক আর কাঁটাই থাক, মাথা ভিন্ন রাখবার আর ঠাই নাই আমার ।

কমল বলিল, কালি মাথিয়ে সাদা ঢাকা যায় মহান্ত, কিন্তু কালি মাথিয়ে আলো ঢাকা যায় না । ফুল তুমি নিজে মাথায় তোল নাই, সে কথা একশো বার সত্যি । আজ তোমায় জোড়হাত করে বলছি, আমায় রেহাই দাও ।

মহান্ত কোন উত্তর না দিয়া ধীরে ধীরে চলিয়া গেল । ভোলা গাঁজা খাইয়া বম হইয়া বসিয়াছিল । কমল ভোলাকে কহিল, বাড়ি যা ভাই ভোলা ।

ওদিকে রুদ্ধ ঘরের মধ্যে মহান্ত প্রোচ বাউল অন্তরবাসী গোবিন্দের পায়ে মাথা কুটিতেছিল, গলার মালা আমার মাথায় তুলে দাও প্রভু, মাথায় তুলে দাও ।

কিছুক্ষণ পরে উন্নতের মত নির্জন ঘরখানি মুখরিত করিয়া বলিয়া উঠিল, না না, আমায় রূপ দাও । শ্রামন্তন্দর, আমার হৃন্দর করে দাও । আমার সাধনা-পুণ্য সব নাও ।

উন্নততার মধ্যে এই একান্ত কামনা জানাইয়া সে শয়ন করিল ।

প্রভাতে তখন তাহার সে উন্নততা শাস্ত হইয়া আসিয়াছে কিন্তু দুর্ভাগ্যের মোহ যেন কাটে নাই, প্রভাতের আলোকে আপনার অঙ্গপানে সে চাহিয়া দেখিল । তাহার সেই কুরুপ তাহার একান্ত প্রত্যাশিত দৃষ্টিকে উপহাস করিল ।

পরদিন সমস্ত দিনটা সে কমলের আখড়া দিয়া গেল না । কি তাহার মনে হইল, কে জানে, বাহির করিয়া বলিল বাউলের পথ-সঙ্গল বড় স্থূলিটা । কয়টা স্থানে ছিড়িয়া গিয়াছিল, তাহাতে রঙিন কাপড়ের তালি দ্বিতে বসিল ।

ভোলা আসিয়া ডাকিল, কমল ডাকছে মহান্ত, এখনই চল ।

মহান্ত গাঁজার পুরিয়া বাহির করিয়া দিয়া বলিল, তোয়ের কর ।

কমলের আঁজাপালনের তাগিদ ভোলানাথ তুলিয়া গেল । গাঁজা খাইয়া সে কথা তাহার মনে পড়িল । সে ডাকিল, এস ।

কাঁধে ঝোলাটা ফেলিয়া মহান্ত উঠিল । কিন্তু পথে বাহির হইয়া বিপরীত মুখ ধরিয়া সে বলিল, কমলকে বলো, আমি ভিক্কাব বেরুলাম ।

ভোলা অবাক হইয়া বলিল, যাঃ গেল, গাঁজাখোরের রকমই এই ।

সন্ধ্যার আখড়াটা সেদিন কেমন স্ত্রিয়মাণ হইয়া ছিল । প্রদীপের আলোকে আঁজার

লোক' কয়টি বসিয়া গল্প করিতেছিল। কমল ঘরের মধ্যে শুইয়া আছে। কীর্তনের আসর আজ বসে নাই। রসিকদাস আসিয়া বলিল, একি ভোলানাথ, কীর্তনের আসর খালি যে ?

ভোলা বলিল, বোঁটুমীর অস্থখ। মাথা ধরেছে।

বোঁটুম তো আছে, এস এস।

রসিকদাস মৃদঙ্গটা পাড়িয়া বসিল। কিন্তু তবুও আসর জমিল না। অলক্ষণের মধ্যেই আসর শেষ হইয়া গেলে মহাস্ত আসিয়া ঘরের মধ্যে প্রবেশ করিয়া ডাকিল, রাইকমল !

কমল নিস্তরু হইয়া পড়িয়া ছিল—কোন উত্তর করিল না। বিছানার পাশে বসিয়া মহাস্ত আবার ডাকিল, কমল ! রাইকমল !

আমার মাথা ধরেছে মহাস্ত।

কমলের ললাটখানি স্পর্শ করিয়া মহাস্ত বলিল, মাথায় হাত বুলিয়ে দোব রাইকমল ?

কক্ষস্থরে কমল বলিয়া উঠিল, না না না। তোমার পায়ে পড়ি মহাস্ত, আমার রেহাই দাও।

বহুক্ষণ নীরবতার পর মহাস্ত ধীরে ধীরে বলিল, পারছি না রাইকমল। আজ গোবিন্দের মুখ মনে করে পথে বেরিয়েছিলাম। কিন্তু কিছুদূর না যেতেই গোবিন্দের মুখ ভুলে গেলাম। মনে পড়ল তোমার কমল-মুখ। হাজার চেষ্টা করেও ত্রিমুখ মনে আর এল না।

কমল বলিল, এত বড় পাপ আমার মধ্যে আছে যে, আমার মুখ মনে করলে গোবিন্দের মুখ মনে পড়ে না মহাস্ত ?

মহাস্ত নতমুখে বসিয়া রহিল। কমল বলিয়া গেল, তোমার আগুনে ভূমি কতটা পুড়লে তা জানি না মহাস্ত, কিন্তু পুড়ে মলাম আমি।

কিছুক্ষণ অপেক্ষা করিয়া মহাস্ত উঠিয়া চলিয়া গেল।

কমল উঠিল পরদিন সকালে। সঙ্কল্প লইয়া শয্যাভ্যাগ করিল, মহাস্তের হাতেই আজ নিশেবে নিজেকে তুলিয়া দিবে। আর সে পারে না ; এ আর তাহার লক্ষ্য হইতেছে না। ছয়ার খুলিয়া বাহিরে আসিতেই তাহার নজর পড়িল, রঙিন কাপড়ে বাধা ছোট্ট একটি পোটলা দরজার পাশেই কেহ যেন রাখিয়া দিয়া গিয়াছে। একটু ইতস্তত করিয়া সেটি তুলিয়া লইয়া সে খুলিয়া ফেলিল। লাল পদ্মের পাপড়ির শুকনো একগাছি মালা। মালাগাছি হাতে করিয়া সে নীরবে নিস্তরু হইয়া বসিয়া রহিল।

বেলা অগ্রসর হইয়া চলিল। ভোলা আসিয়া তামাকের সরঞ্জাম পাড়িয়া বলিল। তামাক সাজিতে সাজিতে সে প্রস্থ করিল, কই, মহাস্ত গেল কোথা ? আখড়ায় তো নাই !

কমল বলিল, জানি না।

তামাক খাইয়া ভোলা উঠিয়া গেল, আসর জমিল না। সন্দের সময় কাছ আসিয়া ডাকিল, বউ !

সচকিতের মত উঠিয়া কমল বলিল, চল যাই।

ঝড়া-গামছা লইয়া সে কাছর সঙ্গে চলিল। কাছ প্রস্থ করিল, ওটা আবার কি বউ, রঙিন

কাপড়ে জড়ানো ?

কমল বলিল, মালা । জলে বিসর্জন দিয়ে আসব জাই ।

কাহ্ন বিন্মিতের মত কমলের মুখের উপর চাহিয়া রহিল । কথাটা সে বুঝিতে পারিল না । কমল বলিল, মহাস্ত কাল রাত্রে চলে গেছে ননদিনী । এ মালা আমি তার গলায় দ্বিয়েছিলাম ।

কাহ্ন বলিল, ছিঃ, মহাস্তকে আমি ভাল মাহ্মষ মনে করতাম । তার—

কমল বাধা দিল, কহিল, না না । তুই জানিস না ননদিনী, তুই জানিস না । চোখে তাহার জল আসিল । চোখ মুছিয়া আবার বলিল, তা ছাড়া সে আমার গুরু, তার নিন্দে আমার স্তনতে নাই ।

নীরবে পথ চলিতে চলিতে কমল আবার বলিল, তোর সংসারের লক্ষ্মীর কোঁটো যদি কেউ সিঁদ কেটে চুরি করে কাহ্ন, তবে সে ঘরে সংসার পাততে কি সাহস হয়, না মন চায় ?

কাহ্ন বলিয়া উঠিল, ওসব কি অলক্ষণে কথা বলিস তুই বউ—ছিঃ !

কমল হাসিয়া বলিল, বাড়লের সংসারের গৃহদেবতা চুরি গিয়েছে ননদিনী ।

আবার কিছুক্ষণ পর সে বলিল, সে পাক, তার জামকে সে ফিরে পাক ।

নয়

ইহার পর কমল যেন আর এক কমল হইয়া উঠিল । মহাস্ত চলিয়া গেল, কিন্তু তাহার কোন সন্ধান সে করিল না । কাহাকেও করিতেও বলিল না । কেহ তাহাকে বারেকের জ্ঞাত বিবরণ হইয়া থাকিতে দেখিল না ।

রাত্রে ঘুমাইয়া কাদে কিনা, সে কথা ভগবান জানেন । সকালে উঠে কিন্তু সে হাসি মুখে লইয়া, সে হাসি অহরহই তাহার মুখে লাগিয়া থাকে । সামান্ত কারণে হাসিতে গানে উল্লাসে সে যেন উথলিয়া উঠিল । দেহলাবণ্যের মার্জনবিজ্ঞাস আরও বাড়িয়া উঠিল । কোঁকড়া কোঁকড়া ফুলো ফুলো একপিঠ চুল তাহার । সে-চুল সে পরিপাটি বিজ্ঞাস করিয়া রাখালচূড়া বাধে । ঝেং ঝাঁক নাকটির স্ববন্ধিম মধ্যস্থলেই শুভ্র তিলক-মাটি দিয়া একটি স্ফুট রসকলি আঁকে । তাহারই ঠিক উপরে কালো রেখা দুইটির মধ্যস্থলে সযত্নে তিলক-মাটিরই একটি টিপ পরে । গলায় থাকে ছকটি মিহি তুলসী কাঠের মালা ।

দেখিয়া দেখিয়া ভোলা বলে, শোভা কি মালার গুণে, শোভা হয় গলার গুণে ।

বাড়টি ছলাইয়া কমল মুহু মুহু হাসে ।

আখড়ার সেই উৎসব-সমারোহ যেন বাড়িয়া গিয়াছে ।

ভোলা আসে, বিনোদ আসে, পঞ্চানন আসে, আরও অনেকে আসে । দিনে দিনে তাহাদের দলবৃদ্ধি হয় । কিশোর যাহারা তাহাদের কেহ আখড়ার বাহিরে দাঁড়াইয়া দেখিলে কমল তাহার হাত ধরিয়া লইয়া যায় । প্রৌঢ়রা কেহ দুই-চারিদিন আখড়ার স্বস্থ দিয়া আনাগোনা করিলে পঞ্চম দিনে কমল তাহাকে ডাকে, এস মোড়ল, পারের ধূলো দিবে যাও ।

সন্ধ্যায় কমল গান ধরে, অপর সকলে হোঁহারকি করে। গ্রহরথানেক রাত্রে আখড়া ভাঙে। কমল বলে, এইবার বাড়ি যাও সব তাই। সবাই উঠি উঠি করে, কিন্তু কেহই যাইতে চায় না। কমল একে একে হাত ধরিয়া আখড়ার বাহিরে পথের উপর আনিয়া বলে, কাল সকালেই ঠিক এসো যেন। বাড়ি ফিরিয়া কমল ঘরের দরজা বন্ধ করিয়া দেয়।

কিছুক্ষণ পরে ভোলা ডাকে, কমলি! কমলি!

কাহারও কোন সাড়া পাওয়া যায় না। কোন কোন দিন সাড়া মিলে ঘরের মধ্য হইতে। কমল বলে, তুই আবার ফিরে এসেছিস?

ভোলা বলে, একবার তামাক খাব ভাই, দেশলাইটা দে।

উত্তর আসে, বাড়িতে—বাড়িতে তামাক খেগে যা। বউ সেজে দেবে।

ভোলা ডাকে, কমল!

কমল বলিয়া উঠে, দেখেছিস বাঁটি, আমায় বিরক্ত করবি তো নাক কেটে দোব। যা বলছি, বাড়ি যা। তোর বউয়ের, তোর মায়ের গাল খেতে পারব না আমি।

সত্যই ভোলার মা, শুধু ভোলার মা কেন, গ্রামের গৃহস্থজন সকলেই কমলকে গালাগালি দেয়। বলে, ছি! এই কি রীতিকরণ? রজনকে দেশছাড়া করলে, মহাস্তকে তাড়ালে, আবার কার মাথা খায় দেখ। যাকে দশে বলে ছি, তার জীবনে কাজ কি?

সমস্তই কমলের কানে পৌঁছায়, লোক স্বল্প দূরত্ব রাখিয়া সমস্তই তাহাকে শুনাইয়া বলে। এ ঘাটে কমল মান করে, কথা হয় পাশের ঘাটে। কমল পথ চলে, পিছনে থাকিয়া লোকে কথা বলে। কমল পিছনে থাকিলে তাহার আগে থাকিয়া লোকে ওই কথা বলিয়া পথ চলে।

কমলের হাসিমুখ আরও খানিকটা হাসিতে ভরিয়া উঠে। সেদিন ভোলার মা তাহাকে ডাকিয়াই বলিল, মর মর, তুই মর।

কমল হাসিল, বলিল, মনুষ্যজন বহু-ভাগে হয়েচে, সাধ করে কি মরতে পারি, না মরতে আছে?

ভোলার মা স্তম্ভিত হইয়া গেল। কমল কথা না বাড়াইয়া হাসিমুখেই চলিয়া গেল।

ভোলার মা পিছন হইতে আবার ডাকিল, শোন, শোন।

কমল বলিল, মাখন মোড়লের নতুন জামাই এসেছে খুড়ীমা, জামাই দেখতে যাচ্ছি, পরে শুনব। মাখন মোড়লের বাড়িতে নতুন জামাইয়ের আসন্ন হাসিতে গানে রসিকতায় গুলজার করিয়া দিয়া হঠাৎ সন্ধ্যার মুখে সে উঠিয়া পড়ে।

জামাই বলে, সে কি, এর মধ্যে যাবে কি ঠাকুরঝি? এই সন্ধ্যা লাগল।

কমল হাসিয়া বলে, আমার যে আন্নান ঘোষের একটি দল আছে তাই জামচাঁদ। ফিরতে দেরি হলে ঘর-দোর ভেঙে তছনছ করে দেবে হয়তো।

ব্যাপার চরমে উঠিল একদিন। গ্রামের নন্দী আনিয়া বলিল, পান আছে বোষ্টুমী? গোটা পান চাইলে গোমস্তা। জমিদার এসেছেন, পান আনতে ফুল হয়েছে।...গোটা পান দিয়া তাহাকে বিদায় করিয়াও, তাহার কি মনে হইল, সে পানের বাটা লইয়া পান

সাজিতে বসিল। একথানা ঝকঝকে রেকাবিতে পানের খিলিঙলি সাজাইয়া পাশে একটু চুন, কিছু কাটা সুপারি রাখিয়া হাসিমুখে সে কাছারিতে গিয়া হাজির হইল। রেকাবিটি সামনে নামাইয়া রাখিয়া গলার কাপড় দিয়া প্রণাম করিল। জমিদার সবিস্ময়ে মৃদুদৃষ্টিতে কমলের মুখের দিকে চাহিয়া রহিলেন। কমল হাসিয়া বলিল, আমি আপনার প্রজা—কমলিনী বোষ্টুমী। নন্দী গেল গোটা পানের জন্তে। পান কি পুরুষমানুষে সাজিতে পারে! তাই সেজে আনলাম।

জমিদার একটি পান তুলিয়া মুখে দিয়া বলিলেন, বাঃ! কেয়ার গন্ধ উঠছে দেখছি!

কমল হাসিয়া বলিল, আপনার পান এলে পাঠিয়ে দেবেন, আমি সেজে দোব।

সে জমিদারকে আবার একটি প্রণাম করিয়া চলিয়া আসিতেছিল। জমিদার বলিলেন, পান সেজে তুমি দিবে যাবে কিন্তু।

কমল হাসিয়া কিরিয়া দাঁড়াইল, বলিল, আমি?

হ্যাঁ। তোমার পান যেমন মিষ্টি, হাসি তার চেয়েও মিষ্টি। গানও নাকি তুমি খুব ভাল গাও শুনেছি।

বৈষ্ণবী তাহাণ ঘোমটা ঝেঁপে একটু বাড়াইয়া দিয়া বলিল, ভিতরীর ওই তো সখল প্রভু। জমিদারকে সে গান শুনাইল।

আশ্চর্যের কথা, সেইদিন সন্ধ্যায় তাহার আখড়ায় কেহ আসিল না। ভোলাও না।

কমল ঠাকুরঘরের মধ্যে দরজা বন্ধ করিয়া বসিল।

দিন কয়েক পর।

জমিদার চলিয়া গিয়াছেন ভোরবাত্রে। সকালবেলাতেই গ্রামখানা উচ্চ চিংকারে মুখরিত হইয়া উঠিল। কোথাও কলহ বাধিয়াছে।

কলহ বাধিয়াছে কাছুর সঙ্গে ভোলার মায়ের। কাছুর অনেক দিন হইতেই কমলের সম্পর্কে লোকে কটু কথা বলে শুনিয়া আসিতেছিল, শুনিয়া সে জলিয়া যাইত। কমল তাহাকে বলিত, ছি! লোকের সঙ্গে ঝগড়া করতে নাই। আজ জমিদার চলিয়া যাইতেই লোকে ওই পান দেওয়া এবং গান গাওয়া লইয়া নানা কথা কহিতে শুরু করিয়াছে জোরবেলাতেই। ষাটে কাছুর সেই কথা লইয়া ঝগড়া বাধাইয়াছে। সে আর সহ করিতে পারে নাই।

এক। ভোলার মা নয়, বিনোদ-পকাননের মাও ছিল। আরও ছিল দুই-চারিজন শঠ-ভাবিণী প্রতিবেশিনী। কিন্তু কাছুর জিহ্বা ও কণ্ঠের তীব্রতার কাছে তাহাদিগকে হার মানিতে হইল। সত্য সত্যই এ যেন লঙ্কাকাণ্ড, কি কুরুক্ষেত্র! কিন্তু কাছুর এক নিশ্চেষ্টে 'লঙ্কা বাণ ধায় চারিভিতে'।

কমল আসিয়া কাছুরকে টানিয়া লইয়া গেল আপনার বাড়ি। কহিল, ছি!

কাছুর উগ্রভাবেই বলিল, ছি? 'ছি' কেন শুনি? যে চোখ সংসারে খারাপ বই দেখে না, তার মাথা খাব না? তাদের জিভ খসে যাবে না?

কমল হাসিল। বলিল, বলুক না।

না, বলবে কেন? কেন বলবে শুনি? কোন চোখ-খাগীর—? সে কাঁদিয়া ফেলিল।

স্নেহে তাহার চোখ মুছাইয়া দিয়া কমল বলিল, আমার মাথা খাবি।

কাহ্ন বলিল, তোর মাথা খাব না তেবেছিন? তোর মাথাও খাব। জাঁতি দিলে তোর চুলের রাশ কাটব, ঝামা দিলে নাকের রসকলি তুলব, তবে আমার নাম ননদিনী।

কমল হাসিয়া বলিল, তাই আন। পরের সঙ্গে কেন বাপু?

কাহ্ন ও-কথার কান দিল না। কাহ্ন কমলের মুখখানি তুলিয়া ধরিয়া মুহূর্তে দেখিতে দেখিতে বলিল, দেখ দেখি, এই রূপে চোখখাগীর কু দেখে! পোড়ামুখীদের কালো হাড়িমুখ, না পোড়াকার্ত?

কমল ননদিনীর গালে একটি টোকা মারিয়া বলিল, আবার? তারপর সে মুহূর্তে গান ধরিয়া দিল—

ননদিনীর কথাগুলি নিয়ে গিমে মাথা,

কালসাপিনী-জিহ্বা যেন বিধে আকাবীকা।

আমার দারুণ ননদিনী—

কাহ্ন একটু হাসিল। কমল বলিল, ছিঃ কাহ্ন, মাহ্নকে কি ওই সব বলে?

কাহ্ন বলিল, তবে কি বলব, শুনি? শ্রীমতী কি বলিতে বলেন, শুনি?

কমল আবার মধুরস্বরে গাহিল—

ননদিনী ব'লো নগরে

ডুবেছে রাই রাজনন্দিনী কৃষ্ণ-কলস সাগরে।

কাহ্ন বলিল, তবে আর গালাগালি দিই কি সাধ করে বউ? ওরা যে তা বিশ্বাস করবে না। বলে, তাই নাকি হয়?

কথাটা হইতেছে এই—কমল এবার সঙ্কল্প করিয়াছিল যে, আর মাহ্নব নয়, এ রূপে সে এবার ভামহ্নদের পূজা করিবে। বহু ইতিকথা তো সে শুনিয়াছে। তাই সে রাজে আখড়া জাতিয়া গেলে মালতী বা মাহ্নবীর মাল গাথে, স্নোভিত কার্তের সিংহাসনে স্থাপিত কৃষ্ণমূর্তির পটখানির গলায় পরাইয়া দেয়। অনিমেষে পটের দিকে চাহিয়া থাকে—যদি সে মূর্তি হাসে! মাথার উপর স্বতদীপ ধরিয়া সে পটের আরতি করে। তাই রাজে আখড়া জাতিবার পর তোলা যখন ডাকিত ‘কমল’, পূজারত কমলের সে কথা কানে যাইত না বা উত্তর দিবার অবসর থাকিত না। পূজার বসিবার পূর্বে হইলে বলিত, তোর নাক কেটে দোব তোলা।

এটুকু জানিত শুধু ননদিনী কাহ্ন।

আজ কাহ্নর কথার উত্তরে কমল বলিল, আমার একটি কথা রাখতে হবে কাহ্ন।

কাহ্ন বুঝিয়াছিল, কথাটা কি। সে হাসিয়া বলিল, রাখব। কিন্তু আমারও একটা কথা রাখতে হবে তোকে।

কমল হান হাসি হাসিরা বলিল, ছেলেবয়সের সাথী-সখার দল—কি করে বলব কাহ্ন যে এসো না তোমরা ?

কাহ্ন তাহার হাত ধরিয়া বলিল, তোর কলঙ্ক আমার সহ্য হয় না বউ । তাহার ঠোঁট দুইটি কাঁপিতেছিল ।

বহুক্শ পর কমল বলিল, তাই হবে ননদিনী । সেই ভাল । পটের পায়ে ডুবতে হলে ভাল করে ডোবাই ভাল । সঙ্গী-সাথী ডেকে হাত বাড়িয়ে তুলতে বলা হয় কেন ? তাই হবে ।

কাহ্ন বলিল, ননদিনীর জিতও কাটা গেল বউ আজ থেকে ।

এর পর কমলের জীবনের এক নূতন অধ্যায় ।

পটের পূজায় সে গভীরভাবে আত্মনিমগ্ন করিল । কমলের ভাবভঙ্গী দেখিয়া ননদিনী পৰ্ব্বস্ত শঙ্কিত হইয়া পড়িল । সে একদিন বলিল, একটা কথা বলব বউ ?

কি ?

রাগ করবি না তো ?

কমল কোন উত্তর দিল না, শুধু হাসিল । কাহ্ন উত্তর পাইয়াছিল, সে স্তব্ধ করিয়া বলিল, এ পথ ছাড় তাই বউ ; তুই পাগল হয়ে যাবি ।

কমলের মুখ যেন বিবর্ণ হইয়া গেল । সে বলিল, আমার আশার ঘর তুই ভেঙে দিস না তাই ।

কাহ্ন কিছুক্শ নীরব হইয়া রহিল । তারপর কহিল, ভগবান বড় নিষ্ঠুর তাই ।

একটা দীর্ঘনিঃশ্বাস ফেলিয়া কমল বলিল, অতি নিষ্ঠুর ননদিনী, অতি নিষ্ঠুর ।

ছবি পূজার দীর্ঘ দুইটি বৎসর তাহার কাটিয়া গেল, কিন্তু মুক্ ছবি মুক্ই রহিয়া গেল । কোনদিন তো সে হাসিল না, স্বপ্নেও কোনদিন সে দেখা দিল না । কল্পনায় একটি কিশোর মূর্তি মনে করিতে গেলে ফুটিয়া উঠে চঞ্চল কিশোর সখার রূপ । কমল শিহরিয়া উঠে । সহসা আজ তাহার মনে হইল, পট না হান্ধুক, কিন্তু যুগান্তরের প্রাণপ্রতিষ্ঠা-করা বিগ্রহ তো আছে ।

কাহ্ন বলিল, তুই মালা-চন্দন কর তাই বউ । তোদের তো আছে ।

কমল বলিল, না, আমার আশা আজও যায় নাই ননদিনী । আমি মন্দিরে মন্দিরে তাকে খুঁজে দেখব ।

কাহ্ন আর কিছু বলিতে পারিল না ।

ইহার পর হইতে কমল গ্রামে-গ্রামান্তরে তীর্থে তীর্থে বিগ্রহ-মূর্তির ধারে ধারে ঘুরিতে আরম্ভ করিল । প্রাণ-ঢালা গানের নৈবেদ্যে সে দেবতার পূজা করিত, প্রাণের আবেদন উনাইত, অপলক নেত্রে বিগ্রহ মূর্তির মুখের দিকে চাহিয়া থাকিত, যদি ঈষৎবিকশিত চোরা-হাসিটি পলকের অঙ্ককারে চোখ এড়াইয়া মিলাইয়া যায় ।

নিম্পলক দৃষ্টিতে চাহিয়া থাকিতে থাকিতে চোখ জলে ভরিয়া আসে । তখন আর সে পলক না ফেলিয়া পারে না । চোখের জল তাহার গণ্ডেশ বহিয়া গড়াইয়া পড়ে ।

দশ

এমনই করিয়া কাটিয়া গেল কতদিন—পরিপূর্ণ দুইটি বৎসর।

পৌষ-সংক্রান্তির পূর্বদিন স্নানের সময় ননদিনী কমলের ছয়ার খোলা দেখিয়া আশ্চর্য হইয়া গেল। এ-দিনে তো পোড়ারমুখী বউ কখনও ঘরে থাকে না। সংক্রান্তির দিন গন্ধান্নান করিয়া বনওয়ারীবাদে বনওয়ারীলালের দরবারে তাহার যাওয়া চাইই। কাছুর আশঙ্কা হইল। কমলের অন্তর্ভুক্ত করিল নাকি? সে আগড় ঠেলিয়া আগড়ায় প্রবেশ করিয়া ভাকিল, বউ!

কমল তখন স্নানে যাইবার উত্তোগ করিতেছিল। ঘরের ভিতর হইতে সে উত্তর দিল, যাই।

কাছ প্রশ্ন করিল, তোর শরীর ভাল তো?

কলসী কাঁখে লইয়া কমল বাহিরে আসিল। খোলা হাতখানি কাছুর মুখের কাছে নাড়া দিয়া বলিল, বলি, ও ওলো ননদী, আজকে হঠাৎ হলি যে তুই এমন দরদী? হঠাৎ শরীরের খবর যে?

তবে যে বড় বনওয়ারীলালের দরবারে যাস নাই? নাগরের ডাক হেলা করে বেলা খোয়াজ্জিস যে?

যাব না।

কেন?

মান করেছি।

মান! কাছ একান্ত দুঃখের সহিতই হাসিল। তারপর বলিল, মান ভাঙবে কে কমল?

কমল স্বপ্নপ্রবণ চোখে আকাশপানে চাহিয়া রহিল।

কাছ বলিল, বউ, মিছে দেহপাত করিস না। ও হবার নয়।

কমল, বোধ হয় কোন স্বপ্ন-কল্পনা করিতে করিতেই পথ চলিতেছিল, কোন উত্তর না দিয়া এতক্ষণে স্থির দৃষ্টি কাছুর মুখের উপর রাখিয়া চাহিয়া রহিল। কাছ বলিল, এমন করে চেয়ে থাকিস না তাই। তোর ওই চাউনিকে আমার বড় ভয় করে।

কমল ভবু হাসিল না। স্নান করিতে করিতে কাছ হাসিয়া বলিল, তার চেয়ে বউ, আমার তোর ভ্রাম মনে কর। আমি তোকে বুকে করে রাখব।

কমলের নগ্ন স্তন্যর বুকে সে আঙুলের একটি টোকা মারিল। সে তখন দুই হাতের আঘাতে আঘাতে জলের হিল্লোল তুলিতে তুলিতে গাহিতেছিল, 'সাগরে যাইব কামনা করিব নাথিব মনেরই সাধা'। কিরিবার পথে কমল অকস্মাৎ বলিয়া উঠিল, তাই ভাল ননদিনী।

কি?

তোকেই আমার শ্রাম করব।

মর।

সন্ধ্যাতে আসিস ভাই। একলা আজ থাকতে পারব না।

তুই ঘাস ভাই। ছেলেপিলের খাওয়া-দাওয়া, চ্যা-ড্যা, সন্ধ্যাতে আমার আসা হবে না।

আচ্ছা, যাঃ। নন্দাই কিছু বলবে না তো?

খিলখিল করিয়া হাসিয়া কাহু বলিল, তাকে ঘুম পাড়িয়ে রাখব, নর্রতো রাম মোড়লের মজলিসে তামাক খেতে পাঠিয়ে দেব।

কমল একটা দীর্ঘনিঃশ্বাস ফেলিল।

কিন্তু বিপ্রহর না যাইতেই কমল ভিকার ঝুলি কাঁধে করিয়া পথে বাহির হইয়া পড়িল। অকস্মাৎ তাহার মনে হইল জয়দেবের কথা। জয়দেবের শ্রামচাঁদের দরবারে সে কখনও তো যায় নাই! জয়দেবের শ্রাম প্রেমের ঠাকুর। জয়দেবের কাহিনী মনে করিয়া সে আশাবিহীন হইয়া উঠিল। ননদিনীকে চাবি দিয়া তুলসীমন্দিরে প্রদীপ দিবার কথা বলিবার তাহার অবসর হইল না।

বহুদূর পথ, ক্রোশ-পঁচিশেকের কম নয়। কমল স্থির করিল, দিনরাত্রি চলিয়াও সে আগামী কাল সন্ধ্যা পর্যন্ত কোনরূপে পৌঁছবেই।

কমল একাই পথ ধরিল। গ্রামের পর গ্রাম, মাঠের পর মাঠ অতিক্রম করিয়া সে চলিয়াছিল। পথে যাত্রীর দল পাইবে, সে আশা করিয়াছিল। কিন্তু যাত্রীরা সব পূর্বেই চলিয়া গিয়াছে। বিতীয় দিন সন্ধ্যার মুখে একখানা গ্রাম পার হইবার সময় সে শুনিল, সম্মুখে একখানা মাঠ পার হইয়াই আর একখানি গ্রাম, তারপরই জয়দেবের আশ্রম।

মাঠখানা একটু বিস্তীর্ণ। ক্রোশ-দুই হইবে। কমল মাঠের বৃকে নামিয়া পড়িল। সন্ধ্যা ফসল-কাটা শুভ্র ক্ষেতগুলিকে বেড়িয়া বেড়িয়া পান্নে-চলা পথের নিশানা ঘুরিয়া কিরিয়া চলিয়া গিয়াছে। শুভ্রপক্ষের রাত্রি। দিগন্ত হইতে দিগন্ত পর্যন্ত স্তব্ধ-মেঘের মেলা আকাশ ছাইয়া থাকিলেও মেঘের আড়ালের দশমীর চাঁদের জ্যোৎস্নার আভাষ ধরিত্রীর বক্ষ অস্পষ্ট উজ্জ্বল। সে অস্পষ্টতায় দেখা বেশ যায়, কিন্তু ভাল চেনা যায় না। কমল সন্তর্পণে পথ চলিয়াছিল। শীর্ণ পথ লতার মত আঁকিয়া বাঁকিয়া কত দিকে শাখা-প্রশাখা মেলিয়াছে।

অন্ন অন্ন বাতাস বহিতেছিল। শীত তীক্ষ্ণ হইয়া উঠিয়াছে। কমল কাপড়খানাকেই বেশ করিয়া গায়ে জড়াইয়া লইল। হাসিও আসিল তাহার। কাহু শুনিতে তাহাকে নিশ্চয় রাই-উদ্দাদিনী বলিয়া ঠাট্টা করিবে। আর পাগল হইতে বাকিই বা রহিয়াছে কোথায়? কিন্তু পাগল হইয়াও তো আকাশে ফুল কোটানো গেল না! কমল একটা দীর্ঘনিঃশ্বাস ফেলিয়া মনে মনে সঙ্কল্প করিল, এই শেষ। ইহার পর আর সে আকাশে ফুল ফুটাইবার কল্পনা করিবে না। কমল একবার দাঁড়াইল। চারিদিক বেশ করিয়া দেখিয়া লইয়া মনে মনে কথা কহিতে কহিতে আবার চলিল। চারিদিকের গ্রামের বনশোভা ঘষা কালো ছবির মত দেখা বাইতেছিল। মাথার উপরে কাটা মেঘের মধ্য দিয়া আলো-আঁধারির খেলা খেলিতে খেলিতে ঢাকও চলিয়াছিল।

* এই একাকিনী যাত্রিণীর সঙ্গে ।

কিন্তু পথ যে ফুরায় না ! পথ ভুল হইল না তো ? চারিদিকেই তো পথ !

কমল ধমকিয়া দাঁড়াইল । আকাশে চাহিয়া দেখিল, চাঁদ প্রায় মাথার উপরে আসিয়াছে । রাত্রি তবে তো অনেক হইয়াছে । চারিপাশে চাহিয়া দেখিল, গ্রাম সেই দূরে, ছবির মত মনে হইতেছে—যত দূরে ছিল তত দূরেই আছে, এতটুকু নিকটবর্তী হয় নাই । মধ্য-প্রান্তরের মধ্যে সে শুধু একা দাঁড়াইয়া । কমলের কান্না পাইল ।

এই নীমাহারা প্রান্তরে একা সে পথ ভুলিয়া ঘুরিয়া মরিতেছে । কেন এমন ভুল সে করিল, কেন সে সন্ধ্যার মুখে একা এই বিস্তীর্ণ মাঠে নামিল ? কে তাহাকে পথ দেখাইবে ?

দেহ-মন যেন তাহার ভাঙিয়া পড়িতেছিল । সেইখানেই বসিয়া পড়িয়া কমল কাদিতে আরম্ভ করিল । কতক্ষণ সেই ভাবে বসিয়া ছিল কে জানে ? হঠাৎ তাহার কানে কোন পথচারীর কণ্ঠস্বর আসিয়া পৌঁছিল । পথিক যেন গান গাহিতে গাহিতে পথ চলিয়াছে । কমল উঠিয়া পড়িল । স্বর লক্ষ্য করিয়া পাগলের মত ছুটিয়া চলিল । অদূরে ছায়ার মত মাছুষের কান্না যেন দেখা যাইতেছে ।

সে আতঙ্কিত ডাকিল, কে গো ?

আবার ডাকিল, ওগো, কে গো তুমি ? একটু দাঁড়াও । পথিক দাঁড়াইল ।

কমল ডাকিয়া বলিল, একটু দাঁড়াও গো । পথ হারিয়েছি আমি ।

পথিক এবার শব্দ লক্ষ্য করিয়া ফিরিয়া জিজ্ঞাসা করিল, কে তুমি ? সে সেই দিকেই হাঁটিতে শুরু করিল । আলপথের একটি বাঁকের উপরে দুইজনের মুখোমুখি দেখা হইল । কমল দেখিল, পথিক যুবা । শুধু যুবা নয়, রূপও আছে তাহার ।

মেঘের একটা স্তর ছাড়াইয়া আকাশের চাঁদ তখন পরিপূর্ণ ভাবে উঠিয়াছে । অকস্মাৎ পুরুষটি বিশ্ময়-ভরা কণ্ঠস্বরে বলিয়া উঠিল, কমল ? চিনি ?

কমলও বুঝি চিনিয়াছিল, সে খরখর করিয়া কাঁপিতেছিল । তাহার সম্মুখে দাঁড়াইয়া রঞ্জন—তাহার লক্ষ্য ।

কমলের মনে একটি গোপন আশঙ্কা জাগিয়াছিল । একবার মনে হইল, এ সেই । তাহার শ্রামচাঁদ, রঞ্জনের রূপ ধরিয়া আসিয়া দাঁড়াইয়াছে । এমন অনেক গল্প সে শুনিয়াছে । যেখানে যে শ্রাম-বিগ্রহের দরবারে সে চলিয়াছে, সেই শ্রামই তো জয়দেব গোস্বামীর রূপ ধরিয়া পদ্মাবতীকে ছলনা করিয়া কবির অসমাপ্ত গান সম্পূর্ণ করিয়া দিয়াছিলেন । স্থিরদৃষ্টিতে সে রঞ্জনের দিকে চাহিয়া রহিল ।

রঞ্জন আবার ডাকিল, কমল ! রাইকমল !

সে জাহার হাত ধরিয়া ডাকিল এবার । রাইকমলের চেতনা ফিরিয়া আসিল । এতক্ষণ পর আপনাকে সংযত করিয়া বুঝিল, সত্যসত্যই এ রঞ্জন । অস্পষ্ট ছায়ালোকের মধ্যে ক্ষেতের বুকে তাহার দেহের দীর্ঘ ছায়াখানি ঝাঁকাতাবে পড়িয়া আছে । দেবতার ছায়া পড়ে না ।

রঞ্জন—এ সেই রঞ্জন ! দেবতা নয়, মাণ্ডব !

আশ্চর্য ! তবুও তাহার বুক বিপুল আনন্দে ভরিয়া উঠিল ।

রঞ্জনই আবার কথা বলিল, তুমি এখানে এত রাজে কেমন করে এলে কমল ?

কমল তখনও তাহাকে দেখিতেছিল । রঞ্জনের বৈষ্ণবের বেশ । তাহার মনে পড়িল, রঞ্জন পরীকে লইয়া বৈষ্ণব হইয়াছে । রঞ্জনের প্রাণে সে সজাগ হইয়া উঠিল । বলিল, জয়দেব যাব । কিন্তু তুমি—কি বলব তোমাকে, কি নাম নিয়েছ ? তুমি কোথা যাবে ?

রঞ্জন বৈষ্ণবের মতই মুহূ হাসিয়া বলিল, নাম এখন আমার রাইদাস মহান্ত ।

কমল অকারণে লজ্জা পাইল । রঞ্জন বলিল, আমিও জয়দেব যাব । আমার সঙ্গেই এস, কি বল ?

কমল কহিল, চল ।

কমলের মনের মধ্যে কত প্রশ্ন ঘুরিয়া ফিরিয়া মরিতেছিল, কিন্তু কথা যেন জিতে জড়াইয়া যাইতেছে । পথ চলিতে চলিতে রঞ্জন আবার বলিল, রসিকদাস চলে গেল ?

কমল উত্তর দিল না । রঞ্জন বলিল, আমি তোমাদের খবর সবই জানি । বাউলের যে শেষ পর্যন্ত জান হয়েছে, এও ভাল । তারপর দুজনেই নীরব । শুক্লা ছাদশীর চাঁদ পশ্চিম আকাশে অন্ত যাইতেছিল । মেঘের ছায়া ঘন হইয়া কায়া গ্রহণ করিতেছিল । অন্ধকার হইয়া আসিতেছে চারিদিক । কমল মুহূষ্মে প্রশ্ন করিল, পরী ভাল আছে ?

রঞ্জন একটা দীর্ঘশ্বাস ফেলিয়া বলিল, শেষ-জীবনে বড় কষ্টই সে দিলে আমার—নিজেও পেলো ; রোগের যন্ত্রণায় দিনরাত্রি চীৎকার ! আর সে কী ভয়ঙ্কর মূর্তি—অশ্বিকমালসার ! উঃ ! মনে করতেও শরীর আমার শিউরে ওঠে !

সমবেদনায় কমলও একটা দীর্ঘনিঃশ্বাস ফেলিয়া বলিয়া উঠিল, আহা ! পরী মরিয়া গিয়াছে !

আক্ষেপ করিয়া রঞ্জন বলিল, গুরু পেয়েছিলাম ভাল । ভাল আখড়া, দেবসেবা, কিছু দেবোত্তর—সবই তিনি আমার দিবে গেছেন । দিনও কিছুদিন মন্দ কাটে নাই । কিন্তু তারপর এই অশান্তি । একদিকে দেবতার সেবা, একদিকে মানুষের সেবা...এ কি চিনি, শ্রীতে যে কাঁপছ তুমি ! গায়ে কাপড় দাও ।

কমল বলিল, থাক ।

না না, এ ঠাণ্ডায় কঠিন ব্যারাম হতে পারে । গায়ে কাপড় দাও ।

এবার বাধ্য হইয়া কমলকে জানাইতে হইল, সে গায়ের কাপড় আনিতে ভুলিয়াছে ।

রঞ্জন বলিল, তাই তো ! তা হলে এক কাজ কর, আমার গায়ের কাপড়খানা—

কমল প্রতিবাদ করিয়া কহিল, না ।

পথ চলিতে চলিতে রঞ্জন বলিল, ভাল মনে পড়েছে । দাঁড়াও, আমার কাছে যে আরও দুখানা নতুন গরম কাপড় রয়েছে ।

সে আপনার পোটিলা খুলিয়া দুইখানা গায়ের কাপড় বাহির করিল—একখানা পাড় নীল,

অপরখানি হলুদ রঙের। নীল রঙের কাপড়খানি সে কমলের দিকে বাড়াইয়া দিয়া বলিল, না নিলে আমার বড় দুঃখ হবে চিনি।

কমল 'না' বলিতে পারিল না। নীল গায়ের কাপড়খানি তাহাকে মানাইলও বড় ভাল। রঞ্জন ভাল করিয়া দেখিয়া বলিল, আমার দেওয়া মিছে হয় নাই রাইকমল। প্রতিবার আমি জয়মেবে আসি, আর রাধাগোবিন্দকে নীতবস্ত্র ভেট দিই।

তীর গায়ের কাপড়ের রঙ হলুদ, রাধার গৌর অঙ্গে নীল রঙই মানায় ভাল।

কমল দাক্ষণ লক্ষ্যায় মুহূর্ত্তে বলিল, ছিঃ, তুমি করলে কি!

রঞ্জন বলিল, ঠিক করেছি। রাধারানীই নিয়েছেন রাইকমল।

পরদিন প্রভাতে কমল অজ্ঞয়ে স্নান করিয়া মন্দিরে গেল। - মনে হইল, বিগ্রহ যেন হাসিতেছে। চারিদিকে বাউল বৈষ্ণবে গান ধরিয়াছে। সেও মন্দিরা বাজাইয়া গান ধরিয়া দিল—

বহুদিন পরে বঁধুয়া আইলে

দেখা না হইত পরান গেলে।

তাহার কণ্ঠস্বরের মাধুর্যে, সঙ্গীতের শিল্পচাতুর্যে মুগ্ধ শ্রোতার দল ভিড় জমাইয়া ফেলিয়াছিল। গান শেষ হইলে পূজারী আসিয়া একগাছি প্রসাদী মালা দিয়া তাহাকে আশীর্বাদ করিয়া বলিলেন, শুক্তি তোমার অচলা হোক।

প্রসাদ গ্রহণ করিয়া সে জল খাইবার জন্ত যাইতেছিল অজ্ঞয়ের ঘাটে। মন্দিরসীমার বহির্ভাগে রঞ্জন দাঁড়াইয়া ছিল। সে বলিল, কি প্রসাদ পেলে, আমায় ভাগ দাও কমল।

কমল পূর্ণদৃষ্টিতে তাহার মুখের দিকে চাহিয়া রহিল। তারপর বলিল, প্রসাদ পেয়েছি— জামটাঁদের আশীর্বাদী মালা।

রঞ্জন বলিয়া উঠিল, তাই দাও আমায়।

কমল এ কথা উত্তর দিল না। সে শূন্যদৃষ্টিতে শুধু চাহিয়া রহিল। রঞ্জন বলিল, রাধারানীর কি দয়া আমার ওপর হবে না কমল?

কমল বলিল, তাই নাও। তারপর স্বর নামাইয়া অন্ত দিকে চাহিয়া বলিল, অনেক জেবে দেখলাম—বাউল বল, দেবতা বল, সবার ভেতর দিয়ে তোমাকেই চেয়ে এসেছি এতদিন।

এগারো

জয়দেবধামের মন্দিরপ্রাঙ্গণে রঞ্জনকে বরণ করিয়া সেখান হইতেই কমল তাহার অতুগামিনী হইল। ঘরের কথা মনে হইল না। কাছুর কথা মনে হইলেও কাছু যেন অনেক ছোট হইয়া গেল। মনে মনে ভাবিল, ইহার পর ননদিনীকে একটা সংবাদ পাঠাইয়া দিলেই হইবে, কিংবা তাহার দুইজনে গিয়া একেবারে তাহার দুয়ারে দাঁড়াইয়া ভিক্ষা চাহিবে। পোড়ারমুখী ননদিনী ছুটিয়া আসিয়া অবাক হইয়া যাইবে।

কল্লনার জাল বুনিতে বুনিতে রঞ্জনের সঙ্গে তাহার আখড়ায় যখন গিয়া পৌঁছিল, বেলা তখন যায়, গোখুলির আলো ঝিকমিকি করিতেছে।

মনের-মধ্যে উল্লাসের তৃপ্তির আর পরিসীমা ছিল না তাহার। কিন্তু সে উল্লাস বাহিরে প্রকাশ করিবার যেন উপায় ছিল না। রঞ্জনকে সম্ভাষণ করিবার যোগ্য সম্বোধন সে খুঁজিয়া পাইতেছিল না। তাহার লক্ষ্য—কিন্তু ছিঃ, মহাস্ত বসিতেও যে লজ্জা হয়, মনও উঠে না। মনে মনে বিচার করিয়া ‘লক্ষ্য’র চেয়ে ‘মহাস্ত’ সম্বোধন কিছুতে সে প্রিয়তর বা মধুরতর মনে করিতে পারিল না।

রঞ্জন উল্লসিত হইয়াছিল। কপোতীকে বেড়িয়া কপোত যেমন অনর্গল গুঞ্জন করিয়া ফেরে, তেমনই ভাবে সে কখনও কমলের আগে, কখনও পিছনে পথ চলিতে চলিতে অনর্গল কথা কহিয়া চলিয়াছিল।

গ্রামে ঢুকিবার মুখে রঞ্জন বলিল, আজ সন্ধ্যাতে কিন্তু আমার ঠাকুরকে গান শোনাতে হবে কমল।

কমল ঘাড় নাড়িয়া সায় দিল। মনে মনে স্থিরও করিয়া রাখিল, কোন্ গান সে গাহিবে। গানের কলিগুলি মনের মধ্যে তাহার এখনই গুঞ্জন করিয়া উঠিল—

আজু রজনী হাম

ভাগে পোহারু

পেথহু পিন্নামুচন্দা।

আখড়ার নিকটে আসিয়া আগড় খুলিয়া রঞ্জন বলিল, এস, এই আমার আখড়া।

প্রাঙ্গণে দাঁড়াইয়া কমল চারিদিকে চাহিয়া চাহিয়া দেখিল। আখড়াটি সুন্দর। শুধু সুন্দর নয়, ভিক্ষুকের ভবনের মধ্যেও সচ্ছল সমৃদ্ধির পরিচয় চারিদিকেই সুপরিষ্কৃত। একদিকে জাকরি-বোনো বাঁশের বেড়ার মধ্যে গাঁদাফুলের গাছ। গাছগুলির সর্বত্র ভবিয়া ভারে ভারে ফুল ফুটিয়া আছে। মাঝে মাঝে কয়টা রাধাপদ্মের গাছে বড় বড় হলদে ফুলের সমারোহ। কয়টা সন্ধ্যামণি গাছে তখন সমস্ত সমস্ত রাঙাবরণ ফুল ফুটিতেছিল। ওপাশে পাঁচ-ছয়টা আমগাছ মুকুলে যেন ভাঙিয়া পড়িয়াছে। মাঝ আঙিনার একটা সজিনাগাছের পুষ্পিত শীর্ষগুলি মাটির দিকে হুইয়া পড়িয়া বাতাসে অন্ন অন্ন ছলিতেছে।

সম্মুখেই দাওরা—উঁচু বাঁধানো-মেঝে মেটে ঘর একখানি। তাহার ঠিক পাশেই ঘরখানির সহিত সমকোণ করিয়া আর একখানি ছোট ঘর। তাহারও বাঁধানো মেঝে। আকারে প্রকারে মনে হয়, এইটিই বিগ্রহ-মন্দির। দুয়ারের চৌকাঠে, সিঁড়িতে আলপনার দাগ অশ্লিষ্ট হইলেও দেখা যাইতেছিল।

কমলের অল্পমানে ভুল হয় নাই। রঞ্জন গিয়া ঘরের দুয়ার খুলিয়া দিয়া কহিল, এস, প্রণাম করি।

কমল দেখিল, মন্দিরের মধ্যে গৌরাক্ষ-বিগ্রহ। রঞ্জন ও কমল পাশাপাশি বসিয়া ভক্তিভরে প্রণাম করিল।

মহাস্ত !

পিছনে অস্বাভাবিক দুর্বল কর্ণশ্রবে কে যেন বুক ফাটাইয়া চীৎকার করিয়া উঠিল। কমল চমকিয়া উঠিল। প্রণাম তাহার সম্পূর্ণ হইল না, সে পিছন ফিরিয়া দেখিল, ও-ঘরের দাওয়ার উপরে অদ্ভুত এক নারীমূর্তি প্রাণপণে দুই হাত মাটি আঁকড়াইয়া ধরিয়া কঁপিতেছে। কমল শিহরিয়া উঠিল। মাহুকের এমন ভয়ঙ্কর কুংসিত পরিণতি সে আর দেখে নাই। কঙ্কালাবশেষ জীর্ণ দেহ হইতে বৃকের কাপড় শিথিল হইয়া খসিয়া পড়িয়া গিয়াছে। কমল দেখিল, সে-বৃকে অবশিষ্টের মধ্যে শিথিল চর্মের আবরণের মধ্যে শুধু কঙ্কালের স্তূপ। সেই স্তূপ ভাঙিয়া বাহিরে আসিবার জন্য প্রাণ জ্বপিরে ঘরে যেন উদ্ভাসভাবে মাথা কুটিতেছে।

রঞ্জন কর্কশকণ্ঠে কহিল, একি ! আবার তুই বাইরে এসেছিস পরী ? পরী !

অজ্ঞাতসারে কমল অশ্লিষ্ট শ্রবে বলিয়া উঠিল, পরী !

এই পরী ! সেই পরীর এই দশা ! সেই হৃৎপৃষ্ঠ শ্বামবর্ণ মেয়ে এমন হইয়া গিয়াছে ! সেই পরিপুষ্ট হুভোল মুখ এমন শীর্ণ দীর্ঘ দেখাইতেছে ! মুখে ও চার্মড়ার নীচে প্রত্যেকটি হাড় দেখা যায়। গালের কোনও অস্তিত্বই নাই যেন, আছে শুধু দুইটা গহ্বর। পরীর চুলের শোভা ছিল কত ! কিন্তু এখন সেখানে সাদা মসৃণ চামড়া বীভৎসভাবে চকচক করিতেছে। যে কয়গাছ চুল আছে, তাহার বর্ণ পিকল, কণ্ঠ কর্কশতায় বীভৎস। চর্মসার কঙ্কালের মধ্যে অস্বাভাবিক উজ্জ্বল শুধু দুইটা চোখ, চোখ দুইটা যেন দপদপ করিয়া জলিতেছে। শীর্ণ দেহের মধ্যে কোথাও স্থান না পাইয়া মানব হৃদয় যেন ওইখানে বাসা গাড়িয়াছে। ক্রোধ, হিংসা, অভিমান, লোভ, মমতা, স্নেহ সব আত্মপ্রকাশ করে ওই দৃষ্টির মধ্য দিয়া।

রঞ্জনের কর্কশ তিরস্কারে পরী কর্ণপাত করিল না। সে আর্তকণ্ঠে চীৎকার করিয়া জিজ্ঞাসা করিল, ও কে মহাস্ত ?

দৃষ্টি দিয়া পরী যেন কমলের রূপসম্ভারভরা সর্ব অবয়ব গ্রাস করিতেছিল।

রঞ্জন বলিল, চিন্তে পারলে না ? ও যে কমল। তুমি যে আমার বলেছিলে পরী—

পরী পাগলের মত দুই হাতে আপনার বুক চাপড়াইয়া বলিয়া উঠিল, না না না, বলি নাই ; বলি নাই আমি। সে আমি মিথ্যে বলেছি। তোমার মন রাখতে, মন বুঝতে বলেছি আমি।

হা-হা করিয়া সে কাঁদিয়া উঠিল।

কমল খরখর করিয়া কাঁপিতেছিল। রজন তাহার হাত ধরিয়া ডাকিল, কমল, কমল!

দেবতার ঘরের খুঁটিটা ধরিয়া কমল বলিল, পরী বেঁচে থাকতে তুমি এ কি করলে? আমায় তো তুমি বল নাই! ছি!

রজন বলিল, পরী মরেছে, সে কথা তো আমি বলি নাই কমল।

সে কথা সত্য কি না যাচাই করিয়া দেখিবার সময় সে নয়। কমল বলিল, ধর ধর, তুমি পরীকে গিয়ে ধর। পড়ে যাবে, পড়ে যাবে হয়তো।

রজন পরীকে ধরিয়া ডাকিল, পরী, পরী!

তাহার পায়ের উপর আছাড় খাইয়া পরী বলিল, কি করলে গো, এ তুমি কি করলে? ছুটো দিন সব্ব করতে পারলে না? আমি তো বাঁচব না। দুদিনও হয়তো বাঁচব না। দু দিনের জন্তে আমার বুকে এ তুমি কি শেল হানলে গো?

আবার সে হা-হা করিয়া কাঁদিয়া উঠিল।

রক্তমাংসের মাছুষ লইয়া এ কি কুশ্রী কাড়াকাড়ি! কমলের কৰুণা হইল। ওই মেয়েটির বুকে যে আজ কি বেদনা, কত তাহার পরিমাণ, সে তো নিজে নারী, সে তাহা বোধে। শুধু তাই নয়, আজ যে তাহাকে কঠোরভাবে জানাইয়া দেওয়া হইল, তোমার মরিতে হইবে—একান্ত নিঃস্ব রিক্ত হইয়া কাঙালিনীর মরণ মরিতে হইবে।

কমলের চক্ষে জল দেখা দিল। সে আসিয়া পরীর পায়ের কাছে বসিয়া বলিল, পরী, আমার ওপর রাগ করলি ভাই?

বেরো—বেরো—দূর হ—দূর হ। চীৎকার করিয়া পদ্মী তাহার কঙ্কালসার দেহে যতখানি শক্তি ছিল প্রয়োগ করিয়া কমলকে লাথি মারিয়া বলিল। অতর্কিত কমল নীচে উন্টাইয়া পড়িয়া গেল। রজন কিছু করিবার পূর্বেই কমল নিজেই উঠিয়া বলিল।

ও কি, তোমার ভুরু থেকে রক্ত পড়ছে যে! রজন পরীকে ছাড়িয়া দিয়া কমলের পরিচর্য্যার জগ্য ব্যস্ত হইয়া উঠিল।

পরীর চোখ বাঘিনীর চোখের মত হিংস্র দীপ্তিতে দপদপ করিয়া জলিতেছিল।

সে দৃষ্টি কমল দেখিয়া ছিল। ভ্রতে বুলানো রক্তমাখা হাতখানি দেখিতে দেখিতে সে বলিল, না না, লাগে নাই আমার। যাও, তুমি পরীকে ধর—ও রোগা মাছুষ। আমি নিজেই ধুয়ে ফেলছি।

কমল এপাশ-ওপাশ অমূল্যস্থান করিয়া দেখিল, একটি চারা আমগাছের তলায় জল ফেলিবার জগ্য একটুখানি স্থান বাঁধানো রহিয়াছে। বালতির জল লইয়া সে ভ্রর রক্ত ধুইতে বলিল। ধুইতে ধুইতে শুনি, পরী বলিতেছে, না না, এমন করে তুমি চেও না। রাগ করো না। ছুটো দিন, ছুটো দিন ওকে পর করে রাখ। আদর কণো না, কথা করো না। ছুটো দিন গো, দু দিন বই আর আমি বাঁচব না। সত্যি বলছি।

সন্ধ্যায় দেবতার সম্মুখে নিত্য কীর্তন হয়। রজন কমলকে বলিল, এস, আমার প্রভুকে

গান শোনাবে এস !

কমল বলিল, না ।

রজন আশ্চর্য হইয়া গেল । বলিল, সে কি ? এ এখানকার নিয়ম । আর এরই মধ্যে লোকজন এসেছে সব, তাদের বলেছি আমি ।

কমল দৃঢ়স্বরে বলিল, না । পরীর অবস্থাটা ভাব দেখি । আমার গান শুনলে সে হয়তো পাগল হয়ে উঠবে ।

রজন একটা দীর্ঘনিঃশ্বাস কেলিয়া বলিল, হঁ ।

কমল আবার বলিল, যাও, তুমি নাম-গান আরম্ভ কর গে, সন্ধ্যা বয়ে যাচ্ছে । আমি বরং যাই, দেখে শুনে পরীর অন্তে একটু সাবু কি বালি চড়িয়ে দিই ।

রজন অকস্মাৎ উত্তেজিত হইয়া উঠিল । সে কমলের হাত ধরিয়া বলিল, কমল, আগে দেবসেবা পরে মাহুষ । এস বলছি ।

ঐ কুক্ষিত করিয়া কমল বলিল, আমারও এতদিন তাই ছিল । কিন্তু আজ আমি ধর্ম পালটেছি । ছাড় আমাকে তুমি ।

রজন হাত ছাড়িয়া দিল । কমল ধীরপদক্ষেপে ওদিকে চলিয়া যাইতেছিল, রজন অকস্মাৎ বলিয়া উঠিল, মরবেও না, আমারও অশান্তি ঘুচবে না ।

কমল ঘুরিয়া দাঁড়াইল । ভৎসনাপূর্ণ দৃষ্টিতে চাহিয়া বলিল, দেবতার পায়ে প্রাণ ঢেলেও দেবতার সাড়া পাই নি । দেবতা পাথরের বলে মাহুষকে ধরেছি জড়িয়ে । মাহুষের ওপর ঘেমা ধরিয়ে দিও না আর । ছি !

রজন এতটুকু হইয়া গেল । ঘরের ভিতরে দুর্বল ক্ষীণ কণ্ঠস্বরে পরী গুমরিয়া গুমরিয়া কাদিতেছিল ।

রজন নিজেই খোল লইয়া দেবতার দুয়ারে বসিল ।

কীর্তন ভাঙিয়া গেলে ফিরিয়া আসিয়া ডাকিল, কমল !

কমল তখন পরীর কাছে বসিয়া ছিল । পরীর সবে একটু তন্দ্রা আসিয়াছে । কিন্তু তখনও তাহার তন্দ্রাতুর বক্ষের ক্রন্দনকম্পিত দীর্ঘশ্বাস মধ্যে মধ্যে বাহির হইয়া আসিতেছিল ।

কমল সন্তর্পণে বাহিরে আসিয়া দাঁড়াইল ।

রজন বলিল, নাও ।

সে একভালা ফুল আগাইয়া দিল । কমল হাত বাড়াইয়া লইল । কিন্তু জিজ্ঞাসু নেত্রে তাহার দিকে চাহিয়া রহিল ।

রজন হাসিয়া বলিল, ফুলশয্যা—

না ।

রজন আশ্চর্য হইয়া প্রশ্ন করিল, কেন ?

কমল যান হাসি হাসিয়া বলিল, ভুল করে করেই জীবন চলেছে আমার । যত বড় মাহুষ আমি, কুলের পর কুল জমা করলে সেও বোধ হয় তত বড়ই হবে । আবারও বোধ হয় কুল

করলাম আমি।

রঞ্জন কমলের কথা অর্থ বুঝিতে পারিল না। সে বিস্মিত নেত্রে তাহার দিকে চাহিয়া রহিল। কমল বলিল, যে মানুষের প্রয়োজন নাই, তার কি কোন দাম নাই তোমার কাছে? একবার পরীর কথা ভাব দেখি।

রঞ্জন বলিয়া উঠিল, তুমি কি পাথর?

আমি? কমল হাসিল। তারপর আবার বলিল, পাথর হলে পাথরেই মন উঠত লক্ষ্য, এ কথা আর একবার বলেছি। মানুষ বলেই মানুষের জন্তে পাগল হয়েছি, মানুষের জন্তে মমতা না করে যে পারি না।

আচ্ছা, থাক। রঞ্জন ঈষৎ উদ্ভাভরেই সেখান হইতে চলিয়া যাইতেছিল।

মহাস্ত! ঘরের ভিতর হইতে পরী ডাকিতেছিল।

কমল ভাড়াভাড়া পরীর শয্যাপার্শ্বে গিয়া দাঁড়াইল। তাহাকে দেখিয়া অস্বাভাবিক উত্তেজনায় পরী আবার চীৎকার করিয়া উঠিল, না না, সরে যা তুই বলছি।

লভয়ে কমল বাহিরে আসিয়া রঞ্জনকে বলিল, যাও, ডাকছে তোমায়। একান্ত অনিচ্ছার সহিত রঞ্জন পরীর শয্যাপার্শ্বে গিয়া দাঁড়াইল। পরী বলিল, আজ তোমার ফুলের বাসম্ব হবে, নম্র? তোলা বিছানার মধ্যে তোশক বালিশ—

বাধা দিয়া রঞ্জন বলিল, থাক থাক, ওসব তোমাকে ভাবতে হবে না পরী।

না। বিছানা নামিয়ে নাও গে। কিন্তু আমি শখ করে যা যা করিয়েছি, সেগুলো নিও না। সে আমার, সে আমি নইতে পারব না। প্রাণ থাকতে সে দেখতে আমি পারব না।

উত্তরে রঞ্জন অতি কষ্টে একটা জবাব দিতে গেল। কিন্তু পিছনে লঘু পদশব্দে কমলের অস্তিত্ব অনুভব করিয়া সে তাহা পারিল না। শুধু পরীর মাথায় হাত বুলাইতে চেষ্টা করিল। পরী হাতখানা ঠেলিয়া দিয়া বলিল, থাক।

রঞ্জনও যেন বাঁচিল, সে চলিয়া গেল।

খাওয়া-দাওয়ার পরে রঞ্জন তামাক খাইতেছিল। কমল আসিয়া কহিল, তোমার বিছানা পরীর ঘরে।

রঞ্জন চমকিয়া উঠিল। কমল বলিল, 'না' বলতে পাবে না। আমার কথা তোমাকে শুনতে হবে।

রঞ্জন আর আত্মসংবরণ করিতে পারিল না—বার বার অস্বীকার করিয়া বলিল, না না। রোগীর গায়ের গন্ধে আমার ঘুম হবে না।

শান্তভাবে কমল প্রত্যুত্তরে বলিল, তা হলে আমারও যদি কোন দিন ওই পরীর মত দৃষ্ট হয়, তবে তো তুমি এমনই করেই আমাকে জঞ্জালের মত ঘেঁষা করবে, আন্তাকুন্ডে কেলে দিতে চাইবে!

রঞ্জন চূপ করিয়া রহিল। কিছুক্ষণ পরে সে হাসিমুখেই কমলের মুখের দিকে চাহিয়া বলিল, তোমায় জর হোক কমল।

কমল হেঁট হইয়া রক্তনের পারের ধূলা লইল। রক্তন মুহূর্তে অবনত কমলকে বুকে টানিয়া তুলিয়া লইল, চুষনে চুষনে অধর ভরিয়া দিল, সবল শেবণে যেন শিষ্ট করিয়া দিতে চাহিল। কমলের চোখ দুটিও আবেশে মুদিয়া আসিতেছিল। এ আনন্দ তাহার অনাস্বাদিতপূর্ব। রসিকদাসও তাহাকে এমনই আদরে বুকে লইয়াছে, কিন্তু সে যেন তাহাতে পাখর হইয়া ঘাইত। ঠিক এই সময়ে ভিতরে পরীর সাড়া পাওয়া গেল, সে বোধ হয় আবার কাঁদিতেছে। মুহূর্তে আশ্রয় হইয়া সে বলিল, ছাড়।

না।

কমল বলিল, ছাড়। যে মরতে বসেছে তাকে আর ঠকিও না।

রক্তনের বাহুবেষ্টনী শিথিল হইয়া আসিয়াছিল, কমল আপনাকে মুক্ত করিয়া লইয়া বলিল, যাও, শোও গে যাও। বলিয়া সে আর উত্তরের অপেক্ষা করিল না, এপাশের ঘরে ঢুকিয়া দরজা বন্ধ করিয়া দিল।

পরদিন প্রভাতে পরীর ঘরখানি পরিষ্কার করিবার জন্ত সে সেই ঘরে ঢুকিল। বাঁট দিতে দিতে পরীর দিকে চাহিতেই সে দেখিল, পরী তাহারই দিকে চাহিয়া আছে। কমলের ভয় হইল, পরী হয়তো আবার উজ্জেক্ত হইয়া উঠিবে।

কমলি! পরী তাহাকে ডাকিল।

পরী আবার ডাকিল, শোন, আমার কাছে আস তাই কমলি। ভয় নাই।

কমল কাছে আসিয়া বলিল। পরীর জীর্ণদেহে সন্নেহে হাত বুলাইয়া বলিল, ভয় কি ভাই!

পরী সে কথার কোন উত্তর দিল না। সে একটা দীর্ঘনিঃশ্বাস ফেলিয়া বলিল, রূপ একদিন আমারও ছিল।

কমল চমকাইয়া উঠিল। করুণ হাসি হাসিয়া পরী বলিল, তোকে আশীর্বাদ করব বলেই ডাকলাম ভাই। আজ ছ মাস বিছানা পেতেছি, ছ মাস একা পড়ে পড়ে কাঁদছি। বড় সাধ ছিল ভাই, সে সাধ তুই মেটালি। আশীর্বাদ করি—

আর সে কথা বলিতে পারিল না, অকস্মাৎ অস্থির চঞ্চল হইয়া উঠিল। কমল ব্যস্ত হইয়া ডাকিল, পরী পরী!

বালিশে মুখ গুঁজিয়া পরী শিশুর মত কাঁদিয়া উঠিল, বলিল, না না, তুই যা, তুই যা। আমার সামনে থেকে তুই যা।

ওই দিন সন্ধ্যাতেই পরী দেহ রাখিল। যেন ওই আকাজাকাটুকুই তাহার জীবনকে জীর্ণ পঙ্কজের মধ্যে বাধিয়া রাখিয়াছিল। বহুদিনের রোগী প্রায় সন্ধ্যানেই দেহত্যাগ করে। পরীরও তাহাই হইয়াছিল। বৈকালের দিকে শ্বাস উপস্থিত হইতেই রক্তন বলিল, পরী, চল, তোমাকে প্রভুর সামনে নিয়ে যাই, প্রভুকে একবার দেখ।

পরী হাত নাড়িয়া বলিল, না।

জীবনের জালা শেষ মুহূর্ত পর্যন্ত মাছবের বোধ হয় যায় না। কতের পরিশ্রম! ছিঃ

তবুও পরী হাঁপাইতে হাঁপাইতে বলিল, দেবতার সেবা অনেক করেছি, কিন্তু দেবতা আমার কি দিলে? দেবতা নয়; মহাস্ত, তুমিও না। তোমার মুখ আমার দেখতে ইচ্ছে করছে না। গিরে যাও তুমি। আমি একা থাকব।

তারপর একটি সন্ধ্যা হাসি হাসিয়া বলিল, আমি তো আজ একাই।

আশন জীবনের সমস্ত তিক্ত রসটুকু হতভাগী নিঃশেষে পান করিয়া তবে গেল।

বারো

তারপর ?

তারপর একটি অবিচ্ছিন্ন মিলনের গাঢ় আনন্দ। এই আনন্দের মধ্য দিয়া দিবারাত্রিগুলি স্বচ্ছন্দে শাসপ্রস্থানের মত বহিয়া যায়। মিলনের আবেশে চোখের নিমিখ নামিয়া আসে, সে নিমিখ খুলিতে খুলিতে রাত্রি আসে। আবার রাত্রি কাটিয়া প্রভাত হয়। পাখির কলরব জাগিয়া উঠার সঙ্গে সঙ্গে যাহার ঘুম ভাঙে, সে অপরের কানের কাছে মুহূর্ত্তে গায়—

রাই জাগো—রাই জাগো

ওই শুক-সারী বোলে।

ঘুম ভাঙে। প্রভাত হইতে আবার আরম্ভ হয়—হাসি, গান, আনন্দ, অভিমান, অহনয়, অভিনয়, অশ্রু। আবার মিলন হয়। আবার হাসি, আবার আনন্দ। মোট কথা, দুইটি তরুণ নর-নারীর জীবনের যা লীলা—তাই। পুরাতন ধারা জীবনে ঘুরিয়া-ফিরিয়া অল্প একটু বেশ পরিবর্তন করিয়া দেখা দেয়। নর-নারী দুইটি কিন্তু ছদ্মবেশ ধরিতে পারে না। তাহারায় পায় তাহার মধ্যে নৃতনের সন্ধান।

কিন্তু তবু কমল মাঝে মাঝে চমকিয়া উঠে। মনে হয়, পরী যেন ঈর্ষাতুর দৃষ্টিতে চাহিয়া কোন অঙ্ককারে দাঁড়াইয়া আছে।

সেদিন দোল। বসন্ত-পূর্ণিমা শেষ-ফাল্গুনে আসিয়া পড়িয়াছিল। দক্ষিণা বাতাসের গতি ঈষৎ প্রবল। ঘরে দোলনা খাটানো হইয়াছে। দেবতার পায়ে আবীর-কুমকুম নিবেদন করিয়া দিয়া খালাখানি হাতে রঞ্জন দাওয়ার আসিয়া উঠিল। কমল বলিয়া মালা গাঁথিতেছিল। কোঁতুকভরে রঞ্জন একটা কুমকুম ছুঁড়িয়া কমলকে মারিল। রাগে মুখে কমলও উঠিয়া একটা কুমকুম তুলিয়া লইল।

কিন্তু সে কুমকুম তাহার হাতেই থাকিয়া গেল। চমকিয়া উঠিয়া বিবর্ণ মুখে সে বলিয়া উঠিল, কে কাঁদছে গো?

সবিস্ময়ে রঞ্জন প্রশ্ন করিল, কই, কোথা?

ওই ঘরে!

ওই ঘরটার পরী মরিয়াছিল। সত্যই একটা অদ্ভুত কান্নার মত শব্দ যেন দীর্ঘনিশ্বাস বিলাপের ছন্দে বাজিতেছিল।

সাহস করিয়া রঞ্জন ঘরে ঢুকিল। বাতাসের তাড়নার একটা খোলা জানালা ধীরে ধীরে
ছুলিতেছিল—তাহারই ঘুরিচা-ধরা কজার শব্দ সেটা।

রঞ্জন হাসিয়া উঠিল।—এত ভয় তোমার।

কমল হাসিতে চেষ্টা করিল।

এমনই করিয়া দিন কাটে। দিনে দিনে মাস—মাসে মাসে বৎসর চলিয়া যায়। বৎসরের
পর বৎসর যাইতেছিল। পাঁচ বৎসর পর বোধ হয়। কমল হঠাৎ একদা অসুস্থব করিল,
দিনগুলি যেন বড় দীর্ঘ হইয়া পড়িয়াছে। দিনগুলির ধারারও কেমন যেন পরিবর্তন হইয়াছে,
তেমন স্বচ্ছন্দ গতিতে আর যায় না—কেমন যেন মন্দগতি। মধ্যে মধ্যে কাটিতে চায় না
দিন। রঞ্জন আখড়ার জমি-জমা লইয়া বড় বেশি জড়াইয়া পড়িয়াছে। কাজের আর অন্ত
নাই।

দোলের দিন রঙ-খেলায় সে আর তেমন করিয়া মাতে না। ঝুলনের দিন বকুলশাখায়
ঝুলনা আর ঝুলানো হয় না। রঞ্জন গাছে উঠিতে পারে না, বলে, এ বয়সে হাত-পা ভাঙলে
বুড়ো হাড় জোড়া লাগবে না। রাসের দিন দেবতার রাস সারিয়া রঞ্জন ঘুমাইয়া পড়ে। ঘুম
আসে না কমলের। মধ্যে মধ্যে সেই পুরানো ভয় হঠাৎ তাহাকে চাপিয়া ধরে। মনে হয়,
ও-ঘরের মধ্যে পরী যেন পদচারণা করিয়া ফিরিতেছে।

কমল ক্রমে হাঁপাইয়া উঠিল।

সেদিন রঞ্জন খাইতে বসিলে সে বলিল, দেখ, চল, কিছুদিন তীর্থ ঘুরে আসি।

রঞ্জন বিস্মিত হইয়া তাহার মুখের দিকে চাহিল। কমল বলিল, আমার ভাল লাগছে না
বাপু, চল, একবার ব্রজধাম ঘুরে আসি।

শ্রেষের হাসি হাসিয়া রঞ্জন বলিল, কত খরচ জ্ঞান? বোটম-ভিখারীর ঝুলিতে তা নাই।

কমল ম্লান হইয়া গেল, বলিল, তোমার তো টাকা না থাকার নয়!

রঞ্জন পরিষ্কার বলিল, আমার একটি পরসোও নাই।

কিছুক্ষণ নীরব থাকিয়া কমল আবার বলিল, বেশ তো, কাজ কি টাকাকড়িতে! চল, ভিক্ষের
ঝুলি কাঁধে করে বেরিয়ে পড়ি।

ক্লটকণ্ঠে রঞ্জন বলিল, আমার বাবা এলেও তা পারবে না।

কমল আঘাত পাইল, অভিমানও হইল। কিন্তু কেন কে জানে সে অভিমান প্রকাশ করিতে
তাহার সাহস হইল না।

ইহার পর কমল যেন সজাগ হইয়া উঠিল। মহাস্তরের সেবাস্তরের পরিপাট্যে গভীরভাবে
সে আত্মনিয়োগ করিল। রঞ্জনও একটু প্রশ্রয় হইয়া উঠিল। কিন্তু তবু কমলের মনে অতৃপ্তি
ঘুরিয়া মরে। তাহার মনে হয়, সেদিন আর নাই। সে ব্যাকুল অন্তরে সেই হারানো দিন
ফিরিয়া পাইবার উপায় খুঁজিতে লাগিল।

দোলের দিন আবার সে রঙের খেলা খেলিতে চায়, রাসের রাত্রে সারা রাত্রি জাগিয়া সে গান করিতে চায়, জীবনে সে লীলা চায়।

শ্রাবণ মাস, সমুখেই ঝুলন-পূর্ণিমা। গুরুপক্ষের মেঘাচ্ছন্ন বর্ষণমুখর একটি রাত্রি। বজ্রন বাড়িতে ছিল না, কমল দাওয়ার উপর বসিয়া আকাশের দিকে চাহিয়াছিল। ওপাশে শুইয়াছিল বাউড়ী-বুড়ী। মহাস্ত না থাকিলে ওই বুড়ী বাড়িতে শোয়।

মেঘাবরিত চাঁদের জ্যোৎস্নার স্বচ্ছ প্রভার মধ্যে অবিরাম ধারা-পাতের স্বরস্বর ধারা কুহেলীয় মত দেখা যাইতেছিল। রাত্রিটি কমলের বড় মধুর লাগিল। আকাশ নীচে নামিয়া শ্রাবণ ধরণীকে আলিঙ্গন করিতে চায়, কিন্তু বাতাস নিয়তির মত পথ রোধ করিয়া হা-হা করিয়া হাসে, তাই আকাশ যেন কাঁদিয়া সারা।

কমল মনে মনে আগামী দিনের জন্ত এমনই একটি রাত্রি বার বার কামনা করিল। একটি মন্দর সঙ্কল করিয়া সে পুলকিত হইয়া উঠিয়াছে। দেব মন্দিরে ঝুলনা ঝুলানো হইয়াছে, যুগল বিগ্রহ ঝুলনে চাপিয়াছেন। কমল সঙ্কল করিল, সেকালের মতন শয়ন-মন্দিরে তাহারও ঝুলনা বাঁধিয়া ঝুলনে দোল থাইবে।

কমল কল্পনা করিতে করিতে বিত্তোর হইয়া উঠিল।

সবুজ রঙের ছাপানো সেই কাপড়খানি সে পরিবে। চুল এলানো থাকাই ভাল। নাকে রসকলি, কপালে চন্দন। মহাস্তের গলায় দিবে গন্ধরাজের মালা। নিজের জন্ত বেলফুলের মালাই তাহার পছন্দ হইল।

কিন্তু এমন জ্যোৎস্নাস্বচ্ছ বর্ষণমুখর রাত্রিটি কি কাল হইবে? কমলের আক্ষেপ হইতেছিল। আজ যদি সে থাকিত! শুধু আক্ষেপ নয়, সে তাহার লকার জন্ত একটি সলজ্জ বেদনাময় অভাব অল্পভব করিতেছিল। কেহ কোথাও নাই, যেন নিজের কাছে নিজের লজ্জা বোধ হইতেছিল তাহার।

কখন বাউড়ী-বুড়ীর ঘুম ভাঙিয়া গিয়াছিল, সে পাশ ফিরিয়া শুইতে শুইতে বসিল, ঘরদোরে আলো কই গো? সন্ধ্যোপিদিম জ্বাল নাই নাকি?

কমল চমকিয়া উঠিল। তাই তো, মহাপ্রভুর স্বরে—যুগল বিগ্রহের স্বরেও যে আলো দেওয়ার হয় নাই, কীর্তন গাওয়া হয় নাই! তাড়াতাড়ি কাপড় ছাড়িয়া সে প্রদীপ জ্বালিতে বসিল।

প্রদীপ দেওয়া শেষ করিয়া সে নিয়মমত খঞ্জনী লইয়া কীর্তন গাহিতে বসিল। গান ধরিল—

এ ভরা বাদর মাহ ভাদর শূন্ত মন্দির ঘোর—

অকস্মাৎ সে স্তব্ধ হইয়া গেল। সে করিয়াছে কি? যুগল বিগ্রহ যখন পূর্ণ মিলনানন্দে ঝুলনে চাপিয়াছেন, তখন সে এ কি গান গাহিল? মনে মনে বার বার মার্জনা চাহিয়া সে ঝুলনের গান ধরিল।

পরদিন প্রভাতেও বেশ কাটিল না। কমল সজল মেঘাচ্ছন্ন আকাশ দেখিয়া পুলকিত হইয়া

উঠিল। কমল কবিল, আজিকার রাজিটি গতরাত্রির চেয়েও স্থল্লর হইবে। আজ তাঁর এক কলা বাড়িবে যে। স্থল্লনের বন্দোবস্তে ব্যস্ত হইয়া উঠিল। মাথালি মাথায় দিয়া সে বড় পিড়েখানি ঘরে আনিয়া তুলিল। ধূইয়া মুছিয়া তাহাতে আলপনা আঁকিতে বসিল। আলপনায় পাশাপাশি দুইটি পদ্ম সে আঁকিল। তারপর সে দোকানে বাহির হইয়া গেল। যখন ফিরিল, তখন মহাস্ত আসিয়াছে। মহাস্তকে দেখিয়া কমল কাপড়ের আঁচলে কি যেন লুকাইল। বেশ দেখাইয়াই লুকাইল। কিন্তু রঞ্জন সেদিকে লক্ষ্যই করিল না, সে আপন মনেই বলিতেছিল, জালাতন রে বাপু, সারা দিনরাত টিপটিপ কিপকিপ! হবে তো তাই ভাল করে হয়ে ছেড়ে দে রে বাপু!

কমল বলিল, হোক না বাপু, তোমারই বা কি, আমারই বা কি? কাল কেমন রাতটি হয়েছিল বল দেখি?

রঞ্জন বলিল, হুঁ, তা হয়েছিল। কিন্তু জলে-কাদায় যে পায়ে হাজা ধরে গেল। তোমার কি বল, তোমার জলই ভাল, তুমি যে কমল।

কমল খিলখিল করিয়া হাসিয়া উঠিল। এইটুকু আদরেই সে গলিয়া গেল। আঁচলের ভিতর হইতে সে এবার লুকানো জিনিসটি বাহির করিল। বেশ মোটা এক আঁটি দড়ি বাহির করিয়া রঞ্জনের সম্মুখে রাখিয়া দিয়া বলিল, দেখ তো!

রঞ্জন একনজর দৃষ্টি বুলাইয়া জিজ্ঞাসা করিল, কি, হবে কি?

কমল তরুণীর মত স্বাক্ষর দিয়া উঠিল, বাঃ রে, আমি বললাম, দেখ তো জিনিসটা কেমন; আর উনি জিজ্ঞেস করছেন, হবে কি? আগে আমার কথার উত্তর দাও!

একবার নাড়িয়া-চাড়িয়া দেখিয়া রঞ্জন বলিল, দড়ি শক্ত বটে। এখন হবে কি শুনি?

সকৌতুকে কমল বলিল, বল দেখি, কি হবে! দেখি তুমি কেমন!

রঞ্জন যেন ঈষৎ বিরক্ত হইয়া উঠিল, বলিল, আরে, তাই তো পাঁচবার জিজ্ঞাসা করছি।

কমল বলিল, আচ্ছা আচ্ছা, বলছি। কিন্তু আগে আর একটা কথার জবাব দাও দেখি, দুজন মানুষের ভার সইবে এতে?

কেন, গলায় দিয়ে ঝুলতে হবে নাকি? তা সইবে।

কমলের মুখ এক মুহূর্তে বিবর্ণ হইয়া গেল। এ কথাটাকে সে কিছুতেই রহস্য বলিয়া মনে মনে সাধনা খুঁজিয়া লইতে পারিল না। তবুও সে চেষ্টা করিয়া ঈষৎ হাসিয়া বলিল, আজ ঝুলন হবে আমাদের। শোবার ঘরে ঝুলনা টাঙাব।

কমলের মুখের দিকে অল্পক্ষণ একদৃষ্টে চাহিয়া থাকিয়া রঞ্জন ঈষৎ হাসিয়া বলিল, বলি বয়স বাড়ছে, না কমছে?

ক্লক্সাসে কমল বলিল, কেন?

রঞ্জনের হাসির ধারায় কমল ভয় পাইয়া গিয়াছিল। রঞ্জন এবার অতি দৃঢ়ভাবে বলিয়া উঠিল, নইলে এখনও তোমার ঝুলনের সাধ হয়! আরনাত্তে কি মুখ দেখা যায় না, না নিজের রূপ খুব ভালই লাগে?

কমলের বৃকে যেন বাধা ধরিয়া উঠিল। দড়ির গোছাটা হাত হইতে আপনি খসিয়া পড়িয়া গিয়াছিল। সে ক্ষতপদে সেখান হইতে পলাইয়া আসিল। তাহার বৃকের মধ্যে তখন কান্নার সাগর উখলিয়া উঠিয়াছে। সে গিয়া ঢুকিল পরী যে ঘরটায় মরিয়াছিল সেই ঘরে। মেঝের উপর লুটাইয়া পড়িয়া কমল ফুলিয়া ফুলিয়া কাঁদিতে লাগিল।

অকস্মাৎ তাহার পরীর কথা মনে পড়িয়া গেল। মৃত্যুর দিন সে তাহার মুখের দিকে চাহিয়া বলিয়াছিল, রূপ একদিন আমারও ছিল। সেদিন তাহার মনে হইয়াছিল, এ পরীর বেদনার বিলাপ। কিন্তু আজ এই মুহূর্তে মনে হইল, পরী তাহাকে অভিশাপই দিয়া গিয়াছে।

শুনছ ?

ঘরের দুয়ারে দাঁড়াইয়া রজন তাহাকে ডাকিল। অশ্রুর লজ্জায় কমল মুখ ফিরাইতে পারিল না, সে নীরবেই পড়িয়া রহিল।

রজন বলিল, আমাকে আজ এখনি আবার যেতে হবে। দিনতিনেক হবে, বুঝলে ?

তারপর সব নীরব। রজন উত্তরের জন্ত অপেক্ষা করে নাই, তখনই চলিয়া গিয়াছে। কমল উদাস নেত্রে খোলা জানালার দিকে চাহিয়া পড়িয়া ছিল। মনের মধ্যে সে শুধু ভাবিতেছিল, সেই লক্ষা! কেন এত অবহেলা তাহার? হঠাৎ সে উঠিয়া বসিল, রক্তনের কথাগুলো তাহার মনে পড়িয়া গেল, “আয়নায় কি মুখ দেখ না?” সে ব্যস্ত হইয়া কুলুঙ্গি হইতে আয়নাখানা পাড়িয়া আপনার মুখের সামনে ধরিল। প্রতিবিম্বের দিকে একদৃষ্টে চাহিয়া রহিল।

বাস্তব আজ তাহার চোখে পড়িল। কালের সঙ্গে সঙ্গে তিলে তিলে তাহার যে পরিবর্তন ঘটিয়াছে, তাহা চোখে পড়ে নাই এতদিন, আজ পড়িল—সত্যই তো, কোথায় সেই প্রাণ-মাতানো রূপ তাহার? সেই চাঁপার কলির মত রঙ এখনও আছে, কিন্তু সে চিকণতা তো আর নাই। চাঁদের ফালির মত সেই কপালখানি আকারে চাঁদের ফালির মতই আছে, কিন্তু তাহাতে যেন গ্রহণ লাগিয়াছে, সে মন্থ স্বচ্ছতা আর তাহাতে নাই। গালে সে টোনাটি এখনও পড়ে, কিন্তু তাহার আশেপাশে স্নান হইলেও সারি দিয়া রেখা পড়িতে শুরু করিয়াছে—এক দুই তিন। নাকের ভগ্নায় কালো মেচেতার রেশ দেখা দিয়াছে। সেই সে, সেই সব, কিন্তু সে নবীন লাবণ্য তাহার আর নাই। এই দীর্ঘ দিনে পৃথিবীর ধূলামাটি তাহাকে স্নান করিয়াছে। তাড়াতাড়ি সে আয়নাটা বন্ধ করিয়া দিল। আবার তাহার কাঁদিতে ইচ্ছা করিল। রক্তনের অবহেলার জন্ত নয়, তাহার রূপের জন্ত কাঁদিতে ইচ্ছা হইল। কয় ফোটা চোখের জল ঝরিয়া পড়িয়া মাটির বৃকে মিশিয়া গেল।

থাকিতে থাকিতে বিদ্যুৎচমকের মত মনে পড়িয়া গেল আর একজনের কথা। বৃদ্ধ রসিকদাস—বগ-বাবাজীর মুখ বহুদিন পরে তাহার চোখের সম্মুখে যেন ভাসিয়া উঠিল। সেই কোঁতুকোঁজল হাসি-হাসি মুখ। কমলের মনে হইল মহান্ত ব্যক্তির হাসিতেছে। কিন্তু পরক্ষণেই সমস্ত অন্তর তাহার প্রতিবাদ করিয়া উঠিল না না না। সে তাহাকে বলিত, কৃষ্ণ-

পূজার কমল। সে-ই তাহার নাম দিয়াছে—রাইকমল। কমল শুকায়, কিন্তু রাইকমল, সে তো কখনও শুকায় না। আবার সে শিহরিয়া উঠিল, মনে পড়িল পরীকে। পরী ব্যাক্তরে হাসিতেছে যেন—সেই জীর্ণ জীর্ণ বীভৎস মরণাতুর মুখ।

ভেরো

ইহার কল্পদিন পর আকাশ তখনও মেঘলা হইয়া আছে। অপরাহ্নের দিকে কমল বিগ্রহ-মন্দিরের দাওয়ার উপর বসিয়া মালা গাঁথিতেছিল। রঞ্জন সেই গিয়াছে, আজও ফেরে নাই। সে যেন কমলকে লুকাইয়া একটা কিছু করিতেছে। কমলও কোন ঔৎসুক্য প্রকাশ করে নাই। মনের মধ্যে একটি অভিমানাহত উদাসীনতা তাহাকে স্তিমমাণ করিয়া রাখিয়াছে। সে আপনার মনে মৃদুস্বরে গাহিতেছে—

স্বপ্নের লাগিয়া

যে করে পীরিতি

দুখ যায় তার ঠাই।

বাহিরের আগড় ঠেলিয়া কে যেন প্রবেশ করিল। কমল চাহিয়া দেখিল, সে রঞ্জন। রঞ্জনের বেশে আজ পরম পারিপাট্য ছিল। কপালে চন্দনের তিলক, গলায় ফুলের মালা, পরনে রেশমী বহির্বাস, গলায় উত্তরীয়। কমল মুগ্ধ হইয়া গেল। রঞ্জন কিশোর সাজিয়া তাহার কাছে ফিরিয়া আসিল। সে সব ভুলিয়া গেল এক মুহূর্তে। সব ভুলিয়া গিয়া সে হাতের মালাগাছি লইয়া উঠিয়া দাঁড়াইল। হউক দেবতার নামে গাঁথা মালা! সেও আজ কিশোরী সাজিবে!

হাসিমুখে কাছে আসিয়া সে বলিল, এ কি, এ যে দটবর বেশ! দুই হাত তুলিয়া রঞ্জনের গলায় মালা দিতে গেল, কিন্তু পরমুহূর্তে পক্ষাঘাতগ্রস্তের মত নিশ্চল হইয়া গেল সে, আর্দ্রস্বরে প্রশ্ন করিল, ও কে মহাস্ত ?

মহাস্তের পিছনে ঠিক দরজার মুখে একটি তরুণী দাঁড়াইয়া মৃদু মৃদু হাসিতেছিল।

যেয়েটি শ্রামাঙ্গী, কিন্তু সর্বাঙ্গব্যাপী একটি চটুলতায় সে মনোহারিণী। তাহার সে চটুল রূপ ষোলকলায় পূর্ণ বিকশিত। রঞ্জনকে উত্তর দিতে হইল না। মেয়েটি বাড়ি ঢুকিল। অদ্ভুত চপলা মেয়ে, দেখিলেই তাহার প্রকৃতি বুঝা যায়; সর্বাঙ্গে একটি হিলোল ভুলিয়া হাসিতে হাসিতে সে-ই বলিল, আমি নতুন সেবাদাসী গো!

তারপর একটু আগাইয়া আসিয়া সে আবার বলিল, তুমিই বুঝি কমল বোষ্টমী রাই-কমল? তবে যে শুনেছিলাম পাইয়ে-বাজিরে বলিয়ে-কইয়ে—রূপে মরি-মরি! ও হরি তুমি এই!

ঠোঁটের আগায় সে একটা পিচ কাটিয়া দিল। ধীরে ধীরে কমল মুখ তুলিল, কিছুক্ষণ রঞ্জনের দিকে স্থিরদৃষ্টিতে চাহিয়া রহিল। বিচিত্র দৃশ্য দেখিতে দেখিতে মুখও তাহার ফুটিয়া উঠিল বিচিত্র এক হাসি। রঞ্জন সঙ্কচিত হইয়া গিয়াছিল। মেয়েটিও কেমন যেন

অভিভূত হইয়া গেল সে-দৃষ্টির সম্মুখে। কমল এইবার কথা বলিল, হাসিয়া বলিল, হ্যাঁ। আমিই রাইকমল। এখন এস, মহাস্তকে পাশে নিয়ে দাঁড়াও দেখি—বরণ করে ঘরে তুলি। দাঁড়াও, পিড়িখানা নিয়ে আসি।

ঝুলনের জন্ত আলপনা-আঁকা পিড়িখানা আনিয়া সে পাতিয়া দিল। সেদিনের সে আলপনা আজও ঝকঝক করিতেছে, দুইজনের জন্ত দুই পাশে দুইটি পদ্ম। দেবমন্দির হইতে শঙ্খঘণ্টা বাহির করিয়া আনিল, জল ভরিয়া ঘট পাতিয়া দিল, তারপর বলিল, পিড়ির ওপর উঠে দাঁড়াও। রঞ্জন বলিল, থাক।

হাসিয়া কমল বলিল, এ যে করণীয় কাজ গো! ছিঃ, উঠে দাঁড়াও, আমি বরণ করি।

সন্ধ্যায় সে নিজের হাতে ফুলশয্যা সাজাইয়া দিল। আপনি শুইতে গেল, পরী যে ঘরে মরিয়াছিল, সেই ঘরে।

পরদিন সকালে উঠিয়া কমল স্নান করিয়া দেবতার ঘরে ঢুকিয়া বলিল, অনেকক্ষণ পর ঘর হইতে বাহির হইয়া রঞ্জন ও নতন বৈষ্ণবীর বাসর-দুয়ারে গিয়া দাঁড়াইল। দরজা খোলা, উকি মারিয়া দেখিল, রঞ্জন শুইয়া নাই। এদিক-ওদিক সে খুঁজিয়া দেখিল। না, রঞ্জন বাড়িতে নাই। কমল অগত্যা পরীর ঘরেই বসিয়া রহিল। ও-ঘরে তরুণীটি এখনও ঘুমাইতেছে।

কিছুক্ষণ পর রঞ্জন ফিরিল। কমলকে দেখিয়া সে লজ্জিত হইল, ব্যস্ত হইয়া বলিল, কি বিপদ, রাখালটা আসে নাই!

সে তাহাকে আড়াল দিয়া চলিবার চেষ্টা করিতেছে। হাসিয়া কমল ডাকিল, লক্ষা! দীর্ঘকাল পর সে রঞ্জনকে ‘লক্ষা’ বলিয়া ডাকিল। এতদিন হয় ‘ওগো’ বলিয়াছে, অথবা ‘মহাস্ত’।

রঞ্জন নতমুখে আসিয়া দাঁড়াইল।

কমল হাসিয়া কহিল, এমন লুকিয়ে কিরূপ কেন বল তো?

নতচক্ষেই রঞ্জন বলিল, আমায় মাপ কর কমল।

প্রশান্তকণ্ঠে কমল উত্তর দিল, আর ‘কমল’ নয়, ‘চিনি’ বল। বহুকাল পরে তুমি আমার ‘লক্ষা’, আমি তোমার ‘চিনি’। কিন্তু রাগ কি তোমার উপর করতে পারি লক্ষা? রাগ আমি করি নাই।

ব্যগ্রভাবে রঞ্জন বলিল, সত্যি কথা বল কমল।

না না, ‘কমল’ নয়, ‘চিনি’ বল।

অগত্যা রঞ্জন বলিল, সত্যি কথা বল চিনি।

কমল হাসিমুখে বলিল, রাগ করি নাই, রাগ করি নাই, রাগ করি নাই—তিন সত্যি করলাম, হল তো?

রঞ্জন এবার আদর করিয়া কমলকে বুকে টানিয়া লইতে গেল। কিন্তু কমল বেশ মর্মান্বিত সহিত আপনাকে মুক্ত করিয়া লইয়া বলিল, ছিঃ! তুমি লক্ষা, আমি চিনি!

তারপর ঘরের ভিতর হইতে একটা পোটলা বাহির করিয়া কাঁখে তুলিয়া লইল, বলিল,
এইবার আমার বিদেয় দাও।

সে কি!

হ্যাঁ, আমি যাই।

তবে তুমি যে বললে, আমি রাগ করি নাই?

না, রাগ করি নাই। তবে—তবে, পরীর কথা মনে পড়ে তোমার—যেদিন আমি প্রথম
আসি? আমার এই ভ্রম পানে তাকিয়ে দেখ, মনে পড়বে।

রঞ্জন নীরবে কমলের মুখের দিকে চাহিয়া রহিল। কমল আবার বলিল, আমিও তো সেই
পরীর জাত, আমার বুকে তো মেয়ের পরান আছে লক্ষা!

সে সেই আশ্চর্য হাসি হাসিল।

রঞ্জন কমলের হাত ধরিয়া অচুনয় করিয়া বলিল, না না কমল, এ রাজত্ব তোমারই। ও তোমার
দাসী হয়ে থাকবে। তুমি তো জান, বৈষ্ণবের সাধনা—রাধারাগীর কল্পনা—যৌবনরূপ—

বাধা দিয়া কমল বলিল, ওরে বাপ রে! অনেক এগিয়েছ তুমি। তা বটে, যৌবন-রূপ
সামনে না থাকলে ধ্যান-ধারণায় বাধা পড়ে, রূপ-রসের উপলব্ধি হয় না, মনে রাধারানী ধরা
পড়েন না। ঠিক কথা। একটু হাসিয়া আবার বলিল, তুমি আমার গুরু গো। তোমার
সাধন-পথেই তো যাচ্ছি আমি। আমিও তো বৈষ্ণবী, আমারও তো চাই একটি শ্যাম-
কিশোর।

রঞ্জন নির্বাক হইয়া গেল। কমল দুয়ারের কাছে গিয়াছে, তখন সে বলিয়া উঠিল, বলি,
তারই সন্ধানে চললে বুঝি?

কমল রঞ্জনের মুখের দিকে চাহিয়া হাসিয়া বলিল, হ্যাঁ গো, তারই সন্ধানে চলেছি আমি।
তুমি আলীর্বাদ কর।

সে হাসিতে, সে স্বরে ব্যঙ্গ নাই, শ্লেষ নাই, ব্যথা নাই; বিচিত্র সে হাসি—বিচিত্র সে
কলস্বর!

কমল পথে বাহির হইয়া পড়িল।

পথ—অজয়ের কূলে কূলে পথ। ঘাটু, মাঠ, মাঠের পর গ্রাম। গ্রামের মধ্যে পথের দুই
পাশে গৃহস্থের দুয়ার।

বৈষ্ণবী পথের পর পথ পিছনে ফেলিয়া চলে। গৃহস্থের দ্বারে গান গাহিয়া ভিক্ষা চায় বিনীত
হাসিমুখে। ভিক্ষা লয় সন্তোষের আলীর্বাদে গৃহস্থের ভিক্ষা-দেওয়া শূন্য পাত্রখানি ভরিয়া দিয়া।
পরিভূষ্ট পুরনারীরা ভিক্ষা দিয়া নিমন্ত্রণ করে, আবার এস বোষ্টমী। হাসিয়া বৈষ্ণবী বলে,
তোমাদের দুয়ারই যে আমাদের ভাণ্ডার, আসব বইকি।

হাটে-বাজারে বৈষ্ণবী গান গায়। রসিক শ্রোতার দল নানা প্রহর করে। বৈষ্ণবী মিষ্ট
হাসি হাসিয়া অবগুষ্ঠনটা একটু টানিয়া দেয়। শ্রোতারা হাসিয়া বলে, বোষ্টমীর গান

যেমন মিষ্টি, হাসিও তেমনই মিষ্টি ।

বৈষ্ণবী হাসিয়া উত্তর দেয়, বৈষ্ণবীর ওই তো মঞ্চল প্রভু ।

পথের ধারে অজয়ের ঘাটের পাশে গাছতলার সেদিনের ঘরকন্না পাতে ; রান্নার উজোগ করিতে করিতে মনে পড়ে রসিকদাসের কথা । রাইকমল দুইটি হাত কপালে ন্মর্শ করিয়া বার বার বলে, তোমার সাধনা সফল হোক, তোমার সাধনা সফল হোক । অজয়ের ঘাটে নামিয়া সমুদ্রে অঙ্গমার্জনা করিয়া স্নান করে ; মলিন পরিধেয় সাবান দিয়া কাচিয়া লয় । কাচা ধপধপে কাপড়খানি পরে । তারপর স্নানান্তে দর্পণের সম্মুখে নাকে সমুদ্রে রসকলি আঁকে । আঁকিতে আঁকিতে অকস্মাৎ চোখ তাহার সজ্জল হইয়া আসে, সে গুনগুন করিয়া মৃদুস্বরে গান ধরে—

সখি বলিতে বিদরে হিয়া

আমারই বঁধুয়া আনু বাড়ি যায় আমারই আঙিনা দিয়া ।

কিন্তু এ গান কোনদিন সে শেষ করিতে পারে না । অভিষাণের কলি তাহার কণ্ঠে ফোটেনা ।

মধ্যে মধ্যে তাহার মনে হয়, তাহার পূর্বের রূপ আবার কিরিয়া আসিয়াছে । সে সেই রাইকমল । নিজেই দেখিয়া সে নিজেই মুগ্ধ হইয়া যায় । সেদিন সে গুনগুন করিয়া গান ধরে—

রূপ লাগি আঁখি বুঝে গুণে মন ভোর ।

প্রতি অঙ্গ লাগি কাঁদে প্রতি অঙ্গ মোর ।

অজয়ের নির্জন তীর, নিজের গান সে নিজেই শোনে । সব সারিয়া গাছতলার ঘর তাড়িয়া আবার সে পথ চলে ।